

萬 有 文 庫

第二集七百種

王 雲 五 主 編

讀 史 方 輿 紀 要

(三十三)

顧 祖 禹 輯 著

商 務 印 書 館 發 行

讀史方輿要紀

(三十三)

顧祖禹輯著

國學基本叢書

福建讀史方輿紀要叙

福建僻處海隅，褊淺迫隘，用以爭雄天下，則甲兵糗糧不足供也，用以固守一隅，則山川間阻不足恃也。西漢時，東越嘗國於此矣，橫海樓船以四道之兵至而國亡，陳天嘉中，陳寶應亦思據此矣，章昭達、余孝頃之師來襲而國亡，五代時，王氏亦嘗帝制自爲矣，及釁起於內，敵乘於外，而地分於鄰國，元末陳友定起於閩閩，乃能削平羣盜，保其境內，其才非不足以有爲也，一旦杉關失，南臺驚，及其身而敗亡至矣，猶得謂閩爲險固之地乎哉，昔人亦言，閩中形勝，大類巴蜀，此非通論也，夫蜀內有鹿頭、劍閣，墊江之阻，外有陰平、葭萌，瞿唐之限，北出則動關中，東顧則臨荆楚，而閩曾有是乎哉，建寧一郡，最稱上游，亦不過北走浙中，西達江右而已，其至於中華也，必由衢信經饒池而後渡江，越安慶出廬壽而後渡淮，自淮以北，又累驛而後至大梁，謂自閩而出，遂有當於中原之要會，不能也，至於敵之來攻也，不特惠潮迫近汀漳，藩籬易越，而南贛山谿相錯，窺伺之道甚多，由建昌而趨邵武，由廣信而下崇安，敵已在肘腋間矣，仙霞南下建瓴之勢也，而處州之龍泉、慶元，與建寧之浦城、松溪、犬牙出入，往者葉宗留嘗肆惡其間，而建寧以及衢信道皆爲之梗，山藪隱匿，保無有忽然闖入者乎，溫州以南，由泰順而踰分水，自平陽而越流江，

福寧侯官之郊。皆戰場也。而海道之捷。抵白沙浦。徑進五虎門。又無論矣。噫。以福之幅員。而可攻之隙。隨在。而是備前則後至。備左則右至。山海之環繞。不足以爲固。而止爲敵人出沒之資耳。猶可與巴蜀同日道哉。吾嘗於南宋奔亡之餘。而反覆三歎焉。蒙古之用兵也。縱橫馳突。大異前代。臨安未陷。兩粵已爲之破殘。肇慶以西。皆置戍軍。惟廣惠潮諸州爲宋守耳。使其兩廣尙全。雲貴未擾。爲宋計者。必且擇堅完之所。以爲經營四方之本。豈將倉皇造次。遂駐蹕於偏殘淺露之福州哉。廣州形勝。十倍於閩。其不駐蹕於廣州者。懼肇慶之逼也。顧瞻四方。惟福州稍遠於敵。又以北近臨安。示不忘故都之意。從而建爲行都。孰知敵人海道之兵。已自明州揚帆而至哉。或曰。爲宋計者。廣州縱可都。而福州亦必不可去。去福州。福州必遂入於敵矣。余曰。去福州而廣州猶固。尙可以圖福州。守福州而福州一傾。吾猶得而固廣州乎。吾嘗悼將亡之國。其君若臣。驚魂震魄。苟且自全。遂不思爲久遠之計也。使有遠猷者出焉。必先擇其可固之圍。以定根本。立紀綱。下一令於天下曰。有能爲我復一城。守一邑者。卽以官之。有能爲我全一鄉。保一寨者。亦卽以官之。其守土之臣。而叛降於敵。有能爲我誅其人而復其境者。卽以其人之官。官之。草澤中不乏賢豪也。累百年締造之國家。非若草竊一時者之無所繫於民心也。蒲壽庚之擅有泉州也。其初不過一亡命匹夫耳。

宋史壽庚西城人。與其兄壽歲以互市歸於宋。

壽庚以鷹犬微功。過假之以祿位。擅市舶利者三十年。官招撫使。狼子

野心背宋而潛獻地於元。宋外懼敵師之侵，內惕壽庚之叛，不得已而走漳，不得已而走潮，以入海也。當其駐蹕福州之初，而已知其勢之必至此也。客曰：閩固不足爲中國患乎？曰：昔東晉時，有孫恩者，出沒海島，爲閩浙患，恩死，其黨盧循繼之，循滅，餘種悉遁入閩。今泉州夷戶有曰泉郎者，亦曰遊艇子，厥類甚繁，其居止常在船上，船之式，頭尾尖高，中平闊，衝波逆浪，都無畏懼，名曰了鳥船，往往走異域，稱海商，招誘凶徒，漸成暴亂。嘉靖中，倭夷蹂躪之禍，此輩所致也。然其流毒亦於閩浙爲甚。江淮以南，侵突亦暫矣。蓋孫恩、盧循之餘習然也。客曰：昔人視海道爲至險，王審知之，據閩也。尙稟命於中國，其入貢之道爲淮南所阻，每歲自福州洋過溫州洋，取台州洋過天門山，入明州象山洋，過涔江，掠洌港，直東北度大洋，抵登萊岸，風濤險惡，沒溺嘗十之四五。海道不足爲中國患也。殆以是歟？予曰：非也。末世智巧日生，昔之艱難者，今皆趨於便易。元伯顏建議海運，初年以四萬六千有奇之粟，從海道入大都，刼行海洋，沿山求嶼，風信失時，逾年而始至。其後益開新道，波濤玩習，占風候雨，機變如神。自福州以及江浙之糧運，至京師者，三百三十餘萬石，僅旬日而至耳。今運糧之道，具於圖經，使臣往來異國之道，則載於針經。習於海上者，淺礁暗沙，險灘僻奧，計潮候息，輜銖不爽。濤山波屋之中，彼已視爲衽席矣。自錢塘鼈子門而北，爲海門之料角嘴，爲淮口之廟灣場，爲登萊之成山、沙門島，抵登萊，則左顧天津，而燕薊在望，右指旅順，而遼渾

當前子以王閩之時。而概元季之後。不亦昧哉。客曰。倭夷或能病我中華也。其以海之故哉。予曰。倭夷之志。在子女玉帛而已。然其倡亂者。非皆倭也。卽所謂泉郎之徒也。猶憶少時。閩人宋氏珏過家先生。謂家先生曰。嘉靖三十七年四月某日。倭賊攻興化府時。賊首爲洪澤珍。故閩人以海商導倭入寇。有某生者。落魄不羈。敢爲大言。少與洪習。往謁之。曰。興化不足攻也。今宜佯請撫於有司。厚索犒與。出屯島外。積甲練兵。漳、泉大艘舊通番市者。不下千餘。皆君所習。以明春整師登舟。齊俟汛至。分百艘泊京口。百艘泊淮陰。而我以大艘直指登萊。抵天津。天下之勢。隔而爲三。江淮資運。勢不能達。人情洶洶。必且內變。山東豪傑。常有應者。吾不俟有攻堅擊銳之勞。而天下之勢。且歸於我矣。時賊以莆城富饒。亟欲城陷。聞生之言。謂生爲莆城遊說也。瞪目叱之。左右顧欲殺之。生匍伏請命。乃得已。竄入壺公山中。事平後。頗自疑。不敢出。然閩人亦喜生之止賊攻城。而不深咎其言之禍及國家也。家先生笑而不應。予聞之。頗怪是生之狂瞽也。夫以國家封域之大。豈草竊者所能干。生乃欲急售其奇。不擇人而教以天下之大計。其不見膏於斧鑕也。亦幸矣哉。

讀史方輿紀要

卷九十五

福建一

禹貢揚州地。周爲七閩地。

周禮七閩。荒服。掌於職。方法。變種有七。故曰七閩。賈疏。祝融之裔。分據閩地。而爲七。

春秋已後。亦爲越地。天文。牛女分野。秦并天

下。平百越。置閩中郡。漢高五年。封無諸爲閩越王。

郡治。孝惠三年。分閩越地。封搖爲東海王。卽今浙江溫州府地。又建元六年。封無諸孫丑爲閩繇王。復封餘善爲東越王。其實皆閩越地也。

元鼎五年。閩越亂。元封初。平之。屬會稽南部都尉。

漢紀。武帝平閩越。以其地險阻。數反覆。終爲後世患。乃遷其民於江淮間。而虛其地。後復爲冶縣。屬會稽郡。

後漢因之。

三國吳始置建安郡。晉又分置晉安郡。皆屬揚州。元康初。改隸江州。宋齊因之。梁普通六年。改屬東揚州。

時增置南安郡。

陳永定初。增置閩州。

領郡三。天嘉六年。復舊。光大初。又置豐州。蓋梁陳時州名。滋多。非古制也。

隋大業中。亦屬揚州部。唐屬江南道。

劉昫曰。初屬嶺南道。煥今以六

據。開元中。分隸江南東道。唐末。壬氏據有其地。及閩亡。入於南唐。吳越宋爲福建路。元置福建等處行

中書省。尋廢。

元志。至元十五年。置行省於泉州。十八年。遷福州。明年。還治泉州。二十年。又徙福州。二十二年。并入江浙行省。三山續志。至元十五年。置行省於福州。十六年。罷。二十年。復置。二十二年。并入江西行省。二十三年。復置。明年。改行尙書省。二

十八年仍并入江西。二十九年仍置行中書省。大德元年立福建平海行中書省。徙治泉州。圖琉球也。三年罷。黃氏曰。三山續志作於元致和間。必有所本也。至正十六年復置。尋為陳友定所據。明初平

之。洪武九年置福建等處承宣布政使司。今領府八。直隸州一。屬縣五十七。總為里三千七百九十七。夏秋二稅。大約八十八萬三千七百二十五石。

奇。有而衛所參列其中。今仍為福建布政使司。

福州府 屬縣九

閩縣 附郭

侯官縣 附郭

長樂縣

福清縣

連江縣

羅源縣

古田縣

閩清縣

永福縣

鎮東衛梅花萬安定海三所附見

興化府 屬縣二

莆田縣 附郭

仙遊縣

平海衛。莆禧所附見。

直隸福寧州 屬縣二

福寧縣

福安縣

福寧衛。大金所附見。

建寧府 屬縣八

建安縣 附郭

甌寧縣 附郭

建陽縣

崇安縣

浦城縣

松溪縣

政和縣

壽寧縣

延平府

屬縣七

南平縣

附郭

將樂縣

沙縣

尤溪縣

順昌縣

永和縣

大田縣

汀州府

屬縣八

長汀縣

附郭

寧化縣

上杭縣

武平縣

清流縣

連城縣

歸化縣

永定縣

邵武府

屬縣四

邵武縣

附郭

光澤縣

泰寧縣

建寧縣

泉州府

屬縣七

晉江縣

附郭

南安縣

同安縣

惠安縣

安溪縣

永春縣

德化縣

永寧衛、福泉、金門、中左、高浦、崇武、五所俱附見

漳州府

屬縣十

龍溪縣 附郭

漳浦縣

龍巖縣

長泰縣

南靖縣

漳平縣

平和縣

詔安縣

海澄縣

寧洋縣

鎮海衛六熬銅山元鍾三所附見

東南皆據海。

東北自浙江溫州府界西南至廣東潮州府界大海迴環約二千里福興泉漳四郡福寧一州皆列峙海濱互為形援。

西抵粵東。

閩之西南境與廣東潮州府相脣齒水陸二途皆為捷徑。

北距嶺嶠。

閩亦稱嶠外地自浙江衢州處州而南江西廣信建昌贛州而東南皆有崇山峻嶺紆回結曲不特仙霞一道為北面之巨障也。

其名山則有武夷。

武夷山在建寧府崇安縣南三十里有黃亭山麓始於此又四十里乃入武夷其山綿亘百二十里有三十六峯三十七巖 又嶺洞泉石之屬得名者復數十計 一溪繚繞其間分為九曲 道書以為第十六洞天 漢郊祀志有武夷君即此山

之神也。宋劉斧曰：武夷山東南枕流水，一水北至，一水西來，湊大王峯前，合流爲建溪。其山東望如樓臺，南盼如城壁，西顧如庑廡，北眺如車蓋。峯巒巖岫，四十餘所，峭拔奇巧，高下相屬，吞吐雲霧，草木蒙茸，寒暑一色，岸壁紅膩，稜壘可愛。朱子曰：武夷峯巒巖壑，秀拔奇偉，清溪九曲，流出中間，兩岸絕壁，往往有枯槎插石罅間，又有陶器之屬，頗疑前世道阻未通，川壅未決時，蠻俗所居，而漢所祀者，卽其君長歟。今從溪而入，第一曲爲大王峯。

在山東南一名天柱峯，亦曰仙蛻巖，方圓十里，高五千丈，一面向東瞰北溪，一面向南瞰西溪。

峭壁緣崖，上哆下銳，峯之東

麓有昇真洞，西有鐵板嶂。

石色蒼黑，劖削如板，盤迴數百丈。

絕頂爲投龍洞。

志云：洞門甚小，纒纒百二十丈，乃至水。宋嘉熙元年，投金龍玉簡於此，旁有天鑑池。

峯之北又有

幔亭峯。

一名鐵佛嶂。

甚奇勝。又有仙鶴等巖，第二曲有玉女峯，在溪南，亭亭姝麗，旁有馬頭、凌霄、虎嘯等巖。

第三曲有小藏峯。

亦在溪南。

高峙峻拔，中有小藏巖，一名仙船巖，峯背爲仙機等巖，第四曲溪南有大藏峯。

高峙千仞，下臨深溪。

志云：溪南又有李仙巖，一名燈窩巖，其前爲御茶園，中有泉，舊於此製茶，上供。元時設馬官二人，掌茶園百有，所明初有司董之，嘉靖中罷，李仙巖後又有雲巖石室，可容百許人。

溪北對峙

者曰車錢峯，旁有昇日諸峯，參差錯立，第五曲有隱屏峯。

在溪北。

夷上銳下，凌空峭立，高廣方正如屏，兩

麓坡陀環抱，朱子築精舍於其處，峯之右又有接笋峯，北有玉華巖，皆勝奇。

志云：溪南有小隱屏，與隱屏峯對，一名紫石巖，今名晚對峯，因朱子

晚對亭
而名

第六曲有天游峰。在隱屏之後。外高敞而內幽邃。其右爲仙掌峯。穹崖壁立。高廣百餘仞。旁有

瀑布泉。

夾流下注。名仙浴池。

溪之南有城高巖。山形高峙。長亘如城壁。第七曲有三仰峯。三峰聳拔相連。形若仰首。

中有碧霄洞。小桃源。諸勝。第八曲有鼓子峰。有石如鼓。其前爲鼓樓。巖後有三層峯。尤高峻。旁又有天

壺等巖。第九曲盡處曰靈峯。一名白雲巖。壁立高峻。常有雲氣氤氳。其右爲毛竹洞。甚幽邃。溪南爲齊

雲。火焰。諸峯。又有靈巖。崖壁削成。頂甚平曠。有石洞三。中一洞深廣。風從中出。謂之風洞。

一云靈巖之東。爲攬石峯。亦高。

聳。在第二曲虎嘯峯之南。去九曲差遠。

山之背有丹霞嶂。石色丹赤。雄峙若城。綿亘層疊。長數萬丈。高稱之。其東曰水簾洞。

道書

謂之唐曜洞天。

水在石壁瀉下。隨風飄灑。疎密不定。如垂簾然。聲若金玉。流合溪水。溪源發於武夷西北二十

餘里之三保山。

流至黃村溪。經星村市。

瀑迴曲折。出石鼓渡。合大溪。遊九曲者。舟每從東汭流而入。西出將村。而境

始窮。南麓則臨石鼓渡。北止於黃村溪。兩崖峯巒。率皆豐上。歛下。奇變萬狀。神剗鬼刻。駭目驚心。唐六

曲。江南道名山。武夷其一也。

梁山。

梁山在漳州府漳浦縣西南三十里。廣東大埔縣西北二百里。一名高昌山。高千仞。盤亘百里。有九十

九峯。亦名梁岳。古記梁岳。閩中之望也。爾雅南方之美者。有梁山之勝覽梁山秀麗而崇圓。故亦名圓山。名

山記。山峯凡十有二。唐開元中。鍾紹京作尉是邑。始增爲二十有四。其中峯曰蓮花峯。一名齊帝石。以

齊武帝曠避兵揭陽時。曾遊賞此峯也。南齊書武帝仕宋爲贛令。晉安王子助其最高者爲獅子。金剛。二峯。二

之外。曰力士。曰雙髻。曰長劍。曰七星。曰八柱。曰觀日。曰臨海。曰晉亭。曰青閣。與蓮花共爲。明偉唐梁山翠峯三

十二峯。又有雙鳳王乳。錦石月桂。壽星。紫雲。金雞。丹竈。香爐。諸山之名。則後人所增益也。詩人吳明偉又云。

十六。蓋峯嶺環列。各以意言之耳。山之中。紆折回旋。有田。有村。有溪。溪之名。有長源溪。錦溪。萬頃溪。仙

溪。盛溪。錦石溪。垂玉溪。龍潭溪。分流灑道。互相縈繞。志云。山東南盤石上有穴如井。水泉湧出。大上有水晶坪。產

水晶。元大德元年。福建平章高興言。漳浦地產水晶。當發民採之。以資國用。因遣內監採取。明朝亦嘗

命鎮守內官採焉。又有中峯巖。瀑布泉。並稱名勝。志云。山之西。接盤陀嶺。叢薄崎峻。盤亘可十里。郡舊

志。盤陀嶺卽宋葵岡嶺。漢時爲南越蒲葵關。閩粵通道也。漢元鼎五年。漢擊南越。東越王餘善以兵從。至揭陽。以宋

潘存實云。梁山根蟠楚蜀。作鎮甌閩。西南形勝。山爲最著矣。海風波爲解。及漢破番禺。還擊東越於蒲葵關。卽此。

大姥。

大姥山在福寧州東北百里。高十餘里。周四十里。

舊名才山。力牧錄云。黃帝時。容城先生嘗棲此。王烈蟻桃記。堯時有老母居此仙去。因名大母山。漢武帝命東方朔校天下名山。又改母

為姥。唐開元中。特圖其形。勅有司春秋致祭。乾符四年。勅建興國寺於山麓。

舊志。唐咸通中。林嵩建草堂。讀書其中。因名草堂山。通志。嵩蓋宋真宗時

人。又云。王闕嘗封此山為西嶽。三山志。闕封高

蓋山為西嶽。童山為東嶽。未嘗封此山也。

其山千峯林立。秀拔得名者三十六峯。志云。宋初僧師待圖山之奇峯。十二。林陶次第其名。為新月。多窳

諸峯。後人復增摩霄。仙人掌。等峯。為三十六。近代好事者復增益之。為四十五峯。又巖石谿谷泉洞之屬。其得名者以百計。

絕頂為摩霄峯。

相傳大母上昇時。乘九色龍馬摩霄而上。因名。

東西北三面皆海。秋

霽遠眺。可盡四五百里。雖浙水亦在目中。自摩霄而下。千巖萬壑。瑰音靈異。不可悉數。大約東北諸山。

大姥為之冠矣。

其大川則有建江。

建江亦曰閩江。亦曰建溪。至延平府境。亦曰劍江。至福州府境。亦曰西江。往往隨地立名。實同一建江

也。其源出建寧府浦城縣北四十里漁梁山。繞流經縣城南。達縣西。

或曰。建溪之源。出自楓嶺。今楓嶺南里許有分水關。梨嶺北麓之水。楓嶺南麓之水。會流

經此卽建溪上源也。按水流環通。仙霞以南之水東流則歸於處郡之大溪。西流則歸於廣信之永豐溪。而南流大都歸於建溪。漁梁嶺路之極南爲衆流所匯之地。從其易見者而言。遂謂建溪出於漁梁也。楓嶺梨嶺俱見浦城縣。

經灘澗中引

而南。凡一百八十里。曰水吉鎮。爲建陽縣界。又五十三里。曰雙溪口。而崇溪之水流合焉。崇溪源出建

寧府崇安縣西北七十里分水嶺。流經崇安城東南。又南納武夷九曲之水。歷建陽縣城東。一名錦江。又亦名西港。

東南至雙溪口。而合於建溪。並流而南。八里爲葉坊驛。又四十五里而達建寧府城西。遶城南而東。松

溪之水亦流合焉。松溪源出浙江慶元縣西南二十里松源山。入建寧府界。經松溪縣城東北。引而南。

政和縣境之水。亦流入焉。謂之東溪。至府城東。而合於建溪。舊志建溪之源凡三。一出浦城。一出崇安。一出松溪。三源而下凡五派合流。是謂建溪。今考上遊之水自西北

來者皆匯於建溪。三源五派亦概言之。又南行四十里。曰太平驛。又四十五里。爲房村舖。又十里。曰大橫驛。又三十里。爲黯淡

灘。又五里至延平府城東南。而西溪流合焉。西溪上源。一出邵武府光澤縣西北九十里之杉關嶺。謂

之杭川。南流至邵武府城北。合樵溪、紫雲溪諸水。流入延平府順昌縣境。合順陽諸溪。至縣城南。合將

樂縣之將溪。又東至沙溪口。合沙縣之沙溪。將溪、沙溪卽汀州府大溪之下流也。大溪發源汀州府寧

化縣山中。流經縣東南。又東歷清流縣東南境。而爲九龍灘。又東分二流。一自歸化縣東北流入延平府將樂縣界。謂之將溪。經縣南。至順昌縣城

南合於順陽溪。一自延平府永安縣東北流，經沙縣南，謂之太史溪，亦名沙溪。又東北出沙溪口，而合於順昌諸溪。其下復合，共引而東，謂之西溪。又東至延平府城西，繞出

城東南，而合於東溪，謂之劍江。又東南四十里，曰吉溪口。又十八里，曰茶陽驛。又三十二里，曰尤溪口。

尤溪縣之水，自此北合於建江也。又十五里，曰樟湖坂。又十二里，曰蒼峽巡司。又二十里，為黃田驛。入

福州府古田縣界。又五十里而至水口。自水口已上，達於浦城，計程幾六百里。灘石嵯峨，縱橫林立。舟

行罅隙中，灘高水急，略無安流。溪船輕脆，石齒堅利，稍或不戒，沉溺及之矣。相傳始於浦城，迄於水口。

諸灘之有名者，以三百計。然至險者，亦不過數處。曰將軍灘。在浦城縣南十里。和尙灘。俗名阿彌陀佛灘。在建寧府北六十五里。黯澹灘。在延

平府北大傷灘。在延平府東南十八里。大灣灘。在水口北二十里。其最著者也。次則火燒灘。在浦城縣南三里。倒亂灘。在浦城縣南百十里。大小羅灘。小羅

灘在浦城南百十三里。樹林灘。在大羅灘南二里。又三里即大米灘。菱角灘。去大米灘三十里。梨灘。在建寧府北十五里。箭孔

灘。在延平府東南六十五里。梅花灘。在箭孔灘南六十六里。亦時有摧溺之慮。而汀邵二溪，又有九龍。在清流永安二縣界最險。三門虎口。在延平府西境。諸

灘之險，其水工非熟於水道，輕捷夙成者，則節節皆險耳。夫閩江本無正流，大約疏鑿山峽而成。上流

地高水迅，易於淺涸。居民往往積石壅水，為灌溉及水碓之利。山水驟發，輒衝激為患。灘險比下流較

多其下流水勢益盛。灘益大而險。淫潦時。波濤洶湧。勢若懷襄。旬日不雨。則石墜磷磷。淺狹處可褰裳涉也。水口灘險已盡。而列石江中。參差數里。水勢震盪。勢猶洶洶。出水口則江流浩衍。以風阻爲虞矣。繇水口而東五十里曰小箬驛。又東十里曰閩清口。又四十里曰白沙驛。自白沙而下。分爲兩枝。其自東而南者。二十里爲竹崎所。又四十里曰芋原驛。又東南至府西十里曰洪塘浦。又東南流二十里曰南臺江。又東南流五十里爲馬腸江。其自南而東者。經府西南六十里曰陽崎江。折而東二十里曰西峽江。復東流二十餘里會馬腸江。府境諸水俱會流於此。以達海。蓋自西北而東南。橫亘三郡之中。幾千餘里。爲津梁之要會。自劍溪東下福州。水路縈紆。幾數百里。而水勢湍急。可以朝發夕至也。陳天嘉五年。章昭達自東興嶺趨建安。東興嶺見江西南城縣討陳寶應。寶應據晉安建安二郡。水陸爲柵以拒之。昭達與戰不利。因據上流。命軍士伐木爲筏。施拍其上。會大雨江漲。昭達放筏衝寶應水柵。盡壞之。寶應繇此敗滅。五代漢乾祐三年。南塘劍州帥查文徽。遣劍州刺史陳誨將水軍下閩江襲福州。會大雨水漲。一夕行七百里。抵福州城下。史作七百里。悞也。自劍州至福州四百里。敗州兵。整衆鳴鼓。止於江湄。蓋順流漂急。勢莫能禦也。

海。

海在福建爲至切之患。漢元封初，伐東越，遣橫海將軍韓說出句章。句章見浙江慈谿縣浮海從東方往，遂滅閩越。

三國吳建衡初，遣軍自建安海道與荊州之師會於合浦。合浦見廣東廉州府以擊交趾。陳天嘉四年，章昭達自東

興度嶺。東興嶺見上趨建安，討陳寶應。詔余孝頃督會稽、東陽、臨海、永嘉諸軍自海道會之。昭達敗寶應水

柵，諸軍方攻其步軍。孝頃自海道適至，因併力乘之。寶應敗滅。隋開皇十年，泉州王國慶作亂，自以海

路艱阻，不設備。楊素泛海奄至，擊平之。五代漢初，吳越遣將余安自海道救李達。達即閩叛將李仁達時據福州爲南唐所攻遂

有福州。宋德祐二年，張世傑等共立益王昞於福州。蒙古將阿剌罕自明州海道來襲，福州旋陷。明初

討陳友定，亦命湯和由明州海道取福州。八閩悉定。洪武十九年，倭氛告警，乃命江夏侯周德興經理

閩海，置烽火。南日、浯嶼三寨於海中。正統九年，以侍郎焦宏蒞其事，則遷烽火。南日於內地。景泰二年，

尙書薛希璉出而經略，又遷浯嶼水寨於夏門。議者以爲棄其藩籬矣。是時雖增置小嶼、銅山二寨，沿

邊衛所鎮戍之設，漸加密焉。而奸商釀亂，勾引外夷，自潮州界之南澳及走馬溪、舊浯嶼、南日、三沙一

帶，皆爲番舶所據。浸淫至於嘉靖二十七年以後，禍乃大發。論者謂東南之倭亂，閩實兆之也。自是審

斥堠，嚴會哨。寇去之後，猶亟亟不敢懈焉。蓋列戍於海上，而哨守於海中，不易之法矣。說者曰：海中島

嶼東南錯列以百十計。但其地有可哨而不可守者。有可寄泊而不可久泊者。若其最險要而紆迴。則莫如彭湖。蓋其山周遭數百里。隘口不得方舟。內澳可容千艘。往時以居民恃險爲不軌。乃徙而虛其地。馴至島夷乘隙。巢穴其中。力圖之而後復爲內地。備不可不早也。又海中舊有三山之目。彭湖其一耳。東則海壇。西則南澳。皆並爲險要。守海壇則桐山。流江之備益固。可以增浙江之形勢。守南澳則銅山。元鍾之衛益堅。而可以厚廣東之藩籬。此三山者。誠天設之險。可或棄而資敵歟。其重險則有仙霞。

仙霞關在建寧府浦城縣北百二十里。北至浙江江山縣百里。本江山縣地。關南三十八里有楓嶺。則閩浙分疆處也。巖嶺相接。紆迴雄峻。南北經塗。皆出於此。今詳見浙江重險。

杉關。

杉關在邵武府光澤縣西北九十里。西至江西建昌府百二十里。有杉關嶺。置關其上。爲江閩往來之通道。說者曰。仙霞之途。紆迴峻阻。其取之也較難。杉關之道。徑直顯露。其取之也較易。閩之有仙霞。杉關。猶秦之有潼關。臨晉。蜀之有劍閣。瞿塘也。一或失守。閩不可保矣。元至正十九年。陳友諒兵陷杉關。侵福建。二十五年。太祖遣胡琛攻陳友定。克浦城及松溪。分遣朱亮祖自廣信出鉛山。王溥自建昌出

杉關會兵討之。二十七年，胡廷瑞收江西，進取福建，自建昌入杉關，克邵武路。蓋閩中西偏之要害矣。

明朝正統十四年，賊鄧茂七據杉關攻

光澤，既而順流南下，閩中多爲殘破。

按福建之地，海抱東南，山連西北，重關內阻，羣溪交流，雖封壤約束，而山川秀美，福州一郡，居然都會。

說者謂溫、處、衢、信。

信江西廣信府。

閩之北藩也。建昌、南贛、閩之右壁也。惠、潮、閩之西門也。大海、閩之東戶也。建

寧一郡，北當仙霞，虞、浙、江之突入，西瞰分水，慮江右之交馳，東帶松溪，防礦賊之竊發，是誠全閩之頭目，保護不可或怠者也。邵武迫近建昌，杉關之衝，恆由不意，而汀、漳二郡與南贛、惠、潮鄰接，山谿曠邈，奸宄逋逃，易生釁孽。且漳州南控島嶼，其民險巖，往者倭奴流突，大率漳郡之人爲之嚮導，不可不折其萌矣。福寧一州，屹峙東北，溫州南下，此其最衝。夫以閩之封壤，而四境之間，敵皆可乘，乃欲高臥無患，真千古必無之事也。

讀史方輿紀要

卷九十六

福建二

福州府

東至海岸百九十里，南至興化府二百八十里，西南至泉州府五百里，西至延平府四百有五里，北至福寧州五百四十五里，自府治至京師六千一百三十三里。

禹貢揚州之域，周爲七閩地，秦置閩中郡，漢初爲閩越王國，元封初，平閩越，屬會稽郡，後漢因之。

通典後漢

置侯官都尉，屬會稽郡，似未可據。

三國吳屬建安郡，晉太康三年，始置晉安郡，宋因之。

志云：元嘉中，改昌國郡，又云：泰始四年，改晉平郡，今宋志亦不載。

齊梁亦

云晉安郡，陳兼置閩州，尋廢，後又置豐州，隋平陳，郡廢，改州曰泉州，大業初，復曰閩州，三年，又改建安

郡，唐武德六年，仍曰泉州，景雲二年，改曰閩州。

并置中都督府，督閩、泉、漳、潮五州。

開元十三年，又改爲福州。

依舊都督府，仍置經略使，二十

三年，改督福建汀、泉四州。

天寶初，曰長樂郡，乾元初，復爲福州。

新唐書：至德二載，置經略軍，寧海軍於城內，元和六年廢，又元和中，置福建觀察使，領福、泉、汀、建、漳五州，乾寧三年，升爲威武節度使，以授王

潮。

五代時，王氏據有其地。

梁貞明六年，升爲大都督府。

唐長興四年，閩主王延鈞升爲長樂府，晉開運二年，王延政號

為南都。時延政并有閩地也。南都一作東都。三年，屬於南唐。明年為吳越所取。

仍曰福州威武軍。周廣順初改曰彰武軍。

宋仍為福州。

亦曰長樂郡威武軍。

景炎初

升福安府。元為福州路。明朝洪武初，改為福州府。今領縣九。

府西阻重山，東帶滄溟，南望交廣，北睨淮浙，亦東南一都會也。然而延、建諸郡控我咽喉，福寧一州扼

我項背，興、泉諸郡伺我肘腋，揚帆突至，則有海道之虞。踰險颯馳，實切上游之懼。封疆不可憑，山谿不

足恃，國門以外皆戰場也。三山之險，誠不在近郊，而在四境矣。宋蔣之奇曰：八閩之地，長樂郡名為冠，以

其地肥衍，民殷富，而濱海足以自固也。噫，是豈折衝之長策哉。

閩縣

附郭。在府治東南。漢置治縣。屬會稽郡。後漢時廢。建安初置侯官縣。三國吳屬建安郡。晉太康三年析置原豐縣為晉安郡治。沈約云省建安典船校尉置也。宋齊時屬晉安郡。梁曰東侯官縣。仍為郡治。隋郡廢復改縣曰原豐。開皇十二年又改為閩縣。自是

州郡皆治此。五代唐長興四年，王氏改為長樂縣。清泰二年復舊。晉天福六年復曰長樂。吳越得之，仍曰閩縣。宋因之，今編戶百八十里。

侯官縣

附郭。在府治西南。漢為治縣。後漢末曰侯官縣。晉屬晉安郡。宋為郡治。齊因之。梁陳間省入東侯官縣。唐武德六年復析置侯官縣。八年省。長安二年復置。元和三年又廢。五年復置。五代唐長興四年，王氏改為閩興縣。清泰二年復舊。宋因之，今編戶百

福州城

志云。故治縣在府治北。吳錄云。越勾踐治鑄處也。亦曰安民王治。或以爲閩越王治鑄處。非是。漢初閩越國都治。蓋因舊趾。而名武帝平閩越。徙其民於江淮間。後有遁逃山谷者。稍復出。因立爲治縣。治漢志譌作治。或謂之東治。後漢志不載治縣。相傳建安初。置侯官縣。史亦未載也。三十國春秋。孫策攻會稽太守王朗。朗戰敗。浮海至東治。策追擊。大敗之。侯官長商升爲朗起兵。策尋遣兵討平之。是建安初已有侯官縣也。侯官蓋卽治地矣。孫休永安三年。黜其兄會稽王亮爲侯官侯。於道自殺。是年置建安郡。縣屬焉。晉又析侯官地置原豐縣。爲晉安郡治。通考。閩越王無諸開國都治。依山置壘。據將軍山。歐治池。以爲勝。晉太康四年。太守嚴高以故城狹隘。將移於白田。渡嫌非南向。乃圖以香郭璞璞指越王山。南小阜曰宜城。於此。卽今郡子城也。梁陳間。爲東侯官縣。隋唐爲閩縣。州郡皆治此。城邑考。今府城。唐中和間。觀察使鄭銍修拓郡城。東南隅。城北起小阜。南至虎節門。東起康泰門。稍西至宜興門。東南至定安門。西南至清泰門。是曰子城。文德元年。觀察使陳巖復修築。天復元年。節度使王審知築重闕於虎節門外。名鎮闕臺。又名龜門。宋祥符中。改曰還珠門。俗呼雙門。又於子城外築羅城。設大門八。便門九。水門三。南利涉門。一名福安門。東南通津門。俗呼青樓門。東海晏門。一名清平門。俗呼雞鴨門。東北延遠門。一名通遠門。北永安門。一名濟川門。西北安善門。西豐樂門。一名善化門。西南清遠門。初以豐樂門爲子城。與清遠門接。故中間又有金斗門。五代梁開平元年。審知又築南北夾城。謂之月城。南大門一。累甃設懸門外。便門六。水門二。濬河以通湖。北大門二。便門二。一云南月城大門二。曰登庸。曰道清。北月城大門二。曰道泰。曰嚴勝。舊志云。南寧越門。卽今南門。東南美化門。又東設水關。亦名水步門。北嚴勝門。劉宋時。有嚴勝者居此。好施於人。而名也。卽今北門。西北昇山門。至宋政和間。改爲遺愛門。以元絳爲郡守。有德政而名也。西迎仙門。卽今西門。蓋有六門云。石晉開運三年。南唐將陳覺自劍州遣兵襲福州。攻其西關。爲李仁達所敗。唐主遣王崇文等會兵進攻。克其外郭。仁達固守第二城。旣而福州降將馬捷引唐兵自馬牧山拔寨而入。至善化門橋。州兵拒之。仁達退保善化門。外城再重。皆爲唐兵所據。唐兵尋復進據東武門。內外皆絕。明年。城入於吳越。東武門卽海晏門也。閩主曦所改。宋開寶七年。刺史錢昱又築東南夾城。南自合沙門。西至怡山門。東自行春門。北至湯井門。又東南有通仙門。東北有船場門。是曰外城。合沙門一名光順。

門在寧越門之南。太平興國三年。錢氏納土。詔盡燬其城。皇祐四年。詔漸次修治。熙寧二年。郡守程師孟據子城舊基修築。復增拓其西南隅。八年。郡守元積中鑿以重甃。紹興初。郡守程邁始發石累子城虎節。安定豐樂。康泰四甕門。設敵樓其上。咸淳九年。嘗增築外城。元至元中。復墮廢。至正二十四年。陳友定稍繕完之。明朝洪武四年。駙馬都尉王恭因舊址修砌以石。六年。增修北跨越山。由樓曰櫺樓。即今鐘海樓。東南西南則因外城遺址。繞九仙烏石之麓而圍之。城周十九里有奇。成化十九年。風雨摧壞。尋復營葺。嘉靖三十八年。亦嘗修治。今有門七。南門即故夾城寧越門也。北門故北夾城嚴勝門也。東門舊外城行春門也。西門舊北夾城迎仙門也。東南仍曰水部門。東北曰湯門。即湯井門也。西北曰井樓門。即故船場門也。又舊時子城羅城。夾城外城皆有濠。今城有水關四。其水源一自南嶺東北江屋開河口通湖北流。自水部門水關入城。一自洪塘江引流。經西禪浦。山西門水關入城。築迴曲折。流繞城中。南北門。湯門。二水關。以洩城中潦水。又城東西南皆有濠。北面連山。不通水源也。

侯官故城

府西北三十里。後漢末。置侯官縣。或曰府西境梁改置東侯官縣。以侯官并入焉。唐武德中。復析閩縣置侯官縣。蓋治於此。逼臨江滸。貞元五年。為洪水漂沒。八年。遷入州郭。今故址名侯官市。亦曰侯官關。五代晉開運二年。南塘陳覺攬命攻

福州。自劍州緣江東下。李仁達將楊崇保帥舟師拒之。覺等敗之於侯官。乘勝進攻福州。西關為仁達所敗。此侯官也。

懷安廢縣

在府治西北。本閩縣地。宋太平興國六年。析九鄉置懷安縣。初治芋原。江北三十里。咸平二年。移治石屏。廣故驛為縣。治東南去州城二十五里。元至元二十二年。遷於縣西。尋復故。明朝洪武十二年。移入郭內。萬歷八年。并入侯官縣。

越王山

在府城北。半蟠城外。東聯冶山。一名屏山。以形若屏。屨也。亦曰平山。又名泉山。以山有天泉池也。閩越王都治山前麓。故曰越王山。其東南麓。唐時有左衛宣毅。廣節。諸營。故亦名將軍山。西麓曰馬牧山。即南唐攻福州時。白馬牧山拔砦而入處也。

山之南有歐冶池。相傳歐冶子鑄劍處。池周數里。今多湮。閩志。冶山在郡城東北。其高阜曰將軍山。蓋即越王山支隴矣。○九仙山在府城內東南隅。今名於山。相傳漢武時有何氏兄弟九人登仙於此。因改今名。一名九日山。閩中記。無諸九日宴集之所也。

上有鼈頂峯。又有平遠臺。平曠可以望遠。又烏石山。在府城內西南隅。與九仙山東對峙。唐天寶八載。改曰閩山。宋熙寧間。郡守程師孟。改曰道山。有薛老峯。鄰霄臺。諸勝三山皆在城中。故郡有三山之名。

鼓山

府東三十里。延袤數十里。郡之鎮山也。山之南麓。屹峙江濱。爲戍守要地。頂有巨石如鼓。因名。其最高者爲大頂峯。一名芳巖。峯正東可望海中。又有小頂峯。與大頂峯相去二里。其餘峯頂巖洞之屬。稱名勝者。不可勝記。○東山在府東十里。舊有東山

寺。陳天嘉二年。虞寄避陳寶應之亂。居東山寺。陽稱足疾。是也。山有獅子峯。榴花洞。諸勝。又金雞山。在府東三里。相傳秦時以望氣者言。嘗鑿此山。其相近者曰茶園山。山南爲寶月山。皆在平原中。五代唐長興二年。王延稟自建州。襲攻其主。鱗鱗將王仁達。伏兵殺其子繼雄。延稟走。至是被執。又府東二里曰長樂山。本名白馬山。王閩時改今名。

釣臺山

城南九里。崇阜屹立。俯瞰大江。舊記。漢東越王餘善於此釣得白龍。以爲己瑞。因築壇。曰釣龍臺。後人呼爲越王臺。今亦名南臺山。建江經此。曰南臺江。五代周顯德三年。南唐建州帥陳誨。敗吳越兵於福州南臺江。明初湯和自明州渡海攻福州。

奄至五虎門。駐師南臺。福州遂下。今爲塵市。山去江百餘步。○平山在府東南三十二里。志云。城東南三十里有鳳山。鼓山之支隴山。其東爲平山。宋少帝航海時。駐兵於此。剗平其頂。因名。又羅星山。在府東南五十里。馬江中。登之。百里內諸山皆在左右。爲遠近奔流之砥柱。又南五里曰大象山。其山巍峩廣大。爲城南之巨障。有峯曰銀峯。下瞰馬頭江。江之南曰白田山。即晉嚴高欲遷城處也。又九龍山。在府東南六十五里。九峯插天。狀若龍騰。下有潭。潯通馬頭江。

方山

府南五十里。端方如几。城南望之。勢若五虎。一名五虎山。高千仞。四面如城郭。其峯曰天柱峯。跨閩侯二縣界。元末陳友定遣兵駐守。今谷口有砦門。甚隘。其中平曠數頃。溪流屈曲。登山有石梯嶺。路僅尺許。懸崖斷壑。削如羊腸。行數里而達山巔。爲福

州巖。平坡一望。遠近諸山。皆若培塿。山陰又有靈源巖。多橘柚。唐天寶中。賜號甘果山。舊志。方山羣峯百六十。巖嶼之屬得名者。復十餘處。其西麓小山曰仙崎。亦曰陰崎。與陽崎隔江對峙。元吳海云。建江別流。南循方山。以會於長澗。臺江。舊有浮橋。延祐中。

削石橋以濟行者。然淫雨泛溢。鳳岡百里。輒爲巨浸。新墜。陽墜。爲江流四折之衝。舟濟者又有隄風漂溺之患。鄭君潛適寓瓜山。營二舟。一自白苗濟陽墜。一自新墜濟陽墜。行旅便之。謂之義渡。里人謂之鄭公渡。新墜。陽墜。卽陰崎。陽崎也。方山之西。又有瓜山。以三巒如瓜而名。又西曰古靈山。羣峯奇峻。一名大帽山。又名席帽山。有石室。甘泉。諸勝。○雲門山在府東南七十里。多松竹。泉石之勝。

壽山

府東北六十里。產美石。瑩潔柔潤。蓋珉也。距山十餘里有五花石坑。以石有五色而名。其並崎者曰芙蓉山。秀麗若芙蓉。別麓有洞。曰靈洞。巖甚深邃。亦曰芙蓉洞。又有九峯山。在城北五十里。有嶺曰長箕嶺。一名長岐嶺。又名桃枝嶺。路出羅源。古田二縣。志云。山峯頂九出。圓秀峭拔。與芙蓉。壽山並稱三山。又東室山。在府東北三十里。志云。古戰坂也。五代晉開運中。南唐兵與李仁達戰於此。○蓮花山在府北二十里。下圓上銳。形若齒。郡之圭山也。五代唐同光三年。閩王審知卒。葬鳳池山。長興三年。改葬蓮花山。其相近爲西室山。亦秀拔。又北有梧桐嶺。甘蔗生焉。五代晉天福四年。閩人作亂。王昶出北關。至梧桐嶺。爲衆所殺。卽此。又西有拜郊山。相傳閩越王播柴處也。志云。府北十五里。爲昇山。一名飛山。相傳越王勾踐時。山從會稽飛來。今有飛來峯。其西爲鳳池山。又南爲五峯山。旁連大鵬山。聯翹高聳。稍南爲羅峯山。石晉天福二年。方士言於閩主昶。有白龍夜見。此昶因作白龍寺。又城北有龍腰山。卽越王山之北麓矣。

雪峯山

府西百八十里。高四十里。盤踞侯官羅源。古田。閩清。四縣境。舊名象骨峯。王閩改今名。有鳳凰岡。烏石嶺。諸勝。最高者曰雙巒。四面回環。岡隴層疊。未冬或雪。盛夏無暑。水西勝處也。○旗山在府西五十里。逶迤欹側。亘十餘里。高數百仞。與鼓山東西相望。郭璞建州紀。右旗左鼓。全閩二絕。是也。山之南麓。曰太平山。十國紀年。王延翰葬於此。又石門山。在府西六十里。兩崖壁立。中貫清溪。有石門峽。大江泛漲。數爲田廬患。萬歷十八年。侯官令周兆聖。塞之而患息。下有小阜。曰超山。山下有十四門橋。以灑水。十有四道而名。

五虎山。府東百里大海中有五虎門與江口相接。明初湯和由海道取福州處也。山下爲官母嶼。巡司置於此。相近者有浮江山。亦曰文筆山。對峙者曰王埔山。居民皆以捕魚爲業。又瑛琦山亦在府東海中。一名羅崎山。其旁又有清洋福斗諸山。

北嶺

府北三十里。路通連江縣。懸崖而躋。高幾千丈。宋嘉祐三年。侯官令樊紀夷高直曲。培凹續陷。嶺失故險。今爲往來通道。又北行十餘里爲湯嶺。亦險峻。○常思嶺在府東南百二十里。高數百仞。袤三里許。一名相思嶺。閩縣東南盡處也。又東南至福清

縣六十五里。爲接境處。又鳳岡在府西南。濱建江。志云。江水環繞處。爲村阜三十六。而鳳岡最著。岡首起城南三十里。尾盡城西二十里。居民遍植荔枝。多至數百萬株。

海

府東南二境皆濱海。唐志。閩縣東五里有海隄。太和三年。縣令李茸築。先是每六月潮水鹹鹵。禾苗多死。隄成。潛溪水殖稻。遂成良田。又海防考。福州境內有閩安。鎮東定海。關下娘媽宮。濂澳。鑑江館頭。小埕。牛田。東營。後瀝。松下。大小社。諸處皆海口。登犯之

衝而備禦之所也。

閩江

府城西南七里。自建寧延平二府境。流經古田。閩清二縣界。復東南流。至府西北八十里之白沙驛。亦曰馬瀆江。亦曰螺女江。雪峯山以東諸溪之水。皆流合焉。南流分二派。一派自北而東。歷侯官市。至芋原驛。濱江有石罌山。亦曰石罌江。又南至府西

七里。曰洪山江。亦曰洪塘江。經城南七里。曰金鎖江。又南經釣臺山下。曰南臺江。亦曰白龍江。又東南經鼓山下。而東出滙爲馬頭江。一派自西而南。經府西南三十里。高蓋山。又南至方山北。曰淘江。亦曰瀨江。又名黃江。亦名黃岸江。循山西麓。又南至仙琦山。曰仙琦江。亦曰陽崎江。亦曰湯岐江。復折而東。流二十餘里。曰峽江。經府東南五十餘里。接馬頭江。又東爲環琦江。至五虎門。以入於海。志云。馬頭江爲閩縣極南界。西北衆流悉入焉。風濤洶湧。中有巨石。形如馬首。隨潮隱見。爲行舟患。大抵閩江上流至馬瀆。漸廣而緩。馬頭當衆流入海。處勢尤浩瀚也。餘詳大川建江。

西峽江

府東南六十里。受永福縣印溪之水。流經此。接仙崎江。又東流十餘里。東峽江亦流合焉。東峽即南臺下流也。亦曰峽江。兩山夾峙。上合諸水。下通潮汐。闊十餘里。其深叵測。中流有石如砥柱。名浮焦石。下有潭龍潛。其中俗謂之烏龍江。又東十餘

里。即馬頭江矣。○上洞江在馬頭江北岸。南岸又有下洞江。又有大定江。在南臺江南岸。又澤苗江。在陽崎江西岸。原出永福縣。府西北沿溪。涑溪之水皆流入焉。東注陽崎江。志云。府東南又有演江。源出山谷間。一名峴源。又有涑江。在府西南。即黃岸江也。

江濱有巨石橫浸。亦名蘇崎。爲濟渡處。皆流合大江。

大目溪

府西北五十里。出古田縣界。其南爲小目溪。出永福縣界。皆西北流。注於馬濱江。○桐溪在府西北三十里。俗謂之洞口。其相近有陳塘溪。俱流通大江。又沙溪在府西北二十里。流經芋源驛。入大江。中有沙湧成洲。因名。又黃石溪在府西北經白

沙驛。入大江。舊志以爲出江。蓋卽石岡江上流也。

蒙溪

府東北五十里。源出連江縣界。又有仁溪亦出焉。西流經府北。入於洪塘江。又黃溪出府北黃巖山。西南流。注延澤浦。亦入洪塘江。○吳山溪在府西南三十里。源出永福縣之印溪。下流入陽崎江。又義溪在府東南七十里。出福清縣界。達於西峽江。

西湖

府西南三里。晉太守嚴高所鑿。引西北諸山溪水注之。周十餘里。又有東湖。在府東北三里。亦嚴高所鑿。引東北諸山溪水注之。周二十里。二湖與海潮汐通。引流溉田。爲利甚溥。唐貞元十一年。觀察使王翊。又開南湖於城西南五里。廣二百四十步。接

西湖之水。潮於東南。後王審知於子城外環築羅城及南北夾城。皆取土於西湖旁。湖周至四十里。閩主鏐因築壑爲水晶宮。周圍十餘里。又引湖水入宮。爲浴馬之所。障其流爲清水堰。宋慶歷間。東湖漸淤。西湖亦爲熙寧中郡守曹穎叔。程師孟相繼修築。嘉祐二年。蔡襄復請濬治。淳熙中。趙汝愚復請濬西湖。上言。西湖舊接濬而通南湖。儲蓄灌溉。旱潦濟洩。民享豐年之利。自爲蠶綠者。障塞旱潦。皆害乞於農隙。稍尋其舊。從之。繼復建閘其上。因舊名曰澄湖。明朝萬歷中。亦嘗疏濬。作水關以通水。中有孤山。

築亭爲勝。其後日就淺隘。志云。昔時西湖蓄水置閘。灌民田千五百餘頃。與東南兩湖俱有宣洩之利。宋末。東湖漸塞。南湖遂堙。今西湖亦同池沼矣。又有石湖。在府東。陳湖在府南。今皆湮塞。

洪塘浦

府四十里。舊志云。浦自石梁。江東經巖瀆。至柳橋。以通舟楫。唐貞元中。觀察使王翊所開。今浦湮。其浦口亦名萬安山口。今有洪安橋。成化中建石梁二十餘門。萬歷以後。屢經修葺。爲津梁要會。有洪塘稅課局。國初置。又西禪浦。在城西南。其地有

怡山。亦曰西禪山。浦經其下。卽洪塘江之水。引流而東。爲

三十有六曲。經城西。爲西南城濠。又分入西水關處也。

白蝦浦

在府南。五代漢初。南唐閻李仁達於福州。吳越將余安自海道赴救。至白蝦浦。海岸泥淖。布竹箬而前。旣登岸。奮擊南唐兵。大破之。或曰白蝦浦卽白龍江別名也。又有直瀆浦。畝從江岸開。河口通潮。北流至故海晏門。爲濬橋浦。又北通於東湖。今

亦廢。郡志。南臺江。舊白河口。引而北。繚繞三十有六曲。爲城南濠。分引自水步門。水關。宏治中。鎮守內臣鑿新港。遂失故轍云。○

腎浦在府東南。昔時近城水渚處也。州人多就浦鱖魚。故名。石晉開運三年。南唐兵閻李仁達於福州。仁達求救於吳越。吳越兵

至。自腎浦南潛

入州城。卽此。

甘蔗洲

府西北二十五里。橫亘江心。居民皆種蔗爲業。稅課甚豐。又芹洲。在府西南。澤苗江西岸。湍流迅急。壅而成洲。周迴二十餘里。居人隱然。園圃洲多。產芹。故名。又名瀛洲。以其四面有水如瀛洲也。○投桃洲。在府東南。馬頭江中。其形如桃。上有田數

畝。千

閩安鎮

府東四十里。有巡司。洪武二年置。爲城東面之險要。海防考。海水潮汐。與馬江。匯於閩安鎮。有兩口。一東出雙橋門外。遶

壑江。五虎。一南出瓊瑤門外。遶廣石梅花。閩安爲江海之鎖鑰。而會城之門戶也。嘉靖中。倭寇突犯閩安。參將尹鳳擊敗之。

賊由此突犯福清縣。今仍爲戍守處。又有閩安稅課局。與巡司同置。○五虎門官母嶼巡司。見上五虎山。亦洪武二年設。

五縣砦

在府西北五十里。有巡司。元置。明朝因之。志云。司舊屬懷安縣。接閩縣。侯官。古田。閩清。凡五縣界。因名。又竹崎巡司。在府西北六十里。濱江。正統六年置。○古嶺砦。在府東。有兵戍守。爲濱海之備。志云。閩縣東有塘頭。塘灣。翁崎。等民城。皆嘉靖中創

築。以捍

倭寇。

三山驛

在府治西南。府西北二十里。曰芋源驛。又西北六十餘里。曰白沙驛。又西北六十里。至小箬驛。以小箬溪名。又四十五里。接古田縣之水口。驛皆建江所經之通途也。○柔遠驛。在水部門外河口。稍北。爲進貢廠。明初建爲外國使臣館寓之所。又大

田驛。在府南百里。義溪水經其旁。又南四十

五里。至福清縣之橫路驛。南出興泉之道也。

萬壽橋

在府南。跨南臺江上。長三百餘丈。石梁水門三十有九。元大德七年建。明朝成化後。屢經修葺。俗名大橋。郡境之橋。以十百丈計者。不可勝紀。萬壽橋與洪山橋尤爲雄壯云。○陽崎渡。在府西南五十餘里。卽鄭公渡也。萬曆四十年。按臣陸夢祖以

峽江渡險。改官道。出此。明年。以路不便。乃復用舊道。舊有陽崎稅課局。明初置。里道記。今從南臺二十里。至吳山。有公館。又南至雞母嶼。置一浮橋。由雞母嶼渡江。抵蕭家道。登岸。又有公館。自此達大田驛。

長樂縣

府東南百里。南至福清縣百里。北至連江縣百二十里。隋閩縣地。唐武德六年。析置新寧縣。是年改曰長樂。元和三年。省入福唐縣。五年復置。仍屬福州。五代梁乾化元年。王氏改曰安昌。唐同光初復舊。長興四年。又改侯官曰閩興。而以縣爲侯官縣。三

年復故。宋仍屬福州。

今編戶百十五里。

新寧舊城。縣南十餘里。相傳縣初治此。後移今治。城邑考。縣城明朝宏治三年築。嘉靖三十二年始增拓之。三十七年復增修。崇禎十四年復營治。城周七里。有奇。

六平山。縣治北一里。蜿蜒六曲。旁有四明石臺二山。又北曰石首山。巔有巨石巍然。又南山在縣南半里。稍西曰登高山。南山之南有五峯並峙。曰五馬山。又南有三峯山。○七巖山在縣西南三十里。上有七巖。其北則諸山環峙。圍繞如城。亦曰羅山。其地

亦名羅城。相近者又有溪湄山。頂有湖。廣五畝。冬夏不竭。謂之珠湖。志云。七巖山之北。最高者曰牛壟山。四面小山環抱。中有平田百餘畝。

越王山。縣東北三十里。山高聳。周迴三十里。相傳越王無疆之後居此。因名。其旁巖嶺稠疊。迤北最高者曰太常山。左接壽巖山。並

爲聳突。太常之陽有嶺曰風門。陰有嶺曰浮崎嶺。凡三十六灣。接閩縣界。○龍泉山在縣東南二十餘里。中有臥牛。仙冠。品石。梯雲。蓮花。共五峯。並高聳。其南又有翠峯連接。最著者曰福湖山。又屏山在縣東南四十里。挺秀千雲。又東南十里曰靈峯山。其麓曰龍齋山。一曰天池山。與屏山競勝。志云。縣東又有鶴嶺。西通縣治。東由雲洞大路。達文石梅花等處。爲北鄉一帶咽喉。

御國山。府東七十里。蹲峙海濱。高出雲表。巖如捍衛。夷舶入貢。每視此爲準。俗呼平角山。又有鍾門山。在海中。當舟行之道。有小嶼如鍾。○壺井山在縣東六十里。濱海。山垂有一井。狀如壺。潮至則鹹。潮退則淡。上有巖石聳峻。俯臨滄海。名百丈巖。其旁峯

巒巖嶼。名勝不一。迤東則羣山錯峙。又有王母礁。在壺井

山南。二礁對峙海中。宋末楊妃負福王益王航海時經此。

海。縣北五里。又縣東南。東北境皆濱海。山港澳。嶼。回環爲險。海防考。縣西北岡安鎮。五虎門。諸處實爲省城門戶。東北广石。梅花所突入海中。與連江縣定海所相對。亦省城右臂也。自梅花至松下巡司。中歷十一澳。皆東沿大海。波濤衝激。並岸水淺。寇船難近。

獨松下漸南。與福清接壤。廣浙商船。往往泊此。海壇包其東南。亦有觀音澳。蘇澳。可以暫憩。故松下之備宜豫。新唐書。縣東十里有海堤。唐太和七年。閩邑令李茸築立十斗門。以禦潮。且爲旱澇之備。於是境內遂成良田。宋時嘗因舊址修築。

馬頭江

縣城西北半里。自閩縣流入境。江面益闊。又東北與大海相接。波濤震撼。乘舟入郡。常虞風潮之阻。志云。由縣城西北入馬江。曰太平港。舊名吳船頭。相傳吳王濞造船處。似愷蓋吳越遣兵入閩。嘗泊舟於此也。明朝永樂中。太監鄭和由此入海。改

曰太平港。又梅花江。在府東北五十里。近梅花所城。亦曰梅江。亦曰梅花澳。嘉靖三十八年。倭賊犯會城。旋自洪塘江出洋。參將尹鳳追敗之於梅花外洋。卽此。又北曰广石江。亦曰广石澳。宋末陸秀夫張世傑奉二王從此入閩。安鎮處也。相近者又有後山

澳。皆與大海相吞吐。○松下江在縣東南三十里。東通大海。西通福清縣。亦曰松下澳。相近者曰大社。小社。龍下等澳。又壺井江。在縣東壺井山下。亦曰壺井澳。又東北有磁澳。江中有孤山峙海中。分東西南北四澳。可避風。海舟常泊此。志云。府東有冷嶼澳。

又東有仙岐。漳港。門口。黃岐等澳。

又有漳坂澳。皆海潮洄湫處也。

大溪

縣東南三十里。源出福清縣境。分流至此。縈紆數里。溉田數百頃。東流入海。又社溪。在縣東南四十里。海濱。志云。源出福清縣之鏡嶺。流至小社澳入海。○三溪在縣南。亦出福清縣界。一名鼎溪。志云。縣南有星溪。亦名獵溪。又有中溪。沙坂。後洋溪。縣東

又有龍下。大社。宏源。諸溪。東北有觀音。

資聖。黃弄。竹林等溪。下流入於江海。

元祐港

縣東南三十里。宋元祐中。令袁正規以縣境田多窪下。因鑿港以道溢水。流通漳港。以入於海。因名。其相近有卓嶺港。舊亦入漳港。元大德初。濬入縣東四十里。陳塘港入海。志云。陳塘港。宋末陳文龍築田砌塘。因名。水源自海花山而下。會東西濱

闊湖。并七十二洋之水。下流達海。又縣南有沙京港。

亦名曾塘港。又有嶺柄等港。皆引水溉山下流入海。

嚴湖

在縣東北。一名西湖。陳大建初。里人嚴光捨田鑿此。周三千二百八十丈。亦名放生湖。中有小阜。曰蟹山。後漸堙。明朝正統十年。縣民劉彥良言。本縣嚴湖周圍二十餘里。南接稠庵溪。西通倒流溪。旱則引稠庵溪入湖。溉田。雨則疏倒流溪。以防其漲。近

者湖岸坍決。溪流湮塞。不能積水防旱。雨至田或湮沒。又有張塘涵。塘前涵。大塘涵。陳塘港。其利弊亦如般湖。乞敕有司疏濬。爲民便從之。未幾復廢。又濱澗湖。亦在縣東北。唐天寶五載。沙合爲陂。大歷中。里人林鷗因捨田成湖。周千三百餘丈。灌漑民田。後侵復不一。隆慶四年。復舊。崇禎八年。又復爲湖。其相近又有林婆湖。亦天寶五載。沙合而成。周三百五十丈。與濱澗相通。○延祥湖在縣南三里。宋元時故址。明朝正統中。修濬深廣。潮汐往來。可通舟楫。又南數里有桃枝湖。舊周五百餘丈。五代時。王闔所鑿。今名桃坑湖。又南有橫嶼湖。亦唐宋時故址。周三百餘丈。今故址猶存。

松下鎮

縣東南三十五里。有巡司。洪武初。置於福清縣海口。二十年。移置於此。爲長樂之咽喉。福清之門戶。嘉靖二十七年。倭賊自松下突入海口。澳登陸。攻福清之鎮。東衛官軍力戰。乃遁去。三十九年。議築城。未就。崇禎中始成之。周二里有奇。有門四。水關一。稍東北有旗山濱海。置烽火於此。又小社巡司。在縣東二十五里。崇禎六年。移置於大社澳。南去舊治數里。○石梁。燕山巡司。在縣東三十里。舊置於梅花所城內。洪武二十八年。遷於此。旁有蕉山濱海。因名。東有磁澳。爲倭寇出入之衝。嘉靖三十八年。議拓寨置城。隆慶三年。始就。周二里有四門。又壘下城。在縣東南二十餘里。嘉靖四十年。居民築此以備倭。周一里。

黃崎寨

縣東北四十餘里。志云。縣有仙崎寨。广石寨。東山寨。與黃崎爲把截四寨。又有大社捍寨。近大社澳。俱爲濱海之備。○錦橋在縣東南。跨元祐港上。宋淳熙十二年。建石梁十五間。長五十丈。又於橋西築海爲地三畝許。以固橋道。亦名石梁橋。

福清縣

府東南百二十里。東北至長樂縣百里。西南至興化府百二十里。本長樂縣地。唐聖歷二年。析置萬安縣。天寶初。改曰福唐。五代梁開平二年。王氏改爲永昌縣。唐同光初。復曰福唐。長興四年。王氏又改曰福清縣。志云。石晉天福七年。避隴改福唐曰南臺。蓋不知閩之改爲福清而遙改也。宋仍爲福清縣。屬福州。元曰福清州。明朝洪武四年。復爲縣。今編戶百二十三里。

福清故城

縣東南二里。明朝嘉靖三十三年始置城於此。三十七年復增築。旋陷於倭。萬曆二十一年議改城於西北三十年。益徙而西。去舊址四百丈。城周六里有奇。

靈鷲山

縣治北。縣之主山也。亦曰鷲峯山。其巔曰玉屏峯。稍西曰金翅峯。葉向高遷城記略。嘉靖甲寅。以島夷毒闖。始議築城。時師環其疆。倉皇舉事。北傳高山。西跨岡巒。東逼陵阜。賊登阜而攻。若對壘焉。從東望西。周垣畢睹。我之虛實。較若列眉。戊午之

變。賊據北山。俯而瞰城。每發輒斃。日未移晷。萬室蕩然。論者咸爲城咎。萬曆癸巳。宰邑者乃更闢而城之。跨北山而蓋其上。移西城山之半。包圍縈澗。縮東城避阜。爲臺以當敵衝。而城始可恃云。○玉融山在縣治南五里。以山石融澗而名。西爲雙旌。以兩峯峭立如旌也。東爲五馬。以五峯騰躍如馬也。其東麓曰覆釜。亦以形似名。

瑞巖山

縣東二十里。山多巖洞。諸勝又郭廬山。在縣東南二十里。近時改曰福廬。相近者曰覆巖。並稱奇勝。巖石回環。幾數十里。山下有午田場。嘉靖三十四年倭攻鎮東衛。參將戚繼光大破之於此。又東數里曰東營山。周環皆海。亦嘉靖中戚繼光大破賊處。○龍山在縣東二十餘里。一名瑞峯山。海口鎮東二城在焉。巔有石塔。可觀海口。又烽火山。在鎮東城西。海道有警。燔燧於此。山頂嵌巖。其狀如屋。凡三十六間。名曰虎屋。其旁又有鹿角山。山有仙井。深不可測。又東爲網山。去海口三里。居民網罟處也。相近者曰鍾山。志云。鎮東城東有拱辰山。三峯並起。勢皆北拱。俗呼牛角山。山下有石洞。風出其中。深杳難入。相接者又有龍臥山。斂石山。皆並海。

石竹山

縣西二十四里。山多竹樹。青葱插天。巖洞泉石。奇勝林立。無患溪出其下。志云。石竹山下有宋時軍寨。又西有古屯軍。亂時邑人屯守之所。又瓜山在縣西四十里。宋末邑人林同與劉屯祖共起義兵。元兵至。迎戰於此。敗沒。志云。山近磨石舖。連延諸山。皆稱西山。○覆石山在縣西南二十五里。其山磅礴百里。峻拔千仞。層林蒼翠。飛泉漱玉。有三峯九疊之勝。又黃蘗山在縣西南三十里。上多蘗木。有十二峯。層巖飛瀑。周圍數十里。其勝者曰龍潭。乳香巖。

白嶼山

縣南百里海濱。一名鍊田山。絕頂有鴻休巖。巖竇天成。下瞰滄溟。浩無涯際。昔有僧鴻休者居此而名。其相連者曰雙嶼。以二山突起海中也。中有井。甚甘冽。旁有山曰璧頭山。又金山在縣東南百里。居民繞山麓。而前後左右皆海也。又東南十里曰萬石山。巖洞瓊壺。洞之廣者可容萬人。而千百人者不可數計。又南數里。即萬安所城矣。

海壇山

縣東南七十里海中。周七百餘里。其山如壇。南北長而東西狹。上多雲氣。亦名東嵐山。唐牧馬地。後漸有寺宇。宋初置牧監。尋以鷺驛罷。皇祐中許民耕墾。淳熙中有三千餘戶。其山南曰黃崎。曰紫闌。曰牧上。曰砦頭。曰沆頭。曰大小鼈網。有三十六派。湖環繞峯巒如畫。宣和以後大雨雹。湖皆決入於海。近塢有大小場。澣頭及錢藏。皆爲泊船澳。迤東高者爲軍山。王氏時謫戍多居此。其間曰浚門。曰懶步。曰廣州堤。曰流水。隔東江曰小牆。小墘北曰十二藍焦。東牆北曰白兵焦。大桑。小桑。兩桑間曰桑門。而兩牆間爲鷓鴣門。是外極東之島。而舟不可行矣。迤南有南厓里。亦曰南厓嶼。舊產鹽。宋於此設巡司。其北有沙澳。亦曰蘇澳。又有沙溪。行一日皆沙。而澳當海口爲寨。又五里西抵鍾門。亦曰鍾山嶼。玲瓏如鍾。菰蒲四圍。海水鹽鹵。而此泉獨淡。近嶼石高二丈。狀如媪。東南瞰石方二十丈。其中井泉與潮候應。取水者集焉。亦船舶之都會也。半潮抵磁澳。則爲長樂縣界。又有草嶼。唐嶼皆近於南厓。南厓阨隘。且風多不宜樹。一曰大姨山。當日未出時。極望有如空青微露水而爲小琉球國。海水深碧。東流不返。莎蔓如組。柁不容轉。必剝木爲孟。乃能旋開。浮沙以濟。暴風不夙避者。往往漂至於此。中國人爲其所得。以藤貫其足。令之耕作。故此山昔忌夜火。恐其國望之而來也。是爲東角洋。蓋岐海之窮微矣。又有支山。曰水馬山。有石如舟帆。亦名石帆山。相近者曰霸前。曰金崎頭。此海壇之西麓也。海防略。海壇山盤踞聳峙。迤出海上。故元時民戶嘗滿四萬。多以魚爲業。中有四湖。相傳嘗產龍駒。湖之東羣山環互。不可勝紀。外隔小琉球。三晝夜內通海口。至縣僅一湖。中間以村名者。百有餘處。陂湖潭澳。不一而足。其著者曰葫蘆澳。多魚。碧沙洋。產人參。其百花砦。鍾門。三鎮。街衢圍圓。景物繁多。真海表名區也。明初遣江夏侯祝海防倭。尋以衛弁李彝欺妄。詔虛其地。惟以小墘水砦。官兵汛守。隆慶初始添設海壇遊兵。萬歷中復命增設水砦。與興化府南日砦相形。援後復

廢弛○小練山在縣東海中。旁有大練。小練二門。五代以後。居民環集。商賈輻至。號小揚州。洪武二十年。與海壇同徙。志云。小練山周十里。舊多喬林。其大小練二門。相去僅十里許。無風。踰月不能渡云。

蒜嶺。縣西南五十里。以山形如蒜瓣而名。一云以山石間多產蒜也。登其巔。東望漲海。瀾漫無際。舊有照海亭。○螺嶺在縣西北六十里。與閩縣接界。色黛如螺。北瞰方山。其西有五周。七仙諸巖。又西有仙舉巖。峭拔千仞。與永福縣接界。志云。螺嶺西北又有

傀儡嶺。在驛路旁。又石尤嶺。在縣北二十五里。薛山嶺。在縣東北五十里。俱接長樂縣界。

海。縣東五十里。志云。縣東南至海百五十里。南至海百二十里。而海壇。雙嶼。諸嶼。爲汎守要地。又縣東近境之海。謂之九海。以港嶼曲折也。其外爲大海。

龍江。縣東南十里。其上流爲縣城南之龍首河。匯諸溪而東南。廣五里。初名螺文江。宋邑人林栗改今名。下流合海口。江。志云。海口江在縣南十五里。源出舊興化縣。流爲百丈溪。至縣西三十里。金應舖。合無患溪。東流二十里。合石厓溪。又東至水陸寺。合東溪。至河頭。瀆。爲琵琶洋。龍江入焉。又東十餘里入海。縣東百餘里有海口寨江。近海壇山北。源出長樂縣界。石尤嶺分水而下。注江達海。又有南匿江。在縣東南二百九十里。海壇山下。流出莆田縣界。東流入海。

逕江。縣南三十里。志云。江源有二。一出故興化縣界。金支大澤。合漁溪。一出黃蘗山北。過鐵場邊北流。並漁溪。合逕港。南至綿亭。東抵烏嶼門。又南至雙嶼頭。復岐爲二。東出白嶼。西出後嶼。南流復合。由迎仙港入於海。嘉靖三十八年。倭賊自海壇山入犯。移

屯上逕。官軍搗破之。即逕江上流也。○松林江在縣東。去海口鎮五里。東流入海。

漁溪。縣西南四十五里。源出黃蘗山。流合蘇溪。蘇溪在縣西南四十里。源出莆田縣界。流入境。合漁溪。匯於逕江。又蒜嶺溪。在縣西南。蒜嶺下。亦曰蒜溪。志云。縣南有迎仙港。源出舊興化縣。有桃源水流。合焉。至迎仙市。爲子魚灣。歷縣西南。黃茅墩。合蒜溪。又

東會逕江出江口入海。○交溪在縣西十里。源出西北六十五里之常恩嶺。東南流。其別源出縣西二十五里之盡窠。東流合焉。經城西。爲西溪。南入龍首河。又無患溪。在縣西宏路驛前。亦曰大溪。源出石竹山。流合交溪。又虞溪。源出縣西北齋嶺。南流經盧山。曰盧溪。亦流合交溪。皆爲龍首河之上源。

海口鎮

縣東十里。宋里人林遷。叛建有城。亦曰海口鎮。民城。周四里有奇。明朝嘉靖三十四年。倭寇來攻。以城壞爲倭所陷。尋改築之。自是倭夷屢犯鎮。以城堅得免。志云。鎮東北倚龍山。鎮南二里。卽瑞巖山也。元置海口務於城內。明初改爲海口稅課局。

井置河泊所於此。又有海口場鹽課司。元延祐六年。建本名司。明初改爲運鹽分司。洪武二十年。改鹽課司。又牛田場鹽課司。在縣東南三十里。建置同海口鹽課司。○化南鎮在縣東南六十里。有民城。嘉靖中築。以禦倭。鎮北野里曰化北鎮。澤朗巡司。置此。相傳隋時掠琉球五千戶居此。因名。又沙塘鎮在縣南五十里。有民城。隆慶間築。志云。縣西南有運上鎮。宋置運口務。元因之。洪武初改爲運口稅課局。十八年。圯於水。因自水南移於水北。又有南門稅課局。在城南龍首河北。元置南門務。明初改。

壁頭山鎮

在縣南百餘里。壁頭山下。志云。元置於南日里。名南日巡司。明朝洪武十二年。移置於此。今改名。又牛頭門巡司。在縣東南百里。元末置於逕江口。名逕江巡司。亦洪武十二年。移置此。改今名。又澤朗山巡司。在縣東南七十里。元置於練門。名

練門巡司。亦洪

武十二年。移改。

松下寨

在縣東北五十里。接長樂縣之松下巡司。濱海捍寨也。志云。縣境自東而南。有平北里。有平南里。沙塢連盤。長沙峯頭與松下爲七寨。外有松關。永平。白鶴峯頭大坵。牛頭等六砦。舊皆設兵戍守。

宏路驛

縣西北三十里。北去閩縣之大山驛四十里。南至蒜嶺驛四十里。又南六十里。至興化府。○龍首橋在縣南門外。宋天聖五年。創建。長四十丈。名曰通海。元祐二年。復建梁於其南。長二十二丈。改名坦履。紹興二十年。又續爲梁。長十六丈。三橋共長

八十丈。改今名。自元以來。不時修築。又龍江橋。在縣東南十五里。宋政和三年建。爲梁四十有二。長百八十餘丈。名螺江橋。尋改曰永平。又更今名。○無患橋。在去路驛東南。宋熙寧七年建。明朝成化十九年。修長二十有九丈。又化龍橋。在縣西南四十里。跨漁溪上。宋嘉祐七年建。名萬安橋。後修毀不一。乾道初。更

今名。明朝成化十九年以後。再經修治。長十五丈有奇。

連江縣

府東北九十五里。南至長樂縣百二十里。東北至羅源縣百二十里。漢治縣地。晉太康四年。以溫麻船屯置溫麻縣。屬晉安郡。宋齊因之。隋省入閩縣。唐武德六年。復分置溫麻縣。是年移置於連江之北。改今名。今編戶三十五里。

溫麻城

在縣治東。晉置溫麻縣。蓋在今福寧州境。後廢。唐改置於此。旋曰連江。舊無城。嘉靖十八年創築。萬曆十四年增修。二十七年洪水衝壞。尋復修治。周四里。

龍滌山

在縣治北。縣之主山也。岡巒如龍。滌水夾澗而下。有潭曰五峯潭。山北五里曰湖山。高秀出諸峯之上。志云。縣西一里有玉泉山。巖洞甚勝。稍北又有鳳凰文筆。諸山城。西又有白塔嶺。王審知入閩。其先鋒陳伯先追賊至此。馬踣而死。○覆釜山在

縣東南二十里。巔有巨石。狀如覆釜。其傍峯巒環峙。南麓有

二石相對。道出其中。曰石門。相近又有玉華洞。清陰洞。諸勝。

荻蘆山

縣東南四十里。一名九龍山。下有荻蘆峽。亦名九龍江。俗傳秦始皇以東南氣王。自江而南。山秀拔者皆鑿之。鑿此得蘆根。長數丈。斷之流血。因名。宋淳祐二年。置荻蘆寨於此。有水軍千人。亦曰武濟水軍。○馬鞍山在縣東北五十里。山勢逶迤。達

於海上。有雙巒連聳。狀若馬鞍。東有三德山。三峯並列。下瞰海門。舊名三台山。亦曰筆架山。志云。縣北四十里有香爐山。其形聳秀。上有童井。雖旱不涸。道書以爲七十一福地。

上竿塘山

縣東北八十餘里。大海中峯巒屈曲。有竹尾湖尾等六澳。又有下竿塘山。突出海岸。山形峭拔。與上竿塘並峙。中有白沙鏡港等七澳。洪武初。徙其民於內地。三山志。上下竿塘大小亭山。桑嶼。關嶺。蛤沙。北菱嶺。俱在縣東北海中。相近又有拱

嶼澳嘉靖三十五年倭賊犯縣官軍擊却之賊夜遁由拱嶼澳出洋是也。

海。縣東二十里志云縣東南至海三十五里與長樂縣接界其與潮汐吐納者則官塘洋荻蘆峽黃岐堡鷓嶼諸處也而定海小埕皆爲戍守要地。

連江。在縣城南一名鼈江源出羅源縣黃土溪黃蘗潭及舊懷安縣桃洲之密溪三派合流而東至縣前環抱如帶東流入海亦名岱江江濱有海海潭跨江有橋宋政和間建疊石爲梁凡十六間長五十丈六尺俗呼江南橋。

周溪。在縣西南又縣南有竹溪縣西有利坑溪皆流入鼈江有灌溉之利又財溪在縣東南下流入海亦有灌溉之利○東塘湖在縣東南隋開皇中邑人林堯捨田爲湖周圍二十里歲久沙壅唐咸通間縣令劉夔嘗奏復之今遺址僅存。

北菱鎮。縣東北百十里西北至羅源縣八十里本名荻蘆鎮宋時水砦蓋設於此元爲荻蘆巡司洪武二十年改今名并置城於此與定海相爲唇齒嘉靖二十七年倭賊流劫北菱官軍禦却之是也又蛤沙鎮在縣東北五十里崖石峭立如壁洪武十六

年置河泊所於此二十年置城於此亦爲戍守處○閩安鎮在縣西南二十五里與閩縣接界。

小埕寨。縣東百二十里海中明初置籌海說小埕北連界於烽火南接壤於南日連江爲福郡之門戶而小埕又連江之門戶嘉靖三十五年倭賊自流江突至小埕水寨遂犯會城蓋汎防要地矣又光臨里砦在縣西南亦明初置有兵戍守○延祥水砦

在縣東南宋福州水軍有延祥砦蓋置於此。

通濟橋。在縣治南跨鼈江上宋政和四年累石爲梁凡一十六間長五十六丈有奇淳祐間改修明朝因舊址修葺又有安利橋在縣西南舊名潘渡宋紹興十四年建橋尋壞乾道三年重建累址十九長六十五丈名惠政橋後改曰安利橋寶慶三年改

建亦名

潘渡橋

羅源縣

府東北百五十里。西南至連江縣百二十里。西北至古田縣百三十里。東北至福寧州寧德縣八十里。本唐連江縣地。大中初。置羅源場於此。咸通中。又割懷安地益之。置永貞監。後唐長興四年。王閔升為永貞縣。宋天禧五年。改永昌縣。乾興初。又改今

名。明朝嘉靖三十七年。始築城。萬曆

七年。鑿以石。周三里。編戶十六里。

鳳山

縣治北。山勢聳起。兩翼如張。因名。又北三里。有文殊山。上有翠玉峯。○蓬花山在縣南一里。巖石層疊。下臨城市。又西諸山林。立。西南五里。曰金鐘山。相連者為鐵障山。又巖山在縣東之濂澳。山形如簾。遮護居民。又東諸山環峙。下臨海濱。其峙海中者。

曰金螺障。與

楊梅灣相對。

仙茅山

縣東北十里。兩山相連。曰大茅。小茅。巖石甚勝。又北五里為洞宮山。峯巒錯立。其著者為五馬峯。又東北有寶勝山。黃沙溪。出焉。○四明山志云。在縣西隅。一名毒火山。山有四峯。又萬石山在縣西北。一名破石山。山多異石。茂林修竹。左右映帶。又

松崎山在縣南六里。其相

近者曰鶴嶼。對峙江中。

海

縣東北十五里。又東南接連江。至海二十五里。灘澳淺僻。不利登涉。故縣境之防禦為畧。通志。縣東北至大海。蓋二百里也。

羅川

在縣城西。源出縣西境蔣山。接金鐘潭。流經四明山下。合四明溪。又南流分三派。曰中溪。曰南溪。曰後張溪。流經松崎山。達於海。亦謂之松崎江。○黃沙溪在縣東。又有九龍起步等溪。皆流達於松崎江。又環溪在縣治南。其東會南北二溪。濼迴環繞。亦

注松
崎江。

霍口溪

縣西四十里。源出古田縣境。流入縣界。又南入連江縣境。注於鷺江。○龍湫。在縣西南金鐘山下。又一在縣南福源山。兩山相去二十里。而泉脈相通。

應德鎮

縣南二十五里。與連江縣接界。爲往來通道。應德舖設於此。志云。縣東北五十里有南灣。巡司。元置於連山。後徙於此。明初廢。又有四明驛。宋建炎三年。置於縣西二里。元至正中廢。

古田縣

府北二百八十里。東至福寧州百五十里。西至延平府二百二十里。西南至尤溪縣一百里。西北至建寧府政和縣三百二十里。本侯官及尤溪縣地。唐永泰二年。析置屬福州。劉昫曰。開元二十九年。開山峒置。悞也。宋因之。明朝宏治十三年。始築縣城。

西北跨山。東南濱溪。周七里。有奇。編戶五十三里。

古田廢縣

縣西南三十里。宋太平興國五年。徙縣於水口。就津陸之要。即今水口鎮也。端拱中。復還舊治。今爲水口驛。東南至府城百八十里。延津上游。此爲鎖鑰之口。志云。宋遷縣後。設監鎮官。泄此。元革。今驛運分司設焉。有浮橋橫於江津。朝夕驗放。

亦曰水口關。白水口而上五里。有塔。嶺亭。西往南平。北往古田。分岐於此。

翠屏山

在縣治北。以形似名。縣之主山也。舊名環屏。又城東有龜山。其東麓曰金仙嶺。石磴盤曲。登之可以望遠。○北巖山。在縣西一里。高聳如臺。又西爲黃巖山。上有寶峯。峯下有小湖。湖東爲桃溪。以其地多桃也。旁有桃塢。又有桃洲。

五華山

在縣西南。五峯連峙。峭拔千仞。一名大仙山。亦曰大佛嶺。又極樂山。在縣西北。山後有巖。曰仙巖。又北曰鳳神峯。最高秀。相近者曰天宮嶺。覆舟嶺。俗名福全嶺。曰石崎嶺。層次相接。○鼓山在縣東百里。其西有旗山。又有馬山。在旗鼓之間。又北有

杉洋山山多

竹可爲楮

牛頭嶺

縣東北十里。嶺高而峻。陟降二十餘里。又有清風嶺。在縣西南百里。接延平府界。○摸天嶺。在縣東南二十五里。紆迴峻絕。南濱大江。縣陸路趨延津者。道出於此。石磴崎嶇。最爲艱險。

建江

縣南二十里。自延平府流入縣界。經水口驛。灘石錯立。至是而盡。建江經此。始出險就平。又東入侯官縣境。

大溪

在縣城南。溪有二源。俱自北來。至縣南合流。委蛇澄澈。其平若鏡。二溪夾流。縣治東西。因亦名雙溪。又南爲蒿溪。羣溪之水皆匯焉。又南會於建江。謂之水口溪。上有松溪館。江頭往來之通道也。志云。水口爲羣溪滙合之處。亦曰困溪。有關曰困關。水流

寬平。無灘石之阻。故上下舟楫。恆泊於此。○東溪在縣東。又有感溪。亦曰錦溪。甘溪亦曰藍溪。與縣西之西溪。縣南之瀨溪。俱瀝於大溪。志云。縣境諸溪得名者。以十數計。而東溪爲之長。合流後里許。有石灘橫截中流。亘東西岸。奔流觸石。如鳴珮玉。舊名洪

瀨。宋景德間。縣令李堪改爲鳴玉

灘。并置驛於此。紹興七年驛廢。

洗馬池

縣西北六十五里。池周數十畝。聞見錄。出古田北門三十五里。至西溪。又三十里。至洗馬池。又西北五十里。地名山頭。又四

十里。曰上滌。又西三十里。卽建寧府城東門矣。雖山谿環錯。而路徑稍寬。可策馬而前也。又從洗馬池而西三十里。地名南

吉。又經池口。鐵場。大壩。諸處。卽至延平府之吉溪。洗馬池蓋當二郡之間道云。

杉洋鎮

縣東四十里。有巡司。南至羅源縣百八十里。洪武十二年建。志云。杉洋地出銀坑。多鑛盜。舊設捕盜館。并郡司馬分駐於此。後廢。尋復置。又谷口巡司。在縣西南九十里。宋大中祥符五年。置於水口鎮。爲水口巡司。元移於此。改曰谷口。明朝因之。正

統間廢。又西溪巡司。在縣之西溪。宋置。元因之。明朝洪武十二年廢。○南鎮砦。在縣西百四十里。石晉天福三年。閩主曦之弟延政據建州。攻南鎮軍。敗之。福州西鄙戍兵皆潰。胡氏曰。時閩主增置軍於福州。建州之界。遣將杜漢崇監其軍。以扼往來要路。故爲延政所敗。

水口驛

即廢古田縣。宋時曰嵩溪驛。元改今名。明初因之。遞運所亦置於此。又西南五十五里爲黃田驛。宋時曰使華亭。元改今名。明初因之。又二十里曰倉峽巡司。接延平府界。○石平橋。在縣治東南。宋建尋廢。明朝宣德間。再建復圯。成化十五年重修。

爲石墩十有一。覆以亭五十六間。又萬安橋。在縣南。元建。明朝永樂中燬。成化十五年重建。尋構亭四十七間。

閩清縣

府西北百二十里。北至古田縣百五十里。西至延平府尤溪縣百七十里。南至永福縣九十五里。本侯官縣地。唐貞元初。析置梅溪縣。五代梁乾化元年。王氏改曰閩清縣。仍屬福州。宋因之。縣無城。今編戶七里。

臺山

縣西南一里。山勢平衍。其狀如臺。縣之主山也。又南有鍾南山。上有盤谷巖。○大湖山。在縣東十里。山椒有湖。約半里許。縣東北又有鳳凰山。形如翔鳳。

鼎峯山

縣西二十里。有雙巖。梅溪環流其下。其西曰檀峯。以大檀名。北通尤溪縣界。又西曰白雲山。山勢最高。林木蒼蔚。白雲吞吐。中有仙峯巨石。○大帽山。在縣西南四十五里。接永福縣界。一名大帽仙峯。志云。縣南有龍都白巖。高數百丈。常有雲霧環繞。

又有烏石巖。在縣西南巖險峻。登其巔。衆山皆見。又縣西有百丈嶺。輿程記。自嶺至尤溪縣百里。

建江

縣北十里。自古田縣界流經此。爲往來之通道。梅溪之水。流合焉。謂之閩清口。

梅溪

縣西五里源出永福縣山中東北流經縣西又北入建江江水濁而溪水獨清故縣以閩清爲名又置疊溪在縣西南三十里源出永福縣界流入梅溪又演水溪在縣西二十里源出尤溪縣界流入境亦注於梅溪

青窰鎮

在縣東有巡司元置明初廢又縣南濱溪有稅務亦元所置也○疊口橋在縣西置疊溪口爲往來之通道

永福縣

府西南百二十里東南至興化府百八十五里西南至泉州府德化縣二百五十里西北至延平府尤溪縣二百四十里本侯官尤溪二縣地唐永泰二年析置永泰縣屬福州新唐書咸通二年析連江及閩縣地置懷也宋崇寧初避哲宗陵名改曰永

福縣明朝嘉靖三年始築城萬曆十七年

改築城東北隅周不及四里編戶九里

摩笄山

在縣東北縣之主山也志云由摩笄泝流而上三十餘里一起一伏爲筆架山至極樂巖有洞石之勝由巖而下岡脈連絡猶蜂腰鶴膝行六七里峙爲圓阜號曰仙掌牛坡迤邐自東北來爲縣前弧矢山東有展旗山常溪之衝襟帶環抱聳秀可

愛

陳山

縣南十里中有石龍山山如龍形循山之脊爲路俗呼登石龍通福清則溪爲十八灣通興化則山爲十八摺又斗湖山與陳山並峙上有四湖亦名倒湖湖旁有田○六洞仙山在縣南六十餘里山極高秀相近有大張山穹窿盤礴傍列羣山

高蓋山

縣西南六十里峯嶺秀聳常有紫雲覆其上一名紫雲山拾級而上巨石如牆道出其中峯巒泉石種種奇勝其最著者爲玉華峯安玉巖王閩時常封爲西嶽志云山之最高者爲龍都峯其下雙崖對峙拔起千仞宛若洞門有三石室峯之頂曰

白巖其別峯曰金支山以泉色如金也又觀獵山在縣東八十里舊傳越王常觀獵於此元

宋故總管王翰避地山中開元亡白盡因亦名官烈山巔有鴈湖地高水深與雪峯山相望

方廣巖。縣東北二十里。峭拔千仞。上有石室。可容千人。縣東南又有曹溪巖。上摩蒼空。下臨深澗。巖有微徑。仄足而上。登其巔。一望無際。又白鶴仙巖。在縣北二十五里。極高秀。有瀑布懸流。又玳瑁峯。在縣西北七十里。卽閩清縣之大帽峯。音譌也。

大樟溪。縣東五里。源出德化縣。流入境。又東入侯官縣界。爲澤苗江。上流支流曰印溪。俱東行三十餘里。入陽崎江。或謂之漳溪。又龍嶼十八溪。在縣西北。源出福清縣界。流經縣之龍嶼。逶迤盤曲。凡十有八折。流入大樟渡。合大樟溪。○雙溪在縣南三里。

越峯山下有二源。一曰西溪。一曰南溪。一云出縣西南山中者。曰狄口溪。

出縣西北十七里。瑞峯山者曰滌溪。合流爲雙溪。會流而入於大樟溪。

鑑湖。在縣東北。一名冲澗潭。清深莫測。志云。縣治東有龍窟。與鑑湖隔仙掌坡。地脈潛通。形若相應。下流俱注於大樟溪。又有白葉湖。在縣南。宋乾道二年。嘗修浚。

滌門鎮。縣西四十里。有巡司。元至元中。置於縣南之辜嶺。後移司於此。而改辜嶺爲砦。明初因之。圖經。縣北有牛皮隘。道出侯官。西北有大限。西塘等隘。道出閩清。西有三前隘。出尤溪縣。西南有炭爐隘。道出德化。又有浮潮隘。出德化及仙遊縣。又縣南有

辜嶺隘。亦出仙遊縣。東南有崔平隘。路通莆田縣。志云。縣西南又有嵩口隘。路通泉州府永春德化二縣。○平政浮橋在縣南。跨雙溪上。宋紹聖四年建。用舟三十有六。

附見

福州左衛。府治東南。洪武八年置右衛。二十一年改爲左衛。又福州右衛。在左衛西。洪武二十一年。增置福州中衛。在左衛東。○鎮東衛。在福清縣之海口。鎮城東。洪武二十年置。并築衛城。周不及四里。爲控扼要地。

梅花守禦千戶所。在長樂縣東五十里。本北鄉巡司。治梅江頭山上。洪武十年始築城爲備。二十年移置巡司於蕉山。改建梅花所。增拓舊城。三面距海。南連沙江。延袤三里有奇。有三門。設兵戍守。城外東南一隅。歲患飛沙漸積。幾與

城平每春以所軍挑之嘉靖三十八年倭賊犯境復營住焉又萬安守禦千戶所在福清縣東南百二十里洪武二十年置并築所城周三里有門三俱屬鎮東衛○定海守禦千戶所在連江縣東北八十里洪武二十年建并築所城周三里有奇有門二隸福寧衛。

興化府

東至海九十里南至海三十里西至泉州府百六十里北至福州府二百八十里自府治至布政司見上至京師六千四百里

禹貢揚州地周閩粵地秦屬閩中郡漢屬會稽郡吳屬建安郡晉屬晉安郡宋齊因之梁屬南安郡陳

屬閩州隋屬泉州

始置莆田縣

唐亦屬泉州宋因之太平興國四年分置太平軍

以游洋鎮地置莆田二

縣來屬太平興國八年始移軍治莆田縣

宋末改為興安州元曰興化路明初改興化府今領縣二

府馮峙高深山川奇秀北屏會城西翼泉州介於兩大之間海道舟車絡繹而至誠襟要之地矣

莆田縣

附郭晉晉安縣地隋開皇十年置莆田縣屬泉州大業初廢入南安縣唐武德五年復置屬豐州尋屬泉州宋太平興國四年改屬興化軍八年移軍治焉今編戶二百九里

莆田城

即今府城宋徙軍治此因築子城周僅二里有奇土垣而覆以茅宣和三年加築網其上蓋以瓦周七里有奇紹定初復更築表裏石砌而覆以磚稱堅城焉元至正十四年亦嘗修治明朝洪武元年復修葺十二年指揮程昇請闢城東北隅跨烏

石山下歷前城後城與舊城合延袤十一里有奇城外濠池左起東北隅折而南引延溪之水注之右起西北隅折而東引木蘭溪水注之二水交合長千七百餘丈西北負山鑿為旱濠長幾六百丈成化七年又嘗修葺嘉靖三十三年以倭警營治四十

一年城陷。既而議城東北南三面。四十二年。復營西面。三面亦更增修。隆慶二年。復營治。萬歷九年。守臣陸通霄以城西北隅跨山腰之半。而遺其高者於外。元至正十九年。寇從此射走守城卒。嘉靖四十一年。倭亦來此。越城而入。於是拓出西北城垣。而包高岡於內。長八十五丈五尺。舊有門五。明初改爲四。東建水關。以通舟。西亦有水關。欄以石盾。容水入而已。城周不及十二里。

興化廢縣

在府西北八十五里。志云。舊城在仙游縣東北之游洋鎮。本爲游洋洞。至險峻。盜賊出沒處也。宋太平興國四年。置太平軍。明年。析莆田。仙游及福州之永福。福清縣地。合游洋百丈二鎮置興化縣。爲軍治。尋遷軍於莆田縣屬焉。元皇慶中。又遷縣於莆田西北廣業里之泫溪村。謂之新縣。明初因之。正統十三年。廢興化縣。以其地分入莆田。仙游二縣。

烏石山

在城東北隅。城西北有梅山。與烏石相連。兩山之間。有小西湖。本城北舊濠也。洪武初。闢城濠塞。成化三年。郡守岳正疏之。凡三堰。中堰之內。潞水成湖。下爲兼濟河。東出水關。○太平山在城西一里。山脈自福州永福縣延袤而來。峯巒峻拔。爲莆田之圭山。又西二里曰天馬山。勢若騰驥。志云。府西南五里有鳳凰山。一名南湖山。舊時山下有湖。今涸。峯巒甚勝。麓有瑞泉。又大象山在府西五里。上有天泉巖。山腰爲石室。又有彌陀巖。下有梅花澗。亦曰智泉。

九華山

府北十里。由縣之西南諸山而來。至延壽溪。九峯攢簇如蓮花。故名。亦名陳巖。以昔有陳姓者隱此也。亦曰陳仙山。其東北有紫霄巖。極幽勝。○龜山在府北三十里。峯巒聳秀。東麓有龍潭。其西有九峯連屬。又北十里有天壺山。洞壑奇邃。林木葱蔚。山下腴田可數千畝。

壺公山

府南二十里。山有八面。高聳千餘仞。正對郡治。端嚴秀特。爲郡之鎮山。頂有泉。出石穴中。其盈縮應海潮。中有雙鱗。名曰鱗井。泉有眞淨巖。登之可遍眺郡境。又有靈雲。虎邱。盤陀。諸巖。泉石羅列。名勝不一。○城山在府東南二十里。一名穀城山。與

壺公對峙爲黃石市之主山。上有松隱巖。前臨國清塘。又塔山。在府東南十五里。舊有石浮圖。後圯。明朝建烽燧於其上。亦名天馬山。

嵩山

府東南三十里。峭拔海濱。其南有小嶼。在海中。潮退。有石橋可渡。居民千餘家。唐觀察使柳冕監羣牧於此。有德於民。建柳侯廟。俗因呼爲候嶼。久之訛爲猴嶼。○雙髻山。在府東五十里。自西視之。雙峯尖聳。曰南視。則五峯並立。故亦名五侯山。又名筆架山。以郡城視之。則三峯如筆架也。積石峻响。上摩霄漢。頂有湧泉巖。大旱不竭。又蚶山。在府東八十里。大海上。山勢翠嶺。環翠如嶂。舊志。莆田有蚶田百頃。號大蚶山。是也。其相近者爲演嶼。相傳宋少帝舟泊大峽江滯。爲元兵所逼。忽有白馬神爲演一嶼。蔽帝舟得免。因名。志云。縣東有瓊峯。形如屏。延袤二十里許。發脈福州五虎山。

夾漈山

府西北八十里。一名東山。旁有西巖。鄭樵讀書處也。其相近者有薊林山。樵從兄厚讀書處。亦有泉石之勝。又南爲環山。山巔累臺十餘層。礎石儼然。名越王臺。其旁有三巖。峯又百丈山。在夾漈之東。山延袤百餘里。上有六巖。曰客廳。曰古仙。曰石塔。曰石繳。曰石樓。曰重元。幽奇萬狀。志云。百丈山一名華蓋峯。或曰華蓋卽石塔巖。又有峯曰瑞雲。出泉。西流入永福縣。又有百丈嶺。東接福清縣界。○石梯山。在府西南四十里。盤礴峭聳。高千餘仞。上宜茶。絕頂有爐峯巖。南望大海。志云。郡境之茶。龜山爲上。石梯次之。龜山在府西北二十里。又有浮山。在石梯之南。近海濱。

南日山

府東百里。大海中。與琉球相望。舊名南匿山。近福清縣海壇山。明初設寨於此。後徙於內地。山爲會哨之所。又華胥山。在府東南百里。吉了巡司置此。一名極了。以莆地至此而極。復崛起爲此山也。宋時謂之擊蓼。與湄洲嶼隔海相望。下有東西二灣。爲閩市輻輳之所。○湄洲嶼。在府東南八十里。大海中。一名歸山。與琉球國相望。宋林光朝云。湄洲隔岸視之。約六七里。有田數十頃。可畊而食。又有大孤。小孤。二嶼。宋志云。在莆田縣東七十里。名勝志。今遮浪村海中有巨石突起。曰大龜嶼。嶼東又有大

石盤是也。

海。

府東南兩境皆濱海島夷有警府當其衝其防維之處吉慶平海三江其最衝也又文甲嵌頭青山其次衝也志云府東北五十里有支海白磬頭入與北山諸溪合江面最闊中有盤石突起如平地居民集焉有江口橋一名龍津橋又名尙陽橋通道所經也橋北即福清縣境相近有下黃竿支海流入此兩涯宏闊北涯舊有寧海鎮鎮前有渡元元統中創爲橋明初復修之勝覽云郡東薄寧海謂寧海橋也又有峯頭澳在府東平海衛南嘉靖三十八年官軍擊倭於峯頭澳破之倭遁去又追敗之於野馬外洋。

木蘭溪。

府南七里木蘭山下故有水曰南洋唐觀察使裴次元隄海爲田三百頃卽此處也溪之源白泉之德化永春及仙游三邑而下合澗谷之水三百六十有六會流於此又南經府南二十里將軍山下議者嘗欲橫堰此水以灌田不果宋治平初歲

旱塘竭有長樂錢氏蠟築坡於將軍灘前開渠循縣南十五里之鼓角山而南甫成而壞邑人林從世復相下流築南陽陂既成又決熙寧八年侯官李宏復因舊址營度疊石築陂上障諸溪下截海潮旁爲溝渠及斗門石涵節宣盡制約溉田萬有餘頃莆人利之元延祐間總管郭棗兒等復創萬金斗門引陂水灌南洋以北諸田爲利益溥明朝循其制自溪而東縈紆曲折有大潭三總謂之清江潭下流至江口入於海○瀨溪在府西南十里卽木蘭陂上流也又上溪在府西二里一名北磨溪南流注於木蘭溪。

延壽溪。

府北七里其上源曰巨溪在府西五十里首受游洋滌溪九鯉湖諸水東會荻蘆漁滄八瀨水經延壽村曰延壽溪一名綬溪以水綠如綬也唐神龍間有吳興者謂溪出杜塘經流入海不足溉田卽延壽陂後陸海爲田築長堤於杜塘以遏大流。

轉入沙塘陂。分爲溝澮數十處。灌北洋之田。復分二派。導流至羈浦。入於海。延壽澗田可萬餘頃。所堤杜塘田可二千餘頃。甯之饒給以木闌。延壽二陂也。新唐書。延壽陂澗田四百餘頃。建中間置。○八瀨溪在府西北十里。志云。溪淺流急曰瀨。亦曰碧瀨。或譌爲甞瀨。東爲龍潭。流合延壽溪。志云。

府東海中有礮山。濱海之浦曰礮浦。

荻蘆溪

府東北四十五里。源出仙游縣游洋溪。流入境合諸溪澗之水。分二流。一自漢滄溪合延壽溪。一自龍港會迎仙港入海。曰南荻蘆溪。又有北荻蘆溪。在府西北百里。又西十餘里有澳溪。出灣頭山。合蘇溪。吉宦。鳳搏等溪。東流至荻蘆陂。爲北荻蘆

溪。亦分二流。左行者歷萬安溪。迎仙橋。會福清縣界蒜溪之水。以達江口。右行者過瀨頭。以達新港。俱入於海。志云。蘇溪亦曰洙溪。

迎仙溪

府東北五十里。志云。由荻蘆溪合桃源。白石。諸水流經此。有子魚潭。其中子魚最多。一名小姑潭。又東爲迎仙港。一名通應港。接福清縣界蒜溪。逕諸江水。爲江水入海。志云。迎仙溪流通錦江。卽逕江矣。亦謂之三江口。以逕江迎仙及木闌溪下流

俱會此入海也。

亦爲濱海要地。

白湖

府東南二十里。一名玉湖。海潮自三江口上黃竿歷寧海至此。舊有隄。俗名白水塘。後曰白湖。宋熙寧中。於湖中設浮橋。紹興間。易以石。湖側有靈惠井。環境斥鹵。井獨清冽。海防考。嘉靖四十五年。倭賊自白湖入。犯過瀨頭。至海口。犯鎮東衛。湖亦戍守

處也。又凝翠湖。在府東南。與清江

潭相襟帶。湖水繚繞。長百餘丈。

國清塘

府東南二十里。其水與木闌陂相灌注。澄碧千頃。壺公穀城。倒影其中。唐貞觀中置。灌田甚多。新唐書。甯田西一里有諸泉。塘南五里有瀝嚶塘。西南二里有水豐塘。二十里有橫塘。東北四十里有韻洋塘。與國清塘爲六塘。其澗田千二百頃。宋熙

寧中木隴陂成。遂廢五塘爲民田。惟留國清以備大旱。又霞塘舊志。在府城東北清澱可愛。亦灌田百頃。

迎仙寨

府東北四十里。其地有迎仙橋。下卽子魚潭。洪武二十年置巡司。志云。宋初司置於縣東施水亭。熙寧四年。徙迎仙市之北。崇寧元年。圯於水。徙迎仙市之西。明初改建於此。有城。前臨海。後負江。爲商民輻輳處。又冲沁寨巡司。在府東六十里。有城。三面阻海。與岐頭。三江。澳港。相接。志云。司舊置於興化縣尋陽山下。洪武二十年徙。又嶽四寨巡司。在府東南九十里。舊置於莆禧鎮。洪武二十年徙置。有城。界山海間。爲登涉要地。又青山峒巡司。在府東九十里。舊置於府東三十里之南嶒。亦洪武二十年徙置於此。有城。東西南三面皆阻海。夷舟多由此入。南日山峙其南。渡海不過五十里。爲郡之門戶。○吉了寨巡司。在府東南華胥山下。有城。洪武二十年。置於仙游縣之潭邊寨。後徙今處。郡志。司距城八十里。前控南日。右引小嶼。左帶湄洲。迫臨大海。東有吉了水寨。又大洋巡司。在府西北八十里。山谷中蹊徑叢雜。奸民嘯聚。萬歷中。增置今司。

莆禧鎮

府東南九十里。或曰卽古之莆口。陳天嘉五年。陳寶應據建安。晉安。二郡。章昭達等討敗之。寶應逃至莆口。昭達追擒之。卽此。明朝洪武二十年置所。尋築城。置倉於此。志云。鎮舊有莆禧稅課局。洪武三年。徙於縣東之下渚。正統二年廢。又有莆禧河泊所。亦明初置。尋移於府東南數里。成化間。移於吉了澳。尋復舊。○黃石市。在府東南二十五里。民居環聚。舊有黃石稅課局。本宋之黃石務。其後徙置不一。元至正中。改建於此。明初改爲稅課局。又有黃石河泊所。洪武十八年置。亦在府東南。今皆廢。志云。府東南有國清市。亦闔閭處也。

涵頭鎮

府東北二十里。亦曰涵頭市。路通永福。尤溪。諸徑。洪武初。置莆田稅課局於此。莆田河泊所亦置焉。鹽課考。元至元十六年。於涵頭市設管勾司。董鏊事。延祐二年。改爲司。明初洪武二年。改爲福建都轉運鹽使司。分司分統上里等場鹽課司。

所轄凡二凡二十

四圍皆產鹽處也

南日砦

在府東南志云府東平海衛東有舊寨設於海中南日山下北可以過南菱湖井之衝南可以阻湄洲僭墜之阨亦要區也景泰以後移於吉蓼之東仍以南日爲名舊南日棄而不守番舶北向泊以寄潮論者以爲自棄其險然而孤懸海中大約

與泉州之活嶼情事相類云○崎頭鎮在府東八十里初置巡司後改爲城堡嘉靖中倭賊陷興化府官軍擊之倭賊走平海衛欲掠舟泛海乃結集崎頭城官軍擊之敗績賊乘勝陷平海衛賊繼光等合兵擊破之志云鎮東至平海衛十里

林墩

在府東南嘉靖中賊繼光大破倭賊於此海防考平海衛墩臺有小澳石獅磯前新浦三江埧口崎頭澄港湖邊石城蔡山石井等一十二座○莆陽驛在府治北元置明朝因之又有遞運所在驛南洪武十七年置後廢

仙遊縣

府西八十里南至泉州府百五十里西至泉州府永春縣百十里東南至泉州府惠安縣百有二里西南至泉州府南安縣百七十里西北至泉州府德化縣百三十里本莆田縣地唐聖歷二年析置清源縣屬泉州天寶初改曰仙遊縣宋因之紹興十

五年議築城以禦寇不果乾道中僅營四門明朝正德初創築土城尋圯八年毀以磚旣而復壞嘉靖二年改用石砌七年始成周六里有奇編戶十三里

鷄鳴城

縣東七里相傳越王無諸所築俗呼城山又名鐵山舊經云其城靈異不假版築或呼爲雞子城其相背者又有彭城址並存寰宇記縣東又有蜿灣城俗呼爲越王城○興化廢縣在縣北七十里與莆田縣接界處也

二飛山

縣北五里宋志作大飛山縣之主山也蜿蜒數百里屹立爲二高可千仞其形翼然作飛揚之狀下有鐘鳴馬鞍二山東爲將軍山頂若兜登稍北爲瀑布山懸崖數千尺飛瀑瀉下如練下有龍潭又九域志大飛山有平湖洞其地有平湖數頃一

夕風雨暴起且見此山聳峙因名大飛唐景福初王潮

自泉州遣兵攻福州平湖洞民請以兵船助之卽此

九座山

縣西北七十里。重巒疊嶂中。巍然高峙者凡九。其居中而尤峭拔者。曰盤髻峯。又北十里曰大汾山。與福州府永福縣接界。○梁山在府西北四十里。平田中突起一峯。層巒插漢。其東南五里爲泗洲臺山。一名仙人臺。亦高聳。志云。縣南三十里有

九峯山。亦曰九仙峯。雲輿則雨。又南十五里爲九龍山。山分九支。並峙者

曰銅鼎山。勢甚雄壯。又新峯山。在縣東南四十里。其高凌天頂平如掌。

九仙山

縣東北百里。脈自永福縣來。至此特起一峯。其西爲高望山。連綿高聳。可以遠眺。風日澄霽。海在日隄。南爲雙髻山。北爲仙人臺。皆以何氏九仙得名。山之下爲何嶺。俗呼寒剛。亦曰寒巖。又曰古荷城。亦曰何巖。臨九鯉湖。東有石洞。可坐百人。綿亘

數十里。其西曰南湖巖。峯巒聳秀。下瞰平湖。又西曰高陽山。亦名谷日山。崇林幽翳。居人剝木以

識所從入之路。因訛爲谷日云。又盤龍山。在九鯉湖西南。高千餘仞。峯巒不可登。上有白雲洞。

石所山

縣東北六十里。高數千仞。盤踞百餘里。何巖居羣峯之上。而此山又居其上。巖有烏頭巖。石影黑。浮海者習以爲的。其下平坡十餘里。頂旁爲雲居巖。下視空濶。滄海渺茫。巖高千仞。而右方沼瀦。其巖相近。又有滴水鳴山等十餘巖。志云。石所在何

巖之東。紫帽之西。其紫帽山石壁削成。有斜巖諸勝。○尋陽山在縣東北八十里。山

自西北來。峙爲三峯。中大者北仙臺。西香爐。極爲雄偉。左右環疊。峯巖甚衆。並稱奇勝。

蔡溪巖

縣東北八十五里。巖前有石如雙闕。曰石門。頗高廣。石門之北。峭壁環立。上有瀑布。懸流數百丈。瀑之盡處爲龍潭。深不可測。流而爲溪。是爲蔡溪。石門之下。有幻遊洞。巖水至此。會流如犇雷。漚而爲湖。湖之旁峯巒環峙。○北坑巖在縣南巖石周

環如城。元末鄉人避寇於此。又石碑嶺。在縣南。嶺路甚峻。有石立道側。平濶如碑。縣南又有馬嶺。皆通道所經。

嶺如城。元末鄉人避寇於此。又石碑嶺。在縣南。嶺路甚峻。有石立道側。平濶如碑。縣南又有馬嶺。皆通道所經。

九鯉湖

縣東北六十里。萬山中。湖之前山曰飛鳳。後山曰高陽。盤旋環抱。湖瀦其中。志云。九仙諸山自永福而下。重山稠疊。幾百餘里。至此石峽天開。懸崖無際。數百里之水。來入石竅。石穴中瀦爲石湖。湖水日夜從高墜下。巖石巖巖。龍從水流。瀆激洄心

駭目春夏間其觀尤偉湖上有何仙祠相傳九仙丹成跨九鯉上昇處也湖之北爲黃鷄灘南爲茶槽潭湖水東南行被崖而下爲瀑布而潭而陂又繞山而行數十曲而爲莒溪爲露水其終入海此其大略也中分九澗一曰雷轟澗在湖東何巖之水出而西流奇石當其中潮淘擊盪其聲如雷一曰瀑布澗在雷轟西相去五十步奇石懸流如瀑練然一曰珠簾澗在湖西水從巖飛下去地千仞噴沫如散珠稍卑則颺縷成簾也一曰玉筋澗從湖西南盤龍山頂灌下忽岐爲兩直下白雲洞中宛如玉筋亦曰玉柱澗一曰石門澗去玉筋西北里許澗中奇石參差有二石亭亭如門豁豁水流其中一曰五星澗距石門二里有五石相聚如星一曰飛鳳澗去五星三里卽飛鳳山峙於湖前者其高百仞十里之外有泉縈迴注而爲澗也一曰碁盤澗距飛鳳里許澗中臥一巨石宛若碁盤一曰將軍澗距碁盤數里澗中有兩石鶴立如武夫當關之狀白湖至此不啻二十里皆猿厓鳥道登陟甚艱邑志湖之奇以九澗一澗或五里十里遠者二十里皆兩山夾峙奔流界乎其中道路迂迴奇勝不可名狀從將軍澗南出爲莆田縣之莒溪○赤湖在縣南四十里楓亭市之要昔時周環五里土色皆赤下爲焦坑流入楓亭溪

游洋溪

在故興化縣西上源有郭洋銀巖等溪匯流而東南有尋陽溪流合焉入莆田縣界下流爲南荻蘆溪○三會溪在縣西十五里有三源皆導流諸山澗中匯而爲一又東南匯羣溪之水流入莆田縣界下流合於木蘭溪志云縣西七里有神堂溪

十里有大濟溪四十里有大目溪俱匯於三會溪又有余溪源出永春縣流合大目溪

僊溪

在縣城南一名大溪一名南溪又名藍溪西北受永春德化之水東南流至縣前環繞如帶又東南匯諸溪水亦合於三會溪志云縣南有可溪出縣南二十里之香山又有九溪及周溪皆在縣南十里又東南有蔣溪又縣東十五里之昆溪安吉

等溪下流皆會於僊溪○楓亭溪在縣東南四十五里其上流爲阜洋吳坑諸水又東有九龍溪西有赤湖焦溪皆流合焉南出雙溪口入太平港港卽溪海會流處也志云雙溪港亦在縣東南四十五里一名滄溪其南爲太平港又沙溪在縣東南四十里

溪旁有沙溪市。
南流合楓亭溪。

何巖水。在縣東北何巖下。源有三，皆出山谷中。其下流一出瀨溪，下水關陂，一出鯉湖，下莒溪，一出龍津，下延壽溪，並注於海。志云：縣南七里有聖泉，亦號龍井，雖旱不涸，灌田十餘頃。

白嶺寨。縣西四十里有巡司。志云：洪武二十年置楓亭巡司於楓亭驛，尋改置於莆田縣小嶼山上。曰小嶼寨巡司，築城置戍。嘉靖三年以山寇竊發，移置於白嶺嶺，而小嶼巡司廢。又陳騷關在縣南，又南即惠安縣界，聞見錄。仙遊西南數十里有大埔阨。

又數十里至長嶺，即晉惠兩縣界。縣西又有石

獅隘，接永春縣界。嘉靖中倭賊常出沒於此。

楓亭驛。縣東南五十里。唐爲風亭館，宋爲太平驛。元至正七年改爲楓亭驛。明朝因之。東北去府城六十里，東南去泉州府惠安縣五十里。

附見

興化衛。在府治東北。洪武元年建。○平海衛在府東九十里。洪武二十年置，并築衛城。周四里有奇，有門四，領莆禧所一。

守禦莆禧千戶所。府東九十里，亦洪武二十年建築。城周三里有奇，有門四，三面瀕海，西面爲濠，西南有文甲澳。又有嵌頭青山，諸港口皆爲濱海要地。海防考：莆禧墩臺有山柄文甲，嵌頭東湖山西凡五座。

福寧州。東至海六十里，南至福州府五百四十五里，西至建寧府八百五十六里，北至浙江溫州府五百九十里，自州治至布政司見上。至京師六千六百七十七里。

禹貢揚州地。周閩越地。秦閩中郡地。漢會稽郡地。三國吳屬建安郡。晉屬晉安郡。宋齊因之。隋屬泉州。大業初。屬建安郡。唐仍屬泉州。開元初。改屬福州。五代時。王氏屬長樂府。宋仍屬福州。元至元二十三年。升爲福寧州。屬福州路。明朝洪武二年。州廢。成化十九年。復升爲州。編戶五十三里。直隸福建布政司。領縣二。

州北瞰永嘉。南屏侯官。山川險峻。實爲要地。防險說。閩興、泉、福、漳之地。皆濱海要衝。然莫有如福寧之尤險者。蓋地勢自西北而東南。至會城盡之矣。而福寧又在東南。突出海中。如吐舌然。其左爲甌括。海居東面。其右爲福興。海居南面。福寧獨當東南北三面之衝。烏夷入寇。必先犯此。故防爲最急也。

長溪廢縣。今州治。本溫麻縣地。唐武德六年。析置長溪縣。屬泉州。旋省入連江縣。而以縣治爲寧遠鎮。長安二年。復置。尋改屬福州。五代時。王闔屬長樂府。宋仍屬福州。元升縣爲州。改曰福寧。明初。降州爲縣。後又升爲直隸州。城邑考。州城。洪武四年築。

二十年增拓東城。永樂五年復修治。成化十七年以後。屢經營繕。嘉靖三十四年。復拓城。西三十七年。夏潦。明年倭寇來犯。又值淫潦。城圯。尋復營築。今城有門四。周六里有奇。

溫麻廢縣。州南三十里。晉泰康三年。析侯官縣溫麻船屯置溫麻縣。屬晉安郡。蓋治於此。隋開皇九年廢。唐改置溫麻縣於今連江縣境。而以廢縣地置長溪縣。今州南有鼓樓山。古城村。蓋因廢縣爲名。

龍首山。在州城北。分爲五枝。又名五葉蓮花山。山巔平夷。唐末黃巢犯閩。嘗屯兵於此。號黃巢坪。坪西有井。廣文許。其水清泚。名曰聖水。又有東西石澗。下北城外濠。而入水關。志云。州東門外有華峯。下有雷壇。元末州尹王伯顏與山賊王善戰。不利。見執。

於此死之。又城南三里有南峯。峯頂岐首有三。亦曰三台山。郡志：龍首山峯巒峭拔。爲州主山。前挹長溪。東抱華峯。西接蓮坡。水光山色。映帶城郭。又有金字山。在州治東北。高聳如龍首。嘉靖三十八年。義兵殲寇於此。其東爲獅山。城東北曰大瀉山。唐景福中。僧建大瀉院於此。而名。縣東有小山。最高峻。又明宋山。在龍首山西。亦曰蓮花山。

松山

州東十里。下有松山港。昔時風濤險惡。歲患溺舟。後流沙漸合。有徑可行。正統九年。徒置烽火寨於山下。其對峙者曰後峙山。山全體皆石。巨細磊砢。爭奇競秀。又鐵嶂山。在州東十二里。壁立千仞。其色如鐵。一名昆岡。相接者曰馬冠山。亦名昆田山。勢連亘數十里。高聳凌雲。形如半月。志云：松山東南海中有斷嶼。名火焰山。又名屏風嶼。嘉靖三十八年。倭賊突犯州境。參將黎鵬舉等擊之於屏風嶼。及鎮下門。三沙海洋皆敗之。鎮下門見浙江溫州府。

洪山

州南三十五里。勢極高峻。望溫台。如在掌間。志以爲州南第一山也。葛洪舊嘗隱此。四名。有泉一泓。通海。名曰海眼。其西有數峯。連接。又小洪山。在州西南五十里。以高峻亞於洪山。而名。亦曰紅山。有天池。闊二三畝。四時不涸。名曰龍潭。又霞浦山。在州南四十里。中有青黑元黃四嶼。日出照映江水如霞。故名。又南十里曰羅浮山。相傳此山浮海而來。泊船山下。可避北風。若南風。則石戶齒齒難近。嘉靖三十七年。倭賊流劫羅浮。官軍禦却之。今防倭水砦船多集其下。相接者曰水澳。山旁又有石筍山。峯巒聳秀。上有清泉。又南曰文崎山。與武崎山並峙海中。廣袤五里。○南金山。在州南六十里。一名大金山。居民環其下。廣袤二十里。其南一山曰小金山。相近者曰浮瀨山。一名浮簾山。上有四澳。下臨溟海。一望千里。宋元間居民蕃庶。明初俱徙入內地。

望海山

城西北七十里。去海百餘里。勢極高峻。上有石池。四時不涸。又拓洋東山。在州西北百二十里。東望海外數百里。諸山皆在覆島之下。懸崖聳削。積雪不消。有泉一勺。大旱不竭。元末有袁天祿者。率其昆弟保拓洋。爲泰安社。州賦稅訟獄皆歸焉。元授以江西行省參政。明初納款。世居此地。嘉靖末。倭賊寇其額堡不能下。

大姥山。州東北百里。羣峯林立。得名者三十有六。爲境內之望。又北數里曰草堂山。本名鑽山。以林嵩築草堂其中。改今名。巖石甚勝。餘詳見前名山大姥。○甯山在州東南海中。山高而中坳如鉢。孟孟山有三十六澳。旁有長山。有日嶼。東有七星山。

以七石浮立海面如七星而名。嘉靖中。官軍嘗敗倭於此。志云。出州東門三里。迤南而西。水天茫茫。浮於水面有臺山。官澳。山屏風山。筍竹山。四瀧山。皆在烟波浩淼中。難以里記及其方隅也。又秦嶼在州南海中。爲防戍要地。質籛巡司置於此。

泗城山。州西五十餘里。危壁峭立。有巨石黑色。名鐵印山。下多屯田軍營。東隔溪有小馬山。又白瓠山。在州南大海中。白如瓠。山脊與寧德縣接界。志云。州西南六十里。又有竹嶼。其相近者爲孤山。嘉靖三十五年。倭賊白寧德縣遁入福寧州界。官軍追

敗之於此。

桐山。州西北六十里。接浙江平陽縣界。其地險阨。可以戍守。嘉靖三十九年。倭賊白州城流劫至桐山。指揮盧錡等擊敗之。賊還。復擊敗之於同坑。既又追破之於蒲岐。今設營置戍爲浙閩要隘。同坑見浙江泰順縣蒲岐。見浙江樂清縣。○天竺山在桐山

東南。其相近者有牛嶺。輿程記。牛嶺在桐山北二十五里。爲往來之通道。又北十五里。卽分水關。

石馬嶺。州北百三十里。有巨石危立如馬。又西北三十里。卽桐山。又北四十里。爲分水嶺。接浙江泰順縣界。有關。浙閩分疆處也。又王頭陀嶺。在州東五十里。北連九嶺。崎嶇險峻。宋時王頭陀砌石爲路。嘉定中。縣尹楊志復用石修砌。○池家嶺在州西北

四十里。中有古澗。深百餘仞。又有石門。俗呼仙人洞。志云。州西有楊梅嶺。產楊梅。宋開禧中。僧砌嶺路。自嶺而下。東抵九里亭。西抵十八溪。嘉靖十六年。令楊志川石鑿砌。悉平犖角。亦名楊公路。

海。州東南百里。志云。州境海環三面。其在東北者。三沙海。形勢陡絕。最爲險要。沙垚砦稱首衝。秦嶼次之。而泥坪防衛港口。松山逼近州城。水則烽火砦。陸則左右營。又有桐山。閩峽下滸。諸處分防水陸。與連江縣之定海所。州南之大金所。聯絡控制。並爲州境

之險云

長溪

州西四十五里。源出浙江慶元縣界流入境。經福安縣而東。會柘洋水達州城西。又南經古鎮門入海。迤邐數百里。唐因以長溪名。縣舊志。州西南百七十里。有白水江。又有霞浦江。與硯江相接。東流入海。○倒流溪在州東三十里。源出東北九十里之

烏巖。西南流經此。因名。冬夏

不竭。溉田萬頃。下流入海。

松山港

州東南松山下。上接諸溪澗之水。至松山前。與海潮匯。前有沙洲。後有沙徑。海船多泊於此。又松蘿洋志云。在州西北七十里。其地有九灣十八折。又七十里至福安縣。今有松蘿公館。

分水關

州西北二百里。分水嶺上。接浙江泰順縣界。今詳見泰順縣志云。州東北有疊石關。與分水關俱王闔所置。以備吳越。又州北有後崎關。亦闔置。宋建炎中。建賊范汝爲作亂。里人拒之。於此。又有營頭關。在州南霞浦山前。有小嶼跨海。與大山接。中可容數百人。宋紹興中。邑人警守此。以拒海寇。○古鎮門在州西南。長溪之水會州境。及福安縣諸溪澗水而入海。一名白馬門。又漁洋堤在州南三十五里。兩旁皆海。中一徑如蜂腰。去海甚近。而隔絕不通。因名。

大箕營鎮

州東北百里。舊爲蔣洋巡司。在州東北八十里。洪武二十年。移置於蔡嶼堡。改今名。有城。又水澳巡司。在州東百里。舊爲桐山巡司。洪武二十年。移置於此。改今名。有城。嘉靖中。還置於桐山堡。爲廣門巡司。又清灣巡司。在州東北五十里。

本置於州南百里。曰西白巡司。洪武二十年。移置於牙裏堡。改今名。亦有城。又高羅巡司。在州南五十里。閩峽堡。延亭巡司。在州南百里。下滸堡。俱洪武二十年。置。有城。志云。州東南又有松山巡司。亦洪武二十年。置。二十六年。又置河泊所於此。嘉靖中。司革。○柯洋巡司。在州西北百二十里。西南至福安縣百里。有柯洋故城。元末創爲保聚處。正統六年。增置巡司。以備山寇。通志。州境又有庫溪。小瀾。鹽田三巡司。俱元置。明朝革。

烽火門水砦

州東松山下。永樂十八年創設於三沙海面。既以倭寇人犯。撥衛軍及大金所軍協守。正統九年。議者以爲風濤洶湧。不便棲泊。乃移於今所。增撥官軍。以備倭寇。○流江砦在州北百里。與平陽縣接壤。卽橫陽江南岸也。海防考。烽

火門之要有官井。流江九澳諸處。爲賊船必泊之

所。備禦最切。而流江與烽火門尤爲犄角之勢。

三沙寨

在州東北。相近又有清灣寨。與清灣巡司同置。又東北有可家。黃崎。小箕。大箕。等砦。州東百餘里。又有南鎮。水澳。等砦。俱屬福寧衛。○高羅砦在州西南。與高羅巡司同置。又有下滸。延亭。車安。西白。與高羅共爲五砦。俱屬大金千戶所。又延祥

寨。志云。在州南。宋淳祐三年。置有水軍千人。州城北。又有金城砦。在金字

山上。壓城而峙。嘉靖中。倭登是山。攻城幾陷。萬歷二十九年。置寨於此。

沙城堡

志州東北。海防略。沙堤。征權。要衝。商民輻輳。三面俱海。賊所垂涎。而秦嶼堡地。亦濱海。民殷庶。秦嶼而下。爲三沙信地。襟山帶海。舊設土堡於相近之高巖。以防海口。○湖平在州東三十里。嘉靖三十五年。官軍敗倭賊於孤山。又追敗之於湖坪。是

也。今有

湖平舖。

溫麻驛

州西五里。又西有鹽田驛。又州東有倒流溪驛。飯溪驛。州北有桐山。分水。二驛。俱宋乾德初置。元廢。今州治東有館驛。舊置於西門內。正統七年。改置今所。又州西南四十里有鹽田公館。州西北八十餘里有杯水公館。俱成化中置。

寧德縣

州西南二百二十里。西南至羅源縣八十里。西至古田縣二百六十里。北至建寧府壽寧縣二百二十里。本長溪。古田。二縣地。唐開成中。置感德場。五代唐長興四年。王閩升爲寧德縣。屬長樂府。宋屬福州。元改屬福寧州。明初仍屬福州府。成化九年。復

改隸福寧州。城邑考。縣有土城。王閩時築。後毀。明朝正德初增修。

嘉靖四十年。倭毀。四十二年。改築。周三里有奇。編戶二十三里。

白鶴山。縣西一里。俗名西山。秀拔千仞。南連飛鸞諸山。北接蓮花諸峯。山下懸崖峭壁。空洞幽深。容數十人。泉水清冽。是爲龍泉。其西南卽白鶴嶺。石磴峻紆。迴百折盤曲。而上海上諸山。皆入延眺。嶺之南。飛泉百丈。名南山。深嶺。半有黠井。味甘。四時不竭。

金甌山。

縣東南十六里。若金甌浮於水面。輿酒巖。猿毛。大小金峙。檝欖。諸嶼。聯絡海中。而此特近。四際平曠。亦名覆釜山。又梅溪山。在縣南二十里。東接飛鸞嶺。南俯大海。梅溪遶其下。其相屬者爲勒馬山。又有楊溪山。俱環拱縣南。又城澳山。在縣南四十里。四面環繞。如城郭然。內有南北中三澳。可容萬人。然四際皆海中。無所產。人跡罕到。○驢山。在縣東北二十五里。峯巒秀拔。形如驢。馳奔馳入海之勢。濱海有官冠山。地勢坦舒。土壤饒沃。相接者爲屨崎山。山下有三江洋。三渡洋。又有官井洋。出洋卽渺茫大海。嘉靖中。設官井洋水砦。爲控禦之所。

霍童山。

縣北七十里。名山記。山高三千四百丈。周圍三百里。道書以爲霍林第一洞天。白玉蟾云。此山週環九十九峯。諸峯俱備。名著者三十六。最勝者四十八。唐天寶中。名山曰仙遊。王闔時。封此山爲東嶽。列仙傳。霍童作霍桐。去平地七里。巖甚平曠。有甘露池。海鱸井。及石廬。石室。昔有神仙霍童居此。因以名山。亦謂之鶴林山。山後有大童。小童。諸峯。奇勝錯出。亦謂之四十八景。東有高蓋山。山之別峯也。西有支提山。去鶴童二十里。歷數十峯。乃至峯巒圍繞。巖谷幽深。更爲奇勝。葉氏曰。閩境之山西則武夷。東則霍童。而霍童深廣奧僻。巖巒洞壑之奇。不能以耳目盡也。

鳳山。

縣北百二十里。卓立萬仞。傍分兩翼。如飛鳳然。上有鳳池。及飛石巖諸勝。○石堂山。在縣西百二十里。上有巖路。通古田縣。嶺下有塘。名石塘。亦曰唐溪。匯爲蛟潭。東麓有雙柱翠屏諸峯。

石壁嶺

縣北十里。石壁峻拔，高入雲霄。上有泉，出巨石上，甚清冽。下有溪，與瑞迹溪環遶。遶里中，謂之雙溪。溪旁小山曰龜嶼，與石壁相連。嘉靖三十五年，官軍擊倭賊於此，敗績。○新嶺在縣北六十里，有大小二嶺，上有瀑布泉，羣峯圍繞，並稱奇勝。又北

六十里有麻嶺，路通壽寧。政和二縣，巡司置於此。又有顯聖殿、玉屏峯，皆聳秀入雲，形狀奇崛。

飛鸞嶺

縣南二十里，形如飛鸞展翼，與勒馬梅溪、諸山岡脈相接，逶迤曲折，達羅源縣境。下有飛鸞渡，即飛鸞溪所經也。東麓有百丈瀑，名棲雲潭。嶺又東有萬石巖，中空數百人，又帽嶺在縣東北二十餘里。志云：嶺下有東牆渡，通寶豐銀場。○瑞峯在縣

東三十里海上，秀拔萬仞，與白鶴峯對峙。其相並者，有嵩嶼、黃灣峯，又五馬峯，亦在縣東南。志云：縣捍門山也。五峯列峙如馬，縣南諸山皆環海，海濱垂盡處，忽五峯突起，高聳海上。

大海

在縣東南。志云：縣境之水入海者有三派。一自酒嶼，由金崎過三江洋而入。一自三嶼，前過三渡洋，會藍田之水而入。一自帽村港，經帽門，徑至白瓠山而入。其海潮之入於縣境者有五：一自南門溪，一自金鰲橋，一自藍田，一自東牆渡，一自金垂云。

穹窿溪

縣西五十里，上有穹窿巖，因名。源出古田縣境，合周仙湖東流，至石堂山下，合於唐溪。又東爲穹窿溪，又環溪在縣西百二十里，亦出古田縣界。雙溪夾拱，周圍環繞，至穹窿巖，合流爲天柱窟。又東爲泛尾，經赤鑑湖，至帽門下，達於海。○外渺溪在

縣北百十里，源出政和縣界，白滄洳而下，匯諸溪之水，經縣西北之青巖及霍童山下之桃花洲，及縣東北十五里之合掌灘。又東至銅鏡，金垂入於海。又有油溪，在縣西北二十里，源出古田縣界，有金溪流入焉。又流經羅源縣境，會百丈瀑，竹林潭，至溪口

村，同出三嶼之左，匯於海。

飛鸞溪

在縣南飛鸞嶺下，源出羅源縣境，流入縣界，經三嶼東，與油溪同入於海。又官井洋，在縣東，冠崎山下。志云：源出浙江龍泉縣界，東流數百里，至斜灘，又東過福安縣北，又東流入縣界，合松潭溪。又東會於此入海。

赤鑑湖。

在縣西南一名西陂。宋里人林桂築堤壅堰以灌田。後陷於海。尋漲爲湖。上通穹窿溪。下達輔門。又周仙湖。在縣西百餘里。接古田縣界。相傳昔有周仙者得道於此。上流之水。儲而爲湖。鄉田賴以灌溉。城東又有東湖。宋令李澤民以山高水迅。堤

而湖之起。附焉塘。歷酒岷。歷金甌。延岫。至藍岫。由是旱澇有備。民號李公堤。又水南湖。在縣東北之桐鏡村。儲水不竭。可資灌溉。

○午日潭。在縣西六十里。四山高峻。凌霄。中有三潭。巖頭瀑布千尋。瀉入潭中。而濛濛不見天日。惟正午之時。日方臨照。故名。志

云。縣北百二十里有柘州水。極險。

惡難渡。居民強悍。以販鹽爲業。

麻嶺鎮。

縣北百二十里。瀟村。有東洋麻嶺巡司。元時本置於縣北二百餘里之東洋。明朝因之。宣德中。移於今所。志云。今司治雲溪門。在縣東北二十餘里。又有東洋鎮。卽元時巡司故址。嘉靖四十年。倭變。東洋民乘亂肆掠。議者以東洋地僻。民頑。請設行

縣於周墩。分主簿一員駐其地。今因之。

長崎鎮。

縣東五十里。亦曰黃崎。又東北六十里。至福寧州。輿程記。寧德縣東四十里。地名大梨嶺頭。又十里至黃岐。過江而北。有路達安福縣。又自鎮東北行十五里。過江。又十五里。曰鹽田。又三十里。卽州東門。或曰。此自縣至州之運道也。

三縣界。

縣東三十里。宋初建署於三嶼。卽此處也。元豐初。移置於蛇崎山。界福安。福寧。二縣界。因名。洪武二十一年。移於福寧之松山。尋廢。又埔村。在縣東北三十餘里。洪武初。設稅課局於此。尋廢。

寧川驛。

在縣治西。又縣西南五十里有飛泉驛。俱宋置。尋廢。志云。縣南有焦門峽。宋政和中。移飛泉驛於此。紹興間。以風濤險惡而罷。今縣有明坑公館。在縣北七十里。寶豐公館。在縣西北二百二十里。卽宋之寶豐銀場也。

福安縣。

州西北二百里。南至寧德縣二百里。西北至建寧府壽寧縣二百里。北至浙江泰順縣二百五十里。唐長溪縣地。宋淳祐四年。析置福安縣。治韓陽坂。元隸福寧州。明初屬福州府。成化九年。復改今屬。正德初。始築磚城。嘉靖三十七年。以倭警。增修工未

及學明年城陷因復修築倭復至不能陷萬歷九年城圯於水尋復營治而展其東面并築壩於城西以遇水二十七年城復舊制周圍五里編戶三十六里

屨山

在縣治北縣之主山也其支曰鶴山舊在城中嘉靖間倭陷城議者以城曠難守截出之萬歷九年增拓縣城復環於城內縣治有龜湖山平地突起俯瞰湖光與鶴山對峙志云縣治東北有銅冠山四時雲氣蒸鬱青翠不改下有流泉○城山在縣西

南十五里唐末鄉民築城於此以避青巢之亂因名上有靈巖巖下有雙劍水亦曰廉溪

崑崙山

縣西北四十里高聳萬仞上有天池池畔多民居志云縣西三十里有福源山上有三峯高聳如鳳舞名翔鳳峯又有獅子巖巖頭巖諸勝下爲穆洋亦曰穆溪○仙境山在縣北二十里峯巒峭拔怪石巉巖巖洞寬豁石門封固蓋神仙窟宅云

牛嶺

在縣西二十餘里志云山界寧德通延建其高接天又金雞嶺在縣南四十里一名五嶺爲五路之會有隘口爲戍守處又有大萊嶺在縣東南百餘里爲盜賊淵藪有民兵屯守

雙巖嶺

縣東南百二十里宋建炎間韓世忠討建寇范汝爲嘗屯兵於此又棲雲嶺在縣西十五里常往來之道志云縣東南五十里有百辟巖相傳宋少帝航海入閩集勤王之師於此因名○巖湖嶂在縣北四十里高廣皆數十仞其平如掌容數百人

半巖有穴亦容數十人下有湖名曰巖湖又鐵仙

嶂在縣西北有三峯峙秀林木陰森亦縣之勝也

海

在縣南志云縣境之海與福寧州寧德縣相接

六印江

縣南百里有六小嶼又有蘇江在縣東南五十里流合六印江其下流爲甘棠港志云港在縣東南百六十里一名黃崎港與六印江相連先有巨石屹立波間舟多覆溺唐乾寧五年王審知欲鑿之忽風雨大作別開一港甚便舟楫閩人以審

知德政所致名曰甘棠港下
流出福寧州之古鎮門入海。

長溪

在縣西北。源出浙江慶元縣界。自東北來者爲東溪。自西北來者爲西溪。二縣匯流爲交溪。又東南流爲長溪。繞流縣郭。亦謂之環溪。又東南入州境。達於海。遠近諸溪澗水悉流合焉。志云。縣南境有三港口。自三港口而下爲蘇江。六印江。甘棠港。芭蕉洋。古鎮門。皆江也。出古鎮門則爲海。自三港口而上則皆溪矣。○平溪在縣西北五十里。自壽寧縣流入境。合乎東溪。又秦溪在縣東五里。源出福寧州西北境之鍾龍井。南流入長溪。又穆溪在縣西南三十里。源出政和縣界。流入境。有白石溪流合焉。又東會於廉溪。志云。廉溪在縣南五十里。上接穆溪。爲三港口。匯羣溪以入於海。又有大梅溪。在縣東南四十餘里。亦入廉溪。

白石鎮

縣北七十里。有巡司。成化八年置。有城。嘉靖中移置於縣南百五十里黃崎鎮。志云。黃崎鎮。唐咸通中置。後廢。宋熙寧五年復置。崇寧三年并置權務於此。嘉熙四年廢。嘉靖中以寧德縣之長崎爲黃崎鎮。而改黃崎爲白石巡司。設有城堡監司行部。駐節於此。○漁洋巡司在縣北九十里。元置。明初因之。景泰六年廢。又萃嶺巡司在縣南二百餘里。近寧德縣之飛鸞渡。宋置。元廢。

白沙務

縣南二十五里。宋紹興二年置。尋罷。志云。縣南三港口舊有稅糧場。閩王審知置。東轄溫麻港。西轄童鏡港。中轄甘棠港。宋熙寧五年行市易法。以風濤險惡。商舟艱於駐泊。乃移置於黃崎鎮。又稅課務在縣西南三里。洪武三年建。宣德中省。○下邳驛在縣東十里。又黃崎驛在縣西南三十里。俱宋置。今廢。

附見

福寧衛。

在州治東。洪武二十年建。領所一。○守禦大金千戶所。在州南八十里海濱。亦洪武二十年建。舊爲巡司。尋改千戶所。築城周三里有奇。永樂以後。不時修築。

讀史方輿紀要

卷九十七

福建三

建寧府

東至福寧州八百五十六里。南至延平府百二十里。西南至汀州府七百三十里。西北至江西廣信府四百五十五里。北至浙江衢州府五百里。東北至浙江處州府四百七十六里。自府治至布政司五百二十五里。至京師五千七百五十七里。

禹貢揚州地。周爲閩越地。秦屬閩中郡。漢屬會稽郡。後漢因之。三國吳永安二年始置建安郡。

吳錄後漢分治

縣地爲會稽東南二部郡尉東部臨海是也。南部建安是也。吳孫休分南部立建安郡。

晉以後因之。隋平陳廢郡屬泉州。大業中屬建安郡。唐武德四年

置建州

治建安縣以建溪爲名

天寶初曰建安郡。乾元初復曰建州。五代時屬於王閩。

石晉天福六年王延政據建州請於其主曦欲以建州爲威武軍曦以威

武乃福州舊號。因以建州爲鎮安軍。延政自改曰鎮武軍。尋稱帝於此。

後又屬於南唐。

石晉開運三年南唐取閩地改建州軍號曰永安軍。後周顯德三年南唐又改曰忠義軍。

宋仍曰建州。

亦曰建安郡。端拱初升爲

建寧軍節度。

紹興三十二年升爲建寧府。

以孝宗潛邸也。

元曰建寧路。明初復曰建寧府。今領縣八。

府西帶江西東連浙右形勢四通為全閩之藩屏晉安之肩背且東水襟山號為奇峻誠東南勝地也

宋紹興二年羣盜范汝為據建州韓世忠自溫台路進討曰建居閩嶺上游賊沿流而下七郡皆魚肉

矣及景炎初蒙古窺閩以舟師出明州逼福州復以騎兵取處州瑞安即溫州府入建寧於是東西震動時蒙

古西入邵武東侵福州八閩瓦解明初征陳友定亦命諸將首攻建寧蓋所以奪敵之心喉也

建安縣 附郭在府治西本漢治縣地志云建安初分侯官之北鄉置建安縣一云建安十二年孫策所置也孫權初建安民

亂討平之尋為建安郡治晉宋以後因之隋廢郡而縣仍舊唐為建州治自是州郡皆治此今編戶一百五十四里

甌寧縣 附郭在府治南本建安縣地宋治平三年析置甌寧縣并析建陽浦城地益之熙寧三年省元祐四年復析建安縣地之半置今縣元因之今編戶一百九十九里

建安城 今府城也志云三國吳永安三年郡守王蕃始築城於溪南覆船山下劉宋元嘉初遷於溪北黃華山下梁末毀太守謝謁

柵木溪西為治所陳刺史駱文廣復徙於覆船山北而以黃華山麓為建安縣治唐大歷中州寄治縣城內建中初刺史陸

長源改築縣城為州治周九里有命天祐中刺史孟威增築南羅城五代晉天福五年僞閩王延政增築郡城周二十里尋入南唐城復故址宋紹興十四年為洪水所圯尋復修築二十年以後屢經營繕元季城毀至正十二年紅巾入寇郡守趙節因舊址

修築二十年陳友諒來攻行省參政阮德柔擊敗之益加修築明朝洪武二年拓城西南隅十九

年復增築城西包黃華山於城內有門十一永樂中閉西北二門今有門九城周十一里有奇

東甌城。

府東南十里。志云：漢吳王濞世子駒發兵圍東甌，蓋此城云。又府東南三里，有故府城，相傳漢會稽南郡都尉所治也。又府東北有古長城，相傳五代時王審知據閩，曾遷郡城於此，鄉人呼其地為薰城。

黃華山。

在府治東北，郡之主山也。脈自括蒼來，綿亘六七百里，止於此山。劉宋守華嶺之徒，郡治山西麓。五代時，王延政建太和殿於山下。宋韓世忠討范汝為屯軍山上，元至正二十年，陳友諒來寇，列營於此，守將阮德柔築城山頂，下屬舊城，以禦之。明

初改拓郡城，山遂在城中。又馬鞍山，在府東北三里，一名瑞峯，狀若馬鞍，郡之主山也。其相接者曰鷓鴣山，去城五里。○覆船山，在府西南三里，山即三國時置郡處，其相接者有鐵獅山，鐵獅之右曰紫芝山，左曰雲際山，其相近者又有梅仙等山，參差並峙。

又昇山，亦在府南三里，本名朗山，以晉司馬王朗嘗遊此，王延政據郡，僭築郊壇於山上，宋改今名。又響山，在府東五里，其山空洞，枕於溪側。

天湖山。

府北十里，郡之鎮山也。泉有奇勝，有三十六景。又將軍旗鼓山，在府西北二十里，山有四峯，左一峯如鼓，右一峯如旗，中二峯雄崎如將軍然。○梨山，在府南十五里，奇秀峭拔，為諸山最。又十里曰東山，一名蘇口山，巖崖邃谷，奇變層出，相接者曰

盤山，以寬平如盤也。又鷓足山，在府南三十里，有三峯如鷓足。又南有三門山，王氏據閩時，置柵於此，以守疆場，因以門名。又屏風山，在府西南四十里，羣峯聯屬，拱揖左右，中一山截然壁立，空翠間，狀若屏風。

鳳凰山。

府東北二十五里，一名茶山。石晉天福三年，王延政據建州，福州兵來攻，延政敗之於茶山。宋紹興二年，韓世忠聞賊帥范汝為入建州，水陸並進，直抵鳳凰山，大破之。建州平，山上有鳳凰泉，一名龍焙泉，又名御茶泉。宋以來，上供茶，取此水瀝之。山之麓名北苑，廣三十里，舊經云：僞閩龍啟中，里人張廷暉以所居北苑地宜茶，悉獻之官，其名始著。又有龍山，與鳳山對峙，有泉，宋咸平間，丁謂監茶，嘗於御茶亭前引二山之泉為龍鳳池。又壑源山，在鳳凰山南山之茶為外焙冠，俗名捍火山，又名望州山。

天寶山

府西北五十里。峯巒連屬。延袤五六十里。又西爲斗峰山。高五六百丈。山形左右低而中高。高處方平如斗。因名。又吉陽山。在府西北百里。接延平府順昌縣境。其南曰高陽山。山高峻。日出則光先照。因名。又有高峯山。在府西南百餘里。亦接順昌

縣境。層巒疊嶂。千態萬狀。中峯挺然特秀。高五千餘丈。登其巔。俯視羣山。望大海如襟帶。岡也。山之東麓曰郭巖。相傳漢時郭仙得道於此。○洋峯山。在府北七十里。屹然特出。衆山中。頂甚平曠。相峙者曰鷄籠頂山。山根盤踞數里。其巔狀若鷄籠。

天堂山

府東北百里。高出羣山。林木蒼鬱。其巔高明爽。登者如置身霄漢之上。又東北十里有擎天山。兩峯卓立。一峯尤爲圓秀。高插雲霄。如天柱然。又辰山。在縣東北百四十里。山高。大登其巔。可望海。日初出。上有逍遙。飲坑。牛頭。三峯。旁有牛心。蘆竹。

諸洞。又有蛟窟。深不測。○銅場七峯。在府東二十五里。有七峯連屬。又大霧巔。在府西北八十里。嶺高寒。至冬常有積雪。又徐將巖。在府北三十餘里。有前後二巖。峭拔寬廣。相傳昔有徐將軍者。曾駐兵於此。黃巢入閩。鄉民避巖中。得活者千餘人。

建溪

卽建江也。有二源。一曰西溪。在府城西。自浦城崇安兩派而下。會建陽諸溪之水。至城北。又分爲二。復交會於城西。南臨江門。外稍南。合於東溪。一曰東溪。在府城東。自松溪政和而下。至城東南。政和門外。繞而西。會於西溪。兩溪合流。謂之大溪。五代晉

天福五年。閩主曦遣將潘師達。吳行真。將兵擊王延政於建州。師達軍城西。行真軍城南。皆阻水置營。焚城外廬舍。尋爲延政所敗。卽此水也。南流入延平府境。溪中灘險。林立。行者憚之。餘詳見大川建江。

安泰溪

府東百里。源出古田縣。又有順陽口溪。在府東七十里。相近。又有東莨口溪。俱出古田縣界。下流入於東溪。○漁溪。在縣東北五十里。又縣東北百里。石川石濼溪。俱出政和縣界。流入東溪。志云。府東北九十里。有千源溪。源出政和縣境。入古田縣

界。流會東

莨口溪

吉陽溪

府西北五十里。源出延平府順昌縣界。流入境。經葉坊驛口。入於西溪。志云。府城西十里有萬石溪。源出西溪三十里之西。廣濼山。流入西溪。溪口有灘。名萬石灘。亂石碁布。灘水迅急。○紫溪。在府東北百二十里。源出松溪縣之皆望山。又有壺溪。

在府西北百五十里。源出浦城縣之漁梁嶺。下流皆入於西溪。志云。府西北百十里。水吉鎮有清潭溪。亦出漁梁嶺。至此爲潭。有渡通浦城縣。

璜溪

府西南七十里。其上流接崇安縣武夷山水。下流匯諸山澤水。經房村口入大溪。溪流委曲若璜。因名。溪旁羣山森峙。支流畢集。又有房村口溪。在府西南九十里。亦流入大溪。○大雪山龍潭。在府西北。上有山壁立千仞。飛泉瀉空而下。潭側空洞。常有

風雷之聲。又東山林龍潭。在府西。石壁峭拔。潭據其巔。廣數丈。深不測。環潭竹木葱蘢。登者扳懸而後得至。

籌嶺鎮

府東南百二十里。宋建炎中。置籌嶺砦於籌嶺上。元改爲巡司。明朝洪武四年。改置於嶺下龍門橋頭。卽今司也。又營頭巡司。在府西北百十里。正統四年。設於水吉鎮之營頭街。因名。○東遊場。在縣東百里。元至正中。置東遊稅課局。明朝因之。又

府四百六十里。上洋口有稅課局。亦元至正中。建明朝仍舊。

黃孫寨

府西南九十里。志云。卽今房村上里也。宋置黃孫寨。又府東有黨口寨。府南有埃竹寨。西南有赤岸寨。俱宋置。又水西寨。在府城西。宋紹興二十年。以賊寇竊發。撥泉州兵駐守。尋建爲寨。又水吉鎮有都巡簡砦。亦宋置。并置水吉驛於此。俱元未廢。

聞見錄。府東百里有忠溪口山。溪險阨。爲建安古田之交。盜賊往往出沒於此。

城西驛

在府城西南通濟門外。元爲城西站。洪武二年。改爲驛。又葉坊驛。在府西北四十五里。元葉坊站也。自崇安浦城沿溪而下者。皆會於此。又太平水驛。在府南四十里。元爲太平站。俱洪武二年。改爲驛。志云。府治西南臨江門內有富沙驛。舊置於府

西平政門外。曰富沙館。宋紹興十年。移建於城內。改爲驛。祝穆曰。府城北有大伏洲。或以爲卽富沙。閩主曦封其弟延政爲富沙王。蓋以此名。又有豐樂驛。在府南六十里。亦宋置。元廢爲豐樂舖。

平政橋

在府西平政門外。舊有浮橋。宋乾道初，郡守陳俊卿始累石爲址，架木爲梁。後屢圯屢復。明朝洪武元年，指揮沐英重建。凡爲址十有一，而梁以木上覆屋。凡三百六十楹。後復屢有廢置。建江經此，約束而出。如在山峽中，水盛時，懸流一二丈，牽挽甚艱。又七星橋，在府城南，舊亦爲浮橋。元至正二十五年，僧智源改建石橋。南岸爲址十有五，而梁以石長三十二丈。溪之中，因沙洲，斲石爲路，長二十二丈。北岸爲址五，而梁以石長十丈。至今爲民便。

建陽縣

府西北百二十里。東北至浦城縣二百里。西至邵武府百六十里。本建安縣地。晉太康四年，析置建陽縣。屬建安郡。宋齊因之。隋復省入建安縣。唐武德四年，仍置建陽縣。屬建州。八年省。垂拱四年，復置。宋景定元年，以縣之唐石里嘉禾生，改爲嘉禾縣。

元復舊，今編

戶二百十里。

大潭城

在縣治西。志云：昔閩越王築城於此，以拒漢。下瞰溪潭，因名。今有大潭山，山勢蟠屈。史稱吳王以六千人屯大潭，卽此也。其山亦名臥龍山，一名登高山，以邑人九日多遊此也。郡志：縣一名建平，相傳漢建安十年，吳析建安之桐鄉置。晉太元中，始改建陽。似愷五代時，王審知置城於此。西北迤山，東南瞰溪。元末陳友定卽故址作四門。明朝永樂十四年，西北二門爲水所圯。宏治初，始甃以磚石。嘉靖二十四年及三十年，相繼修葺。萬曆二十五年重修。有門四，今城周六里有奇。

閩王城

縣北三十里。相傳王審知所築。其中殿基猶存。今土阜周迴，隱隱如城。外有水田環繞。蓋城濠云。今土人呼其地曰王殿村，亦曰城村。

東山

縣東十里。雄壯秀麗。中有一峯，高出羣山，曰妙高峯。其相接者曰橫山。又縣東北三十五里有硯山，上有石，端平如硯。下有芹溪九曲，環繞其下。流注於交溪。事林廣記以爲第二十八福地。又蕉源山，在縣東北五十里。巖峩削拔。登者曲折五里。事林廣記以爲第三十一福地。又鼓角山，在縣東北百里。三峯鼎峙，狀如鼓角。上有龍池。○時山在縣東南二十里，高五百餘丈。凡十三折，始造其巔。其陽小山排列，又庵山在縣東南七十里，接甌寧縣界。山高萬仞，峻絕難登。絕頂有泉。

西山

縣西北七十里。周圍百里。四面壁立。山頂平曠。中有良疇數十畝。可耕可桑。其下澗水通舟。委蛇旁達。頂有石城遺址。蓋昔人築之以避兵者。宋蔡元定讀書於此。其對峙者曰蘆峯山。接崇安縣界。朱子築草堂讀書其中。名曰雲谷晦庵。在焉。其山羣巒四合。外密內寬。地氣高寒。飛雲旋繞。林泉澗石。奇勝不窮。朱子曰。蘆峯山自西北橫出。以其脊爲崇安。建陽。南北之境。環數百里。之山未有高焉者也。其東曰赫曦峯。山高萬仞。四圍峭絕。絕頂平坦。雲濤彩翠。昏且萬狀。本名東坡。朱子易以今名。又百丈山。在蘆峯之北。上有石磴。石梁。崖澗絕勝。又北爲章山。高廣亦百餘仞。○九峯山在縣西北四十五里。有九峯聯峙。宋蔡沉讀書於此。又西北數里曰集公山。本名石壁山。宋江側集弟子講學於此。因名。

太平山

縣西三十里。峯巒秀偉。峭拔千仞。爲縣土山。有寒泉林。朱子葬母於此。築舍墓旁。曰寒泉精舍。又玉枕山。在縣西南五十里。考亭在其麓。唐侍中陳遜所創。朱子築竹林精舍於此。後更曰滄洲。其前曰翠屏山。有兩峯相峙。蒼翠如一。一名羅漢山。○鷹山在縣西九十里。宋游酢讀書處也。又縣西有唐石山。一名大林谷。有巨石方廣。相傳唐時異人遊此。因名。宋末謝枋得自信州敗走入唐石山。轉茶坂寓逆旅中。旣而賣卜於建陽市。志云。唐石山與九峰山對峙。

白塔山

縣西北百三十里。山巔有石。突立如浮圖。夜常有光。一名天燈山。志云。山足跨崇安。鉛山。邵武。建陽四縣。高數千仞。四麓皆有半山庵。以宿遊人。上有殿宇。其旁巖洞泉石。類稱奇勝。又毛盧際山。在縣西百餘里。秀拔冠於羣山。相近有武仙山。巔有石筍峯。高千餘丈。○闌干山在縣北四十里。與武夷山相對。山半有石室。山麓古木周列。如闌干。然又大同山。在縣北百里。山雄峙千餘丈。周四十里。上有瀑布。懸流數十仞。接浦城縣界。

蒼山

縣西南七十里。亦曰蒼峯山。絕壁摩空。一名龜嶺。又洪山。在縣東南五十餘里。接甌寧縣界。臨溪有洪灘。二山皆高聳。與大同。白塔庵山。爲縣境五高山。○玉田峯在縣西南七十里。尖如削玉。高出雲表。一名美女山。又名草山。巖有三峯。競秀又合掌峯。在縣西南百里。跨邵武及順昌二邑界。

錦溪

在縣東一名交溪其源有二一自崇安縣之崇溪合武夷水流入境一出縣西毛虛滌山交注於東山下南流達於建溪縣出美錦有小西川之名故縣治南有橋名灑錦而溪亦稱錦溪也明初吳深攻建寧陳友定將阮法柔屯錦江逼深陳後深出戰

爲敵所

獲卽此

考亭溪

縣西南五十里其上有源有二一曰麻沙溪出縣西七十里沙鎮一曰莒口溪出縣西南之蒼山流數里而合經玉枕峯後彎環五里溪中沙汀湧現如龍舌然曰龍舌洲朱子號爲滄洲溪之北有考亭書院相傳唐末侍御黃子稜構亭以望其父墓處或曰陳遜所建也本名望考亭因爲考亭里朱子晚年居此理宗朝詔立書院書扁額賜之溪流經此淳滋如鏡俗名書院潭又東南流會交溪而入於建溪又雙溪在縣南六十里源出縣西百里溪澗中流合考亭溪復分出爲二支會於交溪永樂中右支爲洪

水所涇

玉溪

縣東南六十里源出庵山一名將溪流達洪灘而入於交溪志云縣南六十里又有玉溪流達縣南二十里長湍鋪又南有南溪亦流合焉並注於交溪又有長平溪源出毛虛滌又武溪亦出焉合長平溪而東亦注於交溪○徐墩溪在縣南二十五里源出順昌縣接界之五峯山流至此可通舟楫亦流合

交溪志云縣境諸溪以數十計皆自交溪而入建溪也

漳灘

在縣南三十里錦江之中或曰卽樟槎灘也在蓮臺山下危石森列舊不通舟元季鑿之舟行最險輿程記自崇安縣舟行七十里而至興田驛又五十里經天灘挂灘走馬灘及考亭溪又五十里經漳灘又九十里而至建寧府志云縣南數里又有鄭

灘縣西二十餘里有潮灘亦名

小淵灘皆羣灘中之有名者

蓋竹鎮

縣南二十五里。石晉開運元年。南唐將查文徽擊建州。王延政自建陽進屯蓋竹。即此。又麻沙鎮。在縣西七十里。宋建陽劉氏世居於此。理學功名爲世所宗。○沙砦在縣西五十里。志云。宋時以縣西北唐石上中下三里地。遠民悍。置砦於木坪里。以控制之。宣和初。遷於此。元廢。又后山。河泊所。在縣西十里。洪武十六年置。正統六年省。又有后山稅課局。本宋大觀三年置。曰稅務。明朝洪武三年。改爲稅課局。正統六年。革。十三年復置。

建溪驛

在縣南。水驛也。宋置。政和中。遷於縣西。改爲東陽驛。元因之。明朝洪武二年。復遷於此。改今名。建陽遞運所。亦置於此。又東峯馬驛。在縣西三十里。宋置於麻沙鎮。爲麻沙驛。元因之。明朝洪武二年。移建於此。改今名。

東津浮橋

在城東景陽門外。永樂八年。因舊址重建。用舟三十。聯維以鐵索。成化以後。修廢不一。又朝天橋。在城南門外。舊名灑錦南橋。宋紹興中。亦因舊址建。灑水十三道。疊石爲址。高五丈。而梁其上。仍構屋七十三間。覆之。橫跨雙溪。上。明朝永樂以後。壓圯。屢復。又拱辰橋。在城北駐節門外。舊名灑錦北橋。宋紹興間。亦因舊址重建。凡十八間。上覆以屋。凡八十七楹。一名童遊橋。淳祐中。重修。更名淳祐。明朝洪武九年。更修改今名。永樂三年以後。修廢不一。○雲衢橋。在縣西南三十里。其地所謂建陽書坊也。宋建爲商旅輻輳之所。俗名建陽大橋。

崇安縣

府西北二百四十里。東至浦城縣百九十里。西北至江西永豐縣百三十里。西至江西鉛山縣百三十里。唐爲建陽縣地。五代時。王閩置溫嶺鎮。南唐保大九年。改爲崇安場。宋淳化五年。升爲縣。城邑考。縣舊有土垣。明朝正德初。因舊址增修。隆慶初。始築城。周五里有奇。編戶八十七里。

武夷山

縣南三十里。峯巒巖壑。秀拔奇偉。清溪九曲。流出其間。明朝項喬曰。武夷九曲。據地不過三里。而奇勝殆難悉記。山川之間出者也。餘詳名山。

白石山

縣北三十里。山皆疊石狀若樓臺。巖有石室。又有三井。其南五里曰檜巖山。三峯森立。蒼檜彌望。又濟拔山。在縣北五十里。有石壇飛瀑之勝。旁爲龍湫。凡九穴。水清如鑒。縣東北七十里。又有石龍山。接浦城縣界。亦名石龍岡。○屏山。在縣東南五十里。三峯森立。中一峯獨聳如屏。劉子翥世家於此。學者所稱屏山先生也。又仙洲山。在縣東六十里。山有兩峯。一尖一方。中多奇勝。其支隴爲起賢山。劉屏山。朱晦庵講學於此。志云。縣東北六十里有寨山。五季及宋皆嘗憑險立寨於此。爲戍守處。又百丈山。在縣東七十里。巖壑幽勝。與浦城。建陽縣。接界處也。又有竹湖山。在縣東南七十里。下有天湖。亦接建陽縣。

三髻山

縣西北九十里。三峯鼎峙。狀如螺髻。北跨廣信。西抵邵武。鬼然爲萬山之宗。又白塔山。在縣西百里。志云。山高數千仞。雲磴十八折而上。舊名龍濟山。後改今名。山之東麓復有三峯秀聳。名筆架山。其南麓入建陽。西麓跨邵武。北麓接鉛山。今詳見上建陽縣。○岑陽山。在縣東北八十里。有岑陽關。接江西上饒縣界。又銅鉞山。在縣東北九十里。最高聳。接浦城縣界。

分水嶺

縣西北七十里。爲入閩第一山。分水關在其上。有二水發源嶺下。一入江西界。一入福建界。卽崇溪上源也。○赤嶺。在縣南。石晉開運二年。南唐攻建州。自崇安進屯赤嶺。王延政遣兵拒之。列柵水南。及戰。爲南唐所敗。或曰。今縣南有赤石驛。卽其地矣。

蕉嶺

縣西北八十里。接上饒縣界。舊建砦於此。今爲蕉嶺關。又梅嶺。在縣東北六十里。嶺極高峻。或云漢元鼎中東越反。發兵入梅嶺。殺漢校尉。卽此嶺云。又檀香嶺。在縣北五十里。志云。昔汀邵寇亂。鄉人立寨於嶺上。以禦之。嶺多檀木。因名。○溫嶺。在縣治西。一名營嶺。基延數里。五代時立溫嶺鎮。以此名。又黎嶺。在縣東七十里。高聳爲邑之望。嶺路舊爲通衢。依山險阨。行者病之。元延祐五年。縣尹夾谷山壽開鑿。遂爲坦途。又東半里許有斗米嶺。亦通道所經。懸崖瞰水。久而崩圯。明朝正統五年。開鑿修砌。人

以爲便。又五峯在縣東八十里。曰金鷄。曰蓮花。曰清湖。曰石畚。曰石廬。皆爭奇競秀。

崇溪

在縣治東南。有二源。一出縣東北岑陽山。承諸山溪壑之水。西南流。繞城北一里。而爲東溪。一出分水嶺。東南流。匯諸溪之水。經縣西北十里大宮橋下。支分爲陳澗。其正流亦至城北一里。會於東溪。是爲西澗。陳澗之水。則由治西貫於中城。達於南郊。委蛇十里。支分廣漑。謂之清獻渠。宋趙抃所鑿以澑田者也。西溪會於東溪。遶縣城東而南下。是爲崇溪。俗名大溪。又南經赤石渡。又南納武夷九曲諸水。經黃亭而南。入建陽縣界。志云。縣南溪中有羣灘。錯立。其得名者以十餘計。而東南七十里之天灘。崖石尤爲峻急。

雙溪

縣西北四十五里。源亦出分水嶺。流經此。達於西溪。又有玉冰溪。源出縣東北四十里之瑞巖。下流入於東溪。又梅溪。源出縣東七十里西坑嶺。分爲內外白水。西流復合。又西南合於大溪。○九曲溪在縣南三十里。出縣西四十里三保山。東流經大源山。合諸溪水。歷武夷羣岫間。紜紜九曲。出石鼓渡。合於大溪。志云。縣境諸溪以數十計。類以崇溪爲壑也。

岑陂

縣東南三十里有四源。一曰籍溪。出縣東黎嶺。一曰潭溪。出縣東六十餘里之拱辰山。一曰羅溪。出縣東北之梅嶺。一曰黃石溪。出縣東南柳源村。會於岑陂。至黃亭而注於大溪。又縣西南十餘里有高蘇陂。合羣溪之水而注大溪。又有下陂。合諸溪水。由黃亭西溪而入大溪。○壓衙洲在縣治東南。東西二溪合流。經此。岐而爲二。至洲尾復合一。繞縣治而東出云。

分水關

縣西北分水嶺上。接江西鉛山縣界。爲江閩之襟要。五代至宋。皆置寨於此。嘉定間。郡守史彌堅增修。後廢。開慶元年。修復。并置大安驛。元廢。明朝洪武初。復置關。設巡司戍守。亦曰大關。舊志云。崇安有八關之阻。八關者曰分水。曰溫林。路出江西。

鉛山及上饒縣。曰峯陽。路出江西上饒及永豐縣。曰桐木。曰焦嶺。曰谷口。曰察竹。曰觀音。皆接鉛山及上饒縣界。大約峯陽最居縣境之東北。陡入永豐縣界。又東達浦城之二渡關。控臨山溪。最爲衝要。而桐木僻在縣境之西。百二十里。西北入鉛山縣界。高山壁立。稱爲險阨。自桐木而東北。爲焦嶺關。山蹊窄狹。登陟甚艱。其分水。峯陽之中者。曰察竹關。路徑寬平。往來差易。其觀音谷口二關。久經堵塞。故迹漸堙。大約分水。溫林峯陽三關。商旅出入。恆爲孔道。桐木焦嶺谷口察竹觀音五關。雖接連江右。而羊腸鳥道。人跡罕至。惟桐木關尙通行旅。其附近者。三港江墩。諸村落關口。舊設關樓敵臺。蓋江閩多故時防禦處也。近志縣有溫嶺觀音諸峯。其水自縣西北三十餘里四渡口達於西溪。蓋卽溫林觀音二關矣。邱雲霄曰。分水關北瞰烏石地。狹人稀。左潛斜徑。自白鶴仙澆。可繞關左而出也。大安楊莊。皆可貯水草。便應援。昔人設兵營焉。其觀音關左連分水。右達溫林。遠瞰倒鐘嶺。凡三十里。爲山前地。可屯衆。由上路坂黃柏坂。則西與分水路會。關以內。由地源三十里。至赤水湖。山松嶺後發龍坑。蹊出大塢。始與溫林路會。地視諸關爲獨僻。在此守關口。阨間道矣。又溫林關與察竹觀音。向稱三關。皆外控上饒。分道通關。喉束衝信。舊設巡司。地曠民聚。坡嶺易登。關以外約二舍。爲山前。左連上路坂。而達分水。右通榆溪。而至船坑。關以內約二舍。至觀音關。察竹關在縣北九十里。出關五十里。爲榆溪。上饒屬地也。入關十五里。爲董家坑。自此而車盆坑。而毛連坑。而坑口。上乾原。下乾原。數村相望。可以應援。曰坑口。東踰茅嶺。出周畚磨地。西五里。爲上長壩。十里。爲下長壩。皆可聯絡。蕉嶺關則西察竹。東峯陽。三關以北。統會於榆溪。而焦嶺爲險。關南五里。西至水碓壠。由橫逕。至後官坑。皆深林窄徑。攀援而出。至吳家畚。始通察竹。東二十里。爲水歷上村。下村。又五里。爲大渾小渾村。皆有民居。峯陽關則東接浦城。而銅鼓山障之。稍北。由牛尾兜。出上饒縣。封禁山。廣谷深林。常爲盜藪。關外內皆險。林深徑窄。若山榆溪南入。懸崖陡削。措足殊難。關北三十里。有交州巡司。諸關總道也。其地名八方。厥越坵。底過茅店。由棧道而達峯陽。稍西。由江墩後山黃龍巖。九曲溪。溯流而北。亦通榆溪。此間道所當防也。而桐木關東通建陽縣。西嘉禾里。西通鉛山黃柏坂。南通邵武光澤縣。北通縣西北之周村。里四達無險。其西自桐樹原至三港。可通大竹嵐。小竹嵐。入縣間道也。

雙溪寨

縣西北四十五里。卽雙溪水口也。其南十餘里爲四渡寨。舊嘗設兵戍守。又縣境舊有翁坑。楊原。將軍。點村。劉家。棠嶺。檀香嶺等七峯。志云。分水嶺有故閩王砦。又縣東二十餘里有閩王戰場。蓋昔時習戰處。○黃亭巡司在縣南三十里。又縣東八

十里。有七市巡司。東北六十里有墟頭巡司。俱元至大四年置。至正末廢。又將村巡司在縣西南三十里。亦元至大四年置。洪武初改爲尾村巡司。十四年置。

長平驛

在縣治南。水驛也。元置崇安驛。明初改今名。崇安遞運所亦置於此。又大安驛在縣西北三十里。明初自分水關改置於此。又西北二十里卽分水關。又北二十里卽鉛山縣之車盤驛也。洪武八年并設大安遞運所於此。又與田驛在縣南七十里。

明初置南至建陽縣七十里。○赤石驛在縣南五十里。又縣治西有武夷驛。又西北三十里有楊家驛。分水嶺上爲分水驛。志云。俱宋紹興中置。後改廢。

繼賢橋

在縣城南。宋建。崇溪上。本名畫錦橋。又名忠精橋。亦曰青雲橋。後圯。屢經改置。又廣福橋在縣北一里。東西二溪合流處也。宋端平中建。初名德星橋。後曰濟川橋。一曰慈濟橋。後屢圯屢復。又月溪橋在縣東六十里。路出浦城。爲往來徑道。

浦城縣

府東北二百七十里。東南至浙江龍泉縣百八十里。北至浙江江山縣二百三十里。東北至浙江遂昌縣二百四十里。西北至江西永豐縣百八十里。漢治縣地。建安中置。漢興縣屬會稽郡。吳永安三年改爲吳興縣。屬建安郡。晉以後因之。隋省入建

安。唐武德四年復置。改曰唐興。屬建州。尋廢。載初元年復置。天授二年改曰武寧。神龍初復曰唐興。天寶初改曰浦城縣。宋因之。今編戶百五十八里。

漢陽城

在縣北。漢元封元年兵入東越。故粵衍侯吳陽以其邑七百人反攻粵軍於漢陽。卽此城也。志云。今縣城亦漢東越王餘善創築。後唐爲浦城縣。後唐應順初楊吳信州將蔣延徽攻閩。敗閩兵於浦城。遂圍建州。卽此。元至正二十三年因舊址修

築。周七里。二十六年明師下閩。先克浦城。守將以城大難守。減東城之半而築之。洪武二年城廢。正統十四年以處州礦賊犯境。復築土城爲保障。成化六年議改營石城。十年城始就有門五。城周十里有奇。

越王山

在縣治東城環其上。山勢獨高，傍瞰大溪。左接金雞嶺，相傳漢時東越之喉臺也。東隅有越王行宮遺址，尚存。志云：金雞嶺道通處州龍泉縣，稍東北，又有橫山峯，巒橫亘如屏，與越王山岡脈相接。又縣治北有阜華山，以宋置皇華館而名。○吳山在縣東五里，四面奇秀，爲邑之望。山下多吳姓，漢伐東越，得吳氏六千戶，別屯大澤，卽此處也。上有巖洞，俗名燕巢巖，有石穴，瀑布亦名石竇。山下有吳家灘，又夢筆山，在縣西五里，本名孤山，梁江淹爲邑令，嘗遊此，因名志云。縣城西德星門外有西巖山，五代時王閔將章子鈞屯兵於此，以拒南唐。宋眞文忠公築西山精舍於此。

漁梁山

縣北四十里，舊志云：天下十大名山，魚梁其一也。其水南流爲建溪，北流爲信溪，里人多堰水養魚，故名。地甚寒，諺云：無衣無裘，莫過魚梁。宋時置魚梁驛於此。建炎三年，韓世忠討苗傅二賊，自衢信進，至魚梁驛，與賊遇，賊驚曰：此韓將軍也。遂潰。今通衢所經，其相近有船山，山勢高平如船，前有玉女峯，又百向山，在縣西北六十里，俯臨大溪，其勢挺拔，四面皆見。○蓋仙山在縣西北九十里，一名浮蓋山，志云：山介衢信處三府之間，周圍三百餘里，又泉山在縣東北六十里，一名泉嵩，頂有泉二派，一入建州，一入處州，或曰漢書朱買臣言東越王居保泉山，蓋謂此山云。

銅鈹山

縣西北百里，高峻干雲，北接江西上饒縣之封禁山，南通崇安縣之岑陽關，中有泉，林巒環接，多事時，易於藏聚，今亦見崇安縣。又石龍山在縣西北七十五里，三峯鼎峙，中一峯曰鵝兒峯，旁有池，周數丈，又有鷄子白花等巖，亦接崇安縣界。○百丈山在縣西南百餘里，尖峯嵯峨，高聳千仞，中有九井，謂之旗湫。接崇安建陽二縣界，又大同山亦在縣西南百里，見上建陽縣。

楓嶺

縣北七十五里，高險林木青葱，蹊徑逕仄，爲浙閩分界處，嶺旁地高敞寬平，可爲屯營，有戍兵駐守，嶺之北麓，俗謂之大竿嶺。又梨嶺在縣北六十里，危峯仄澗，飛閣懸崖，至爲峻阻，亦曰梨園嶺，以其地宜梨也。俗謂之五顯嶺，以上有五顯廟也。宋楊億

云天下之水皆東。梨嶺之水獨北。蓋水從嶺下而北匯。億言非篤論矣。又折桂嶺。在梨嶺北十里。一名桂枝嶺。又名泗洲嶺。俱當往來通道。詳附見浙江重險仙霞關。

柘嶺

縣東北百二十里。接浙江麗水縣界。高千餘仞。絕頂周迴百餘步。舊記柘嶺峻絕。勢徹蒼穹。狹道陡絕。不通牛馬。是也有江邨。溪出焉。亦謂之柘水。謝靈運云。柘水出柘嶺。以地多柘樹而名。下流合於大溪。又富嶺在縣東三十里。路出龍泉。○駐嶺在縣西九十里。嶺極高峻。路出崇安。又縣西北百里有查源洞。查溪之源也。接崇安縣界。石壁懸崖。宋紹興初。奸民據險作亂。設臨江西安二砦以禦之。紹興初。寇張海作亂。民多避入。

南浦溪

在縣城南。縣以此名。卽建江上流也。亦謂之大溪。源出漁梁山。又柘水自柘嶺流合焉。縣亦兼柘浦之名。自縣北折而東南。復遶出縣西。又折而東南流。紆迴縈抱。縣境諸溪之水悉流合焉。又南合崇建二溪。爲甌寧縣之西溪。志云。溪經縣南五里。

爲火燒灘。列石巉峴。溪流險狹。又南五里爲將軍灘。兩山夾峙。溪經其中。水石憑陵。舟行震盪。舟入建江。二灘其發軔之始也。又南十五里爲茅洲灘。又西南爲邱源塔嶺諸灘。水石巉峴。節節阻險。餘詳大川建江。

臨江溪

縣南三十五里。其上游爲查溪。東南流。至臨江鎮。入於大溪。志云。臨江鎮卽俗所稱觀前也。爲津梁之要會。又有新溪。出縣西南百丈山。石陂溪出縣西南七十里。大湖山。洪源溪出縣西。夢筆山。東源溪出縣南三十五里。西洋山下流皆入於大溪。

二渡關

縣西北百十里。西至峯陽關三十里。又西至江西永豐縣五十里。爲入閩之間道。其地山嶺巉峴。溪流回繞。東西二面皆爲橋以渡。因曰二渡關。又太平關。在縣西八十里。又西有梅溪關。西北接永豐縣界。自梅溪而西出梨口隘。則西達崇安之道。

也。○梨關在縣北梨嶺上。舊嘗置關。以控險阻。志云。縣北三十里至仙陽街。宋初置遷。陽鎮。并設監官於此。紹興初廢。俗曰仙陽。北至梨關三十六里。又北至仙霞關七十里。

盆亭鎮

縣西北九十里。山谿險仄。蹊徑四通。宋元豐三年。建盆亭砦。元因之。明朝洪武三年。改置巡司。亦曰盆亭關。西去二渡關二十里。志云。鎮舊有盆亭驛。宋元時置。兩山並聳。驛居其中。其地本名細泉村。鄉人隨泉勢作曲堰數十處。其狀如盆。因曰盆。

亭也。元末驛廢。又益亭相近有唐峯洞。向爲嘯聚淵藪。○溪源巡司在縣東北六十里。地連江浙。寇盜出沒。宣德八年。御史楊禧。巡察銀場。請置司於此。又高泉巡司。在縣東七十里。洪武二年置。南行記。自縣境而東南。歷高泉。鴈塘。蘇嶺。交陽。登嶺。諸關隘。與

浙江龍泉

縣接壤。

保安寨

縣西北四十餘里。船上。宋置。又西安砦在縣西六十里。又縣南四十里有臨江砦。亦曰臨江鎮。宋紹興中。置二砦。以禦查源寇。寇後廢。又靖安砦在縣西南七十里。舊名裏洋砦。宋乾道四年置。元廢。○官田砦在縣北四十五里。宋慶元二年置。又載初砦在縣東北六十里。志云。宋紹興五年。上湖營村盜起。立砦禦之。俱元廢。又縣西南九十里有大湖廢驛。魚梁山側有魚梁驛。臨江砦有臨江驛。俱宋置。今改爲大湖等舖。

南浦橋

在縣城南。舊名縣南橋。宋隆興初建。一名上官橋。蓋是時權縣事者爲上官端儀也。後廢置不一。洪武九年。疊石爲址。架木爲梁。上覆以亭二十三間。成化以後。皆因故址修治。又萬安橋在縣城東。亦跨南浦溪。初名青游橋。洪武初。建於縣東北數里。成化中。始移治金鳳門外。亦疊石爲址。而梁其上。後皆因舊址修葺。又三里橋在縣城北。洪武十五年建。景泰以後。因故址增修。○古湫橋在縣西南五里。元大德間建。洪武十七年以後。屢經修葺。疊石架梁。凡數十丈。跨大溪之上。有潭甚深。所謂古湫潭也。

松溪縣

府東百六十里。西北至浦城縣百四十里。東南至政和縣八十五里。東北至浙江慶元縣八十里。北至浙江龍泉縣百六十里。本建安縣地。五代初屬吳越。爲處州東鄉地。尋屬閩。立松源鎮。周廣順元年。南唐升爲松源縣。宋開寶末。改曰松溪縣。仍屬建

州。明朝宏治中。始營城址。嘉靖五年。以坑寇猖獗。因築磚城。周五里有奇。編戶六十八里。

松源城。在縣東二十五里。王閩置鎮於此。南唐升爲縣。宋遷今治。

蹲獅山。在縣治北。盤迴起伏。屹立縣後。爲縣之主山。或曰蹲獅山。嘗有道者修真於此。又西北曰萬山。卽蹲獅山來脈也。山周五十餘里。或曰以所產萬種而名。○石壁山在縣治南。削立如壁。高數十丈。下有龍潭。

湛虛山。縣南二十里。山形削拔。常有雲霧凝其上。相傳越王命歐冶子鑄湛虛之劍於此。下有石井。亦名劍池。東接政和縣界。又七峯山在縣東南二十里。有七峯連亘。迴巒疊嶺。上磨青蒼。相接者曰妙峯山。高挹霄漢。冠出羣山。又王認山在縣東二十里。

秀拔出諸山之上。宋末益王昺由浙入閩。嘗過此。賞認其勝。因名。○東山在縣東南五十里。一名吳家山。自趾至頂皆石。少樹木。舊產銀鑛。有穿穴十餘。深達盤曲。莫究深淺。取鑛者必舉火以入。宋隆興間。嘗立瑞應場。設官採銀。後廢。其南相近有南屏山。峯巒橫亘。喬木蒼鬱。儼如屏障。上多奇石。一名石林山。

鸞峯山。縣東北六十里。山勢峻拔。袤二百餘里。接龍泉。浦城二縣界。上有龍井。又皆望山。在縣西二十里。高出雲表。登之則環邑諸山皆在望中。又西南有南峰山。亦高秀。

松溪。在縣南。亦曰松源溪。一名大溪。源出浙江慶元縣松源鄉。經梓亭。營迤邐而下。經城東。出關口。渡有平樂溪。出縣之東。山西北流三十里。合松峽溪。又並流三十里。至此入大溪。合流而南。抵政和縣西境。接七星溪。下流至建安縣。爲東溪。

清泉溪。出縣西北五十里。筋竹山。東北流。經縣北。下流合於松溪。又白石溪。源出皆望山。直源溪。源出縣北之花巖。渡頭溪。亦出筋竹山下。流皆入松溪。志云。縣西北有新坑溪。源出慶元梓亭。亦流入松溪。又有雲溪。源出縣西獅子巖。南流六十里。至政

和縣入於大溪。

東關鎮。縣南四十五里。元設於瑞應場。名東關寨。明朝洪武二年改巡司。永樂中遷於馬鞍嶺。嘉靖八年遷於縣東南鐵嶺舖。萬歷中又遷於峽橋。一名乘駟橋。即今所。又縣北八十里有二十四都巡司。亦元舊砦也。洪武三年改巡司。

新窰隘。

縣北四十里。聞見錄。由縣而北。至巖下村。又三里有小關。離關二里。即新窰。入浙江慶元縣界。前往慶元四十里。由新窰而西北十里。爲竹口關。又十里爲石門隘。直通浙江龍泉縣。自新窰至龍泉計程百二十里。爲從來自浙入閩之間道。竹口關

而外。又有仙莊溪。源上凹等隘。皆有徑達龍泉。而新窰竹口。爲控禦之要地。○梓亭

砦在縣北七十里。界慶元龍泉政和松溪四縣之交。宋置砦。元改隸龍泉縣。後廢。

惠政橋。

在縣城東。宋紹興五年建。本名平政。後歷圯。歷復。淳熙十三年復疊石爲六址。而梁其上。覆以亭三十二間。淳祐中增修改。今名後復圯。明朝永樂七年以後。屢經修建。又東爲永泰橋。即關口渡也。宋嘉定中創建。後圯。明朝永樂十三年以後。屢經

修建。又通濟橋。在縣東二十五里。本名故縣橋。古縣渡也。宋慶元二年建。後圯。明朝洪武十八年

重建。永樂五年毀。正統九年重建。長五十六丈。上覆以屋。改名通濟橋。以上三橋俱跨松溪上。

政和縣。

府東二百四十里。東南至福州府古田縣三百二十里。北至浙江慶元縣百五十里。東北至浙江青田縣二百三十里。本福州寧德縣地。五代時王氏立關隸鎮。宋咸平三年。升關隸縣。屬建州。政和五年。改曰政和縣。明朝宏治中。礦賊作亂。始築城。嘉靖

間。毀於倭。萬歷初。改築今城。

周二里有奇。編戶五十九里。

關隸廢縣。

在縣南。即王閩所置關隸鎮。朱氏松曰。周禮秋官司寇有司隸。掌帥四覆之隸。閩隸與焉。疑此里之人。周時嘗爲閩隸。猶古緡雲氏。今以名處州屬縣也。王潮不知書。譌閩爲關。土人又以鎮在州東。私號曰東和。宋延平中。置縣。徙東岸口。

即今治也。

黃熊山。在縣治北。縣主山也。形如展旗。亦曰文旆山。城南又有文筆山。峯巒峭拔。與此相望。又有蓮花峯。在縣東。峯巒高峻。紫翠重疊。爲縣之勝。○洞宮山在縣東南。重疊九峯。狀如蓮花瓣。名九蓮峯。道書謂爲第三十七福地。中有谷陽地。平行產銀砂。廣

四五里。旁有夾岫如壁。宋坑治司舊址猶存。又西爲西門嶺。嶺右皆奇峯石壁。曲澗長松。爲翠屏峯。益折而南。曰東西二寶峯。峯之西山勢開豁。有平田數頃。又南復有仙人壇。香山峯諸勝。又大風山在縣東南十五里。峯巒秀拔。類廬山五老峯。

籌坑山。縣東北二十里。山高廣。峯巒泉石。種種奇勝。其最高者曰天柱峯。又東北爲池棟山。巖壁峭拔。橫截溪流。形如屋棟。下有兩穴。以洩東池之水。又銅盤山在縣東三十里。高數千仞。爲邑境之望。○望浙山在縣西三十里。一名浙山。拔地摩天。常有雲

氣蒙其上。宋紹興初。范汝爲作亂。居民多避其上。元季紅巾爲患。避此全活者甚衆。又獎山在縣西北五十里。峭拔入雲。山頂凹處有田百餘畝。中有巖洞之勝。又飛鳳山在縣北。一名正拜山。又名黃華山。通志云。元至元間。建寧路管軍總管黃華叛。號頭陀軍。營立營於山上。一云。黃華。宋時建寧左翼千夫長。嘯聚於此山。因以名。又蝸坑洞。在縣西三十餘里。據懸崖石壁間。中寬廣容百餘人。邑民常避寇於此。又縣東北有紫雲巖。志云。巖介閩浙間。高插雲表。右有龍湫。相近者又有白雲巖。山勢如屏。絕頂平衍。正統中。礦賊作亂。居人多避寇於此。

七星溪。在縣治南。源出縣東銅盤山下。迤邐西流。合衆溪之水。西南接松溪縣界。合松溪而爲建安縣之東溪。○浴龍溪出縣南三十餘里之九蓬山。西北流入七星溪。又東平溪出縣西北獎山。南流出常口。受松溪水。又導流至西津會七星溪。又有湖屯

溪。出縣東黃嶺。經池棟山下。亦會於七星溪。

苦竹溪。源出縣北苦竹嶺。南流爲十里灘。又東入福寧州寧德縣界。又雙澗溪。源出縣東南西門嶺。曲折而東流。有下園溪。出籌坑山之籌嶺。亦東流合焉。又東會諸溪入寧德縣界。卽外渺溪之上源也。

赤巖鎮

縣東南百二十里。自鎮而東至福寧州福安縣二百四十里。宋置赤巖寨。在縣東百里。明朝洪武二年改置巡司。移於今所。志云。司地屬壽寧。官屬政和。又縣西北有苦竹寨。宋置。介政和。松溪二縣間。元廢。又有東際營。在縣西南三十里。相傳唐御

史中丞李彥堅屯軍之所。又有鐵山營。在縣東北六十里。唐招討使張謹討黃巢時營屯軍處也。

雙溪館

縣南八十里。雙溪上。聞見錄。由雙溪館七十里之際洋。即古田縣界。又六十里。地名古樓。又三十里。曰官洲。又三十里。即古田東門矣。由雙溪館而東南達寧德縣。由雙溪館而西則達於府城。皆徑道也。又筠竹坑。亦在縣南。聞見錄。政和在萬山之

中。有楊源。筠竹坑。西里。嶺頭諸處。皆近古田境。往往爲嘯聚者竊掠之處。○新坑口在縣東八十里。路通壽寧縣。聞見錄。縣東北四十里有嶺腰隘。由隘而東北二十五里。曰大林原。正北二十五里。曰高林。俱達浙江慶元縣之道。又縣東南七十里。曰楊梅巷。爲達福安。寧德之道。

壽寧縣

府東北三百五十里。東南至福寧州福安縣二百里。西北至政和縣百七十里。北至浙江景寧縣百二十里。東至浙江泰順縣百四十里。本政和福安二縣地。明朝景泰六年析置。今縣治楊梅村。縣無城。編戶二十五里。

鎮武山

在縣治北。縣主山也。聳秀甲於境內。志云。縣治南有翠屏山。東有叢珠山。西有大馬山。崇峯四圍。儼然城郭。○官臺山在縣東。景泰初。礦賊嘯聚於此。官軍從間道深入。悉殲之。因置今縣。

楊梅嶺

在縣南。嶺高峻。又南有青竹嶺。道出寧德縣。行旅經此。登陟甚艱。

蟾溪

在縣治南。出縣西北大蜀山下。經縣東南流。入福安縣界。即長溪之別源也。○禾溪在縣西。源出縣西北牧童山下。東流會於蟾溪。又有西溪。出縣西佛際山。漁溪出縣西北立茂山。又茗溪。出縣南高山。源底溪出青竹嶺。下流俱會於蟾溪。

南溪。

在縣東南。出紫翠巖。與境內之平溪、尤溪、丹溪、九嶺溪合。亦入福安縣界。又有饒梗溪。在縣東。源出縣西北東山下。會楊梅洲。溪經東溪頭雙港。亦入福安縣界。又有上地溪。出縣北百里林山下。流入楊梅州溪。皆長溪之上源也。○純池在縣東。有純池

隘。聞見錄。山純池。南溪。木

洋至福安。往來通道也。

漁溪鎮。

在縣東官壘山。有巡司。志云。舊置於漁溪之斜灘。屬福安縣。景泰四年。遷置於此。仍舊名。又青草隘。在縣北。與景寧縣接界。

大寶坑。

在縣南。亦曰寶峯場。又有少陽坑、雲山坑。與政和縣界之少亭坑。俱產銀礦。流民從而盜採。馴至嘯聚剽掠。閩浙之間。景泰初。殲其渠魁。嚴爲之禁。然覲覲卒未能絕。

附見

福建行都司。

在府城內。卽元建寧路總管府故址。明朝洪武元年。改建爲建寧衛。八年。改爲行都指揮使分司領衛所。

建寧左衛。

亦在府城內。都司東。又建寧右衛。在府城內。都司西。俱洪武八年建。志云。舊右建陽衛。後革。○浦城守禦千戶所。在縣治西。成化十年增置。隸建寧右衛。

延平府。

東至福州府四百五里。南至泉州府五百五十里。西南至漳州府五百五十里。西至汀州府五百二十里。西北至邵武府二百五十里。北至建寧府一百二十里。自府治至布政司見上。至京師五千二百九十三里。

禹貢揚州地。周閩粵地。秦屬閩中郡。漢屬會稽郡。三國吳屬建安郡。晉因之。宋齊以後。爲晉安郡地。隋

爲泉州地。大業中屬建安郡。唐爲福建汀三州地。五代晉天福八年閩王延政始置鐔州。時延政自立於建州國號殷。

開運二年南唐得其地以爲制置鎮。明年改劍州。宋太平興國四年改曰南劍。以利州路有劍州也亦曰劍浦郡。元曰南

建路。大德六年改延平路。至正末爲陳友定所據守。明初曰延平府。今領縣七。

府帶兩溪之秀。兩溪建溪樵川也。控羣山之雄。噤喉水陸爲七閩要會。楊氏時曰崇山峻嶺爲其郭。郭驚湍急

流爲其溝池。清明偉麗爲東南最。蓋郡治山椒屹然險固而沿江東下實爲會城上游。元末陳友定保

據於此。豈非以地當全閩之中。不特可以自固而縱橫應援猶有可圖之會哉。諺曰銅延平鐵邵武言其險要可守也。

南平縣。附郭漢治縣地。後漢建安初始置南平縣。屬會稽南部都尉。孫權初立南平民亂討平之。卽此。吳永安三年屬建安郡。晉太康初改爲延平縣。劉宋時縣廢。五代時王審知置延平鎮。王延翰改爲永平鎮。旣而王延政僭號升鎮爲龍津縣。兼置鐔州。南唐

因之。尋爲劍州。治保大六年又改龍津縣曰劍浦。宋因之。仍爲南劍州。治元大德中復改縣曰南平。明朝因之。今編戶九十七里。

延平城。今郡治。後漢末置南平縣。晉改延平。後廢。五代時王延政置龍津縣爲鐔州。治。尋又析置延平縣。南唐取鐔州。改州治延平。尋還治劍浦。以延平縣省入城邑考。郡城宋時築有門十一。明朝因舊址增修。改門九。自城東建寧門至城南福州門皆臨

建溪自福州門至城西西永門皆臨樵川自西水門至大北門臨山澗。自大北門至建寧門城壁延袤環高岡之巔至爲險峻城周七里奇。

龍山

府治北城壁環其巔一名龍騎山又九峯山在城南峯巒九疊環繞縈迴爲郡境諸山冠真西山曰城後枕崇阜南挹大溪溪南九峯森羅雄峙天表是也又有虎頭山在縣治西形如虎踞○衍仙山在府東北十里舊名含源山其支峯曰石佛山王象

之云此山神冠天劃東南略通人跡衍仙水出

焉當城北爲大河下穿暗竇入城流入劍潭

天柱山

府西南五十里屹立凌空其形如柱又西南爲天馬山山勢騰驤形若天馬南行記曰自郡而南間道入尤溪沙縣之境層山疊嶺參錯前後大約在山峽中行其得名之山難以數計也○九龍山在府東南百二十里九峯蜿蜒如龍中有獅子巖

石壁

聳峭

湖頭嶺

府東十里面溪背山前有浮梁宋建炎中郡守張燾設伏破賊張澈於此今浮梁久廢又鹵水嶺在府西三十里背山枕溪壁立萬仞路僅通步險巖數折宋嘗置寨於此又西四十里有梧桐嶺山多梧桐宋嘉定七年置砦處○考窠嶺在府北上

有十二峯平地聳起高十餘丈中有捷路直走郡

城舊置砦於此曰鷓鼻頭尖砦爲屯兵侯望處

文筆峯

府南六里高出羣山摩切霄漢又小鷲峯在府東八里方巖奇秀狀如鷲鳥相近又有蓮花峯層巒疊嶂簇若蓮花志云府東北五里有中巖高出衆山瀑布自巖中飛下爲近郊之勝○蒼峽在府南百二十里兩岸青山迴合建溪經其間轉折而

東南出宋元豐

三年置砦於此

劍溪

在城東南。卽建江也。自建寧府南流至此。亦曰劍津。亦曰劍潭。相傳晉雷煥之子佩劍渡延平津。劍忽躍入水。化爲龍而名。亦曰龍津。又爲東溪志云。水自建寧來者。謂之東溪。又有西溪。源出汀州府境。經將樂順昌二縣。與邵武溪合。東流經王臺驛前。至砂溪口。與沙縣溪合。又東四十里。而至劍潭。東西二溪合流。俗呼丁字水。又南而爲南溪。郡人謂之三溪。以東西南三溪名也。又南行九十里。與尤溪水合。抵福州府入於海。又縣西有雙溪口。正統中。官軍自延平勦沙縣賊。行二十里。至雙溪口。道隘。賊伏發。官軍皆潰。賊遂犯延平。

吉溪

府東南四十里。源出建寧府建安縣界之蓼溪。南流入境。入劍溪。曰吉溪口。道通古田縣。爲津要處。○泰平里溪。在府南七十里。源出沙縣界黃泥坑。流三十餘里。經府西南七十里之箕箒山下。又東北流入於西溪。又雲蓋里溪。在府西南四十里。源出尤溪縣臨平嶼。流入境。又有太平。大岸。石橋溪。在府西南三十里。源出尤溪縣之丹嶺。下流俱會衆溪入於西溪。

黯淡灘

在府北五里。東溪中。志云。東溪諸灘。曰汾灘。曰竹林後灘。曰高桐灘。曰擊灘。曰黯淡灘。此下直至劍津。以接西溪。其中黯淡最險。舟過多覆溺。唐大順二年。僧無示者。結庵於此。募工疏鑿。灘勢稍平。後名庵爲黯淡院。宋天聖中。郡守劉滋復開港道。元豐中。朝命黯淡院。歲度僧一人。以導湮塞。又西溪諸灘。曰石柱。曰三門。曰小黃口。曰大黃口。曰張巖。曰虎口。曰樟槎口。曰蘇坑口。曰星窟。曰大湍。曰小湍。曰城門。曰將軍。曰黃墩頭。曰慈油。此下直至劍津。接東溪。南溪之灘。則曰劍鞘。曰嵩口。曰大傷。曰小傷。曰五港。曰天柱。曰鳩道。曰同場。曰龍窟。其中大傷。天柱。龍窟。古稱最險。諺云。大水大傷。小水遭殃。舟行惡之。宋紹興間。郡守上官惺等開諸灘。命僧祖曰董。其役漕司助錢百萬。惺復請於朝。益以百五十萬。而東溪。南溪之險。稍平。一統志。東溪之灘。五。西溪之灘。十。南溪之灘。七。凡二十有二。其水湍急。其石廉利。舟上下失勢。輒至破溺。總名爲港灘。

槃澗泉。在府治前。源出山嶽。縈迴石澗。泓深清潔。郡志云。郡居山椒。清泉自石崖竅逆而下。用鉅竹引之。綿亘數里。遍及郡城。○仙洲在城東。有山分於二水之間。俗呼仙洲。又有黃龍洲。亦在城東。

蒼峽鎮。

在府南蒼峽口。五代時爲靜江軍。宋置蒼峽寨。明初改爲巡司。并置蒼峽遞運所於此。又大歷巡司。在府西北百里。宋淳祐中置。元因之。明初仍舊。○西津鎮在府西四十里。沙縣順昌二水合流處也。五代時置鎮於此。又城東繫灘口。在東津鎮。府

西南十五里有羅源鎮。今府西門對岸有羅源鎮口。皆五代時王閩置。

黃墩關隘。

府西二十五里。又府北五十里有麻州頭關隘。俱宋置。又陽門寨。在府南。宋元豐三年置。府境又有鹵水嶺。鶴鼻頭尖。湖頭。桐嶺諸砦。俱見上。今廢。○弓兵營在府城西。西水門外。宋嘉定五年置。又有中軍帳。在府城西北田坑村。爲憑高

望遠之處。宋紹興初。羣賊葉文等從間道入寇。郡守張帶建此爲斥埃。其南有廣節。威果諸營。皆宋置元廢。

房村口。

府北五十里。與建寧府接界。自建寧而下者。至此爲水陸會集之道。傍山臨溪。據險而守。足爲府境之保障。由此而南。則支徑旁通。難於控禦矣。口蓋府北之鎖鑰也。今亦見建寧府黃孫寨。○南雅口在府北六十五里。地勢高聳。下臨溪流。有閩越

王廟。

劍浦驛。

在城東。有劍浦遞運所。俱洪武初置。又茶洋驛。在府東南六十里。宋淳祐中置。名金沙驛。元至正間改今名。明朝因之。又王

修亦曰王峯館。正德中。羣賊鄧茂七等據王峯館。遂陷沙縣。即此。又有西芹稅課局。洪武四年。置於府西南二十里之西芹鋪。正統十三年。毀於寇。成化三年。移於王峯館。又大橫驛。在府北四十里。明初置。正統間。爲寇所毀。景泰中修。又北四十里。爲建安縣

之太平水驛也。○清風舖在府東南九十里，又十里爲武步舖。正統末，官軍追敗鄧茂七餘黨於武步及清風舖，復截其舟二百於水口驛，通福州道是也。志云：府城東有明翠浮橋，舊曰明秀，用鐵絙維舟三十有八，架木其上。又城南城西有東西兩浮橋。

將樂縣

府西二百二十里，東至順昌縣百里，西北至邵武府泰寧縣百二十里。漢建安縣地。三國吳永安三年，析置將樂縣，屬建安郡。晉宋以後因之。隋省。唐武德五年，析邵武縣置將樂縣，屬撫州。七年省，垂拱四年復置，屬建州。元和三年省，五年又置。五代晉

天福八年，王延政升爲鏞州，開運三年，南唐復爲將樂縣，仍屬建州。宋太平興國四年，改屬南建州。元屬延平路。至正四年，以漳寇犯境，始築上城。十二年，復因寇擾，圍以木柵，旣而陳友定更加修築，東南臨溪，西北據山，明朝洪武初爲汀寇所毀，旋復修築，繫以磚石。

周三十

里有奇。

五馬山

縣治西南，五峯森立，如馬馳驟，城環其第五峯之巔，又西壑山，在縣治西，縣之主山也，巍然高峙，其上坦夷如壑，亦名鐘樓山，以形若鐘也。五代置鏞州，蓋以山名。又縣治後有鐘翠山，其相連者曰含雲山，卽宋楊龜山讀書處。○封山在縣北五里。

其山高，大羣峯環拱，爲邑之鎮。其支隴曰龜山，狀如伏龜，蜿蜒於城左，卽楊龜山先生歸休處也。志云：龜山在城北三里。

天階山

縣南十五里，石磴巖劣，高若升天，上有聖泉巖，山下有玉華、寶華、南華三洞，其中泉石羅列，奇詭萬端，縣稱三華，旁又有小玉華，靈源諸洞。○翠簾山在縣南五里，蒼翠高聳，如垂簾狀，其巔亦曰天湖，三面峯環，中夷而曠，有龍窟踏水，故名。稍東曰

虎頭巖，有石門，自山下通山巔，明爽可居，縣南四十里。

又有雪裏山，接沙縣界，由山麓關徑盤折二十餘里。

九仙山

縣東二十餘里，崇岡疊嶂，如龍翔鳳翥，又如獅伏牛鬪，爲一邑最高處，夏無暑氣，冬月常雪，舊傳有九真人煉丹於此。又孔子山在縣東南二十五里，層巒疊起，屹立溪濱。○百丈山在府西北百八十里，一名羊角晶，又名鈎刀山，其山三面南將樂。

北邵武西泰寧皆懸崖絕壁古木蒼藤鬱然千雲有越王較獵臺樹遺址通志山接江西南豐縣界

藤嶺

縣西二里嶺高峻起伏縈迴旁多藤蔓故名又洪嶺在縣西十八里下有蛟湖亦名蛟湖嶺道僅里許極險峻俯臨大溪又三崎嶺在縣南二十里陡峻三崎頂有泉一泓又亭嶺在縣南三里其頂崔嵬難於行路嶺半舊有亭爲行人憩息之所○五

岐嶺在縣東十五里峻絕難躋分爲五岐又鐵場嶺在縣南四十里道險峻凡五六里志云縣北七十里張源嶺嶺路盤曲凡十餘里又縣東北百里有太靈峯峯巒峭拔樹木陰翳人跡罕到又有凌霄峯在縣西南六十里登峯頂可望建寧歸化順川泰

寧四邑

大溪

縣城南其正源自汀州府清流縣流入境別源自邵武州建寧泰寧二縣界入縣境至縣城西南金溪潭合流縈紆迴繞經縣前折而東至順昌縣會邵武溪又東入南平縣界所謂西溪也

龍池溪

在縣北源出泰寧縣流經張源嶺下流合諸溪澗水入大溪又安福口溪亦出泰寧及邵武縣界至縣境合流又南入於大溪志云縣南又有竹洲溪莫溪俱自泰寧縣界流入境又有長溪自汀州府寧化縣來下流俱入大溪○池湖溪在縣南源

出汀州府歸化縣界經鐵嶺下匯諸溪澗水入大溪

將溪

縣西南五十里其地有石牌場溪源出焉東北流有灘曰將溪灘有洲曰橋洲橋洲之西又有鼈洲東北流入於大溪其相近者曰望江溪亦出石牌場流入大溪又水口溪在縣南三十里源出沙縣之黃源嶺流入境與諸溪合又有漢村溪出沙縣及

順昌縣界至縣南合流爲豐溪又有小莫溪亦出沙縣界俱北流入大溪○桃源溪在縣南十里亦曰桃源小溪源出桃源源自際而下匯而爲潭亦曰西湖一名野水引流爲溪入於大溪又瀨口溪在縣東南三十五里源出順昌縣界有瀨口溪又黃坑口

溪亦自順昌縣界流入境下俱入於大溪。

萬安砦

縣北六十里。宋元豐元年置砦，并置營於此。元因之。明朝洪武二十三年改為巡司。又有萬安稅課局。洪武六年置。○黃土寨在縣南。宋慶元二年以其地接清流縣界，民頑俗悍，特置寨備之。元廢。洪武元年復置。十三年以與清流明溪砦密邇，遂省。志云：縣東四十餘里有瀨口關。宋紹定三年汀寇邱文直等營據此，以拒王師，招捕使陳韡奮其關，賊遂降。關旋廢，今為高灘隘。又東三十里曰交溪，又四十里而達於順昌縣。

高平苑

縣南六十里。寰宇記：縣西鄉有樂野宮，東越王時宮也。高平苑亦東越王校獵之所。大夫將軍校獵謂之大校，軍士校獵謂之子校。故將樂有大校子校二村。後漢時此邑為建安縣之校鄉，則其義也。相傳越王乘象輅曲蓋，大夫將軍自執平蓋，今有平蓋村，載鳥以鳴銚鏡，故有鳴鏡山，自樂野至於遊臺之上，相去九十餘里，風俗至今好尚遊獵，職此故矣。

三華驛

在縣西，元置三華站，明初改為驛。又自蓮馬驛在縣西南六十里，宋為將安館，元至治初改為站，明初改為驛。輿程記：自驛陸行三十里而達汀州府，歸化縣界之鐵嶺隘，水行六十五里至歸化縣之明溪驛。

沙縣

府西南百二十里。東北至順昌縣百六十里，南至漳州府龍巖縣三百五里，西至永安縣百六十里。晉延平縣地。太元四年置成。於此謂之沙成。義熙中升為沙村縣，屬建安郡。宋齊因之。隋廢。唐武德四年復置沙縣，隸建州。尋省入建安。永徽六年復置。大歷十二年改屬汀州。南唐改屬劍州。宋屬南劍州。元屬延平路。今編戶百十四里。

沙縣故城

縣東十里對古銅場即沙源地。唐初置縣治此。中和四年以舊地褊窄，徙鳳林岡，即今治也。光啓初羣盜王潮自南安引兵北還至沙縣，泉州人張延魯等以其刺史貪暴請潮留為州將。潮因引兵圍泉州，尋陷之，縣舊無城。宏治四年始

築磚城北倚山南

臨溪周十里石奇

鳳岡山

縣治北縣鎮山也。縣治溪南。又有鳳凰山。山形如鳳。多梧桐。其側有虎邱山。形如虎踞。又越王山。在縣東南十里。相傳越王嘗屯兵於此。山側有砦。俗呼越王寨。山之下有深峽。其南曰武仙山。山高峻。頂夷曠。可容千人。山拱揖縣治。俗呼報衙山。一

名天馬山。○淘金山在縣西六里。上多奇石。頂平曠。可容千人。相傳邑未城時。嘗屯軍於此。一名屯軍山。又居民嘗

避寇於山上。下有泉。自山巔飛流。清澈如鑿。上有洞天巖。石壁峭絕。倚險架閣。其旁泉石殊勝。山之東曰獬豸山。

七朶山

在縣城東南。太史溪濱。石壁峭立。竹木森聳。如屏障然。宋李忠定名其峯曰朝陽。妙高。真隱。桂花。凝翠。東峯。凝翠。西峯。其最西一峯曰碧雲峯。俗亦謂之七峯山。○巖山在縣東十里。頂有砦。昔人避兵處。其右稍平。曰平山。又東曰聚峯山。羣峯環遶。

奇秀可愛。上有二平石。平廣容數百人。又橫山在縣東南四十里。山勢橫截。接尤溪縣界。又縣東四

十里有金鳳山。磅礴數里。入南平縣界。又有天台山。在縣東北四十里。又東北接順昌南平之界。

陳山

縣西南二十里。山尖聳。正統中。草寇鄧茂七等嘯聚於此。屢犯建寧。延平。官軍進擊之。分兵伏後坪。後洋及沙灣之南。賊來戰。敗死。其黨復推鄧伯孫聚後洋。官軍進討平之。志云。鄧茂七嘗於此名陳山營。賊平。官兵夷平山。後洋在漳州府寧洋縣界。

又西南數里有呂峯山。盤踞數十里。高出雲漢。山頂舊有泉。七泓。俗呼呂七塘潭。相近者曰虎頭山。高入雲際。勢如展旗。下視沙城。如在履舄。又有鐵壁山。蒼黑如鐵。奇峭如壁。志云。縣西南六十里有龍會山。與華口澗相對。衆山環抱。如龍盤然。因名。又西南

數里爲蓮峯頂山。卓起一峯。中分九派。溪流分注。絕頂有石。最平曠。又西有莊山。亦高峻。頂平衍。爲村落。旁有真人峯。

將軍山

縣北五十里。山勢高峻。宋紹定三年。山寇嘯聚其中。招捕使陳韓討平之。因名。○幼山在縣西北百二十里。寰宇記。山有孤峯。上聳約三十里。盤亘約三百里。層洞泉石種種奇勝。山之脊曰黃竹崎。山下有龍峽。其旁峙者曰龍山。又有馬笠山。如人

騎而笠亦高出羣山之上志云縣北六十里有鷄槩山俗呼馬芳頭險絕可守通將樂之隘也

桐岡嶺

在縣東南十五里上多梧桐蜿蜒起伏長數十里一名黃泥亦曰倒油亦曰章坑嶺又箕營嶺在縣東北四十里上有羊角峙二峯玉立雲表俯視環邑諸山如翠濤白浪又三溪嶺在縣北六十里嶺峻而遠路通將樂下有潭最深○龍泉峯在縣

東南十七里脈自尤溪縣界分三隴蜿蜒而來至此崛起三峯又蓮花三峯在縣東北二十餘里三峯疊聳如蓮花之峙

豪峰巖

縣西五十里巖石峭拔其上平廣可容千餘人又羅巖在縣東三十餘里巖石陡絕有羅嶺通尤溪縣界又蕉皮巖在縣東南四十里下有蕉皮洞深廣可一里清泉怪石樹木蔭翳四時如春○雨林洞在縣西南三十里一名金盆洞深廣容千人

又七仙洞在縣東數里洞有三皆寬廣其一尤深杳不可測

太史溪

在縣治南七峯山之北舊名大溪亦謂之沙溪宋李忠定以太史謫官居此因名志云溪源出汀州府寧化縣歷新嶺入縣界回旋合溪旁小水流七十里抵大洲匯茂溪衍迤澄曠平流十里所謂太史溪也自茂溪宛折而南而東八十里出沙溪

口合西溪又東四十里而至建寧府城爲往來通道圖經太史溪中有洲當縣治南一名大洲亦曰長洲一名蚪洲以形若潛蚪出水也舊長數百丈溪水至此中分有居民千餘家後洲漸落猶長二三十丈今不過荏葦之場耳土人亦謂之金沙墩溪之上

流險巖如龍門至大洲稍平緩通志大溪發源汀之寧化連城及漳之龍巖縣界至縣境會爲吉溪引而東亦謂之東溪有梅溪及陽鄉等十溪皆流合焉經縣治東朝陽峰下會北鄉溪爲一繞而南有洛溪及箕營等十溪俱流合焉北鄉溪蓋卽茂溪矣

茂溪

在縣城東出將樂縣界繞北鄉寨亦謂之北鄉溪又南流至此入於太史溪一名半溪一名東溪水盛時可行小舟志云將樂縣界又有湧溪順昌縣界又有庇口溪黃沙溪又南爲赤溪又西北幼山下有幼溪又北爲傑溪皆流合茂溪而入大溪又有

黃沙溪在縣西南源出汀州府歸化縣流入吉溪○洛溪在縣東南源出尤溪縣又有洛陽溪亦出焉西北流合諸小溪水流入大溪縣東北又有漁溪及貧簷溪俱出南平縣界下流入於大溪

百丈漈

縣東北三十里懸流百丈有玉溪水出漈北下山下流經此南入大溪相近又有梅花漈瀑流飛注巖石間高數十丈激沫如梅花縣西七十里又有莘口銀河漈亦飛流百丈如銀河下注下有石橋跨兩山間志云縣境以漈名者十餘計下流皆

入大溪○蕉峽灘在縣西南三十八里大溪中最險暴雨流濁舟不可行又橫石灘在縣西三十餘里一名黃龍灘水底隱一巨石橫亘中流轟濤掣浪舟行者恒有覆溺之患又大磯灘在縣東八里又東爲小磯灘一名大姨小姨灘夾石激流舟行艱險縣東十六里爲雷霹灘水流衝激澎湃如雷又有雷灘灘在縣東三十五里俗呼螺紋灘灘港紆迴若螺旋然中流復有巨石橫亘舟行難於折旋又牛穴灘在縣東五十餘里灘下石壁夾峙潭滙其中名漁溪潭又東四里爲佛子灘一名田仔灘中流有巨石狀如蟾蜍每遇暴漲洄洑爲害因繪佛像於石上篙師以爲水候諺曰水浸佛肩不敢行船水浸佛足舟行宜速又東至金沙灘而出沙溪口志云大灘上流之灘十有四蕉峽黃石爲險下流之灘三十霹靂雷灘佛子爲險也

北鄉寨

縣北五十里宋元豐三年建砦元因之明朝洪武八年改爲巡司○洛陽口寨在縣東南二十里宋元豐三年置砦又設巡司於砦前洛陽鎮元廢又崇安鎮在縣東三里志云縣東門外對岸有山洲一名仙洲一名崇安洲溪旁三面皆阻水唐崇

安鎮置

於此

七峰驛

在縣南郭內又縣東四十里有同爵驛俱宋置元因之明初廢又錢監在縣北三里俱宋置鑄錢處又縣西有青雲寨正統中亂賊鄧茂七等旅拒處也賊平砦廢○翔鳳橋在縣治南宋紹聖四年初建浮橋名平津後徒廢不一明朝洪武二十九

年重建正統十三年寇毀景泰初復建浮橋正德三年累石中流凡十有三構木爲梁繫以磚復覆以屋稱爲宏麗又登瀛橋在縣治東一山介二水間所謂山洲也宋李忠定更名仙洲建浮橋名曰登瀛紹興二十九年鄞守吳舜舉累石覆亭邑人呼吳公

橋後再經修廢永樂十六年

設舟以濟俗仍呼東門橋

尤溪縣

府東南百五十里東至福州府閩清縣百七十里西南至泉州府德化縣三百二十五里西北至漳州府龍巖縣三百六十五里晉延平縣地宋齊時爲沙村縣地唐初爲山岫地開元二十八年置尤溪縣隸福州五代晉開運二年南唐取其地爲制置鎮明年改隸建州明朝宏治四年築城阻溪壑濠周八里嘉靖二年議者以城大難守六年改築新城周不及二里編戶百有九里

伏獅山

縣治北狀如伏獅爲縣鎮山又雙髻山在縣北二十五里兩峯並峙峭拔千仞如劍倚天外一名雙峯山圖經自雙峯南隴委蛇起伏行三十里爲貴人峯峯迴突聳卽伏獅山也志云雙髻山北二十餘里有蓮花峯上有天湖水色紺碧深不可測

應仙山

縣東北三十里山秀麗登絕頂俯視羣峯舊名鷄心山又九仙山志云在縣西南四十里一名蓬萊山巍然秀拔人跡罕到又西南二十里曰金樓山翠聳雲中狀如樓閣又鷓鴣山在縣南六十五里其山三面壁立千仞鷓鴣灘環其下卽尤溪水所經也一徑盤旋至山巔如羊腸然寇亂鄉人多避居於此○仙靈山在縣南九十里巖石奇勝得名者凡數處又龍門山在縣南七十里高千餘丈頂有石穴泉極清激

分枝嶺

縣西南百七十里與泉州府德化縣接界嶺居二縣間上有大樹南北兩枝分二縣境有關在其上俗亦呼爲大關嶺又馬眼阻邑人朱紱別開坦道嶺遂廢又白沙嶺在縣西南六十里嶺高峻多白沙又縣西九十里有新嶺宋熙寧中嘗開新道於此又棗嶺在縣西十里縈迴可五里頂有瀑布懸流○丹溪嶺在縣北六十里一名桃木嶺界南平縣縈迴可十五里自趾至巔凡

三層皆數百丈。同視數十里。川原隱隱。溝陸綦布。有丹溪繞流其下。又戴公嶺。在縣西北六十里。嶺道紆迴。凡三十二圻。其相近曰茶峯嶺。嶺下有百級嶺。

賴巖

縣西三十五里。其上怪石萬數。鉅者如屋。綿亘可三里。宛然一洞府也。洞口緣梯而上。石室聯屬。皆有竇如戶。其中流泉石。可以聚居。宋紹熙初。建寇葉亮犯縣。鄉民匿其間。保全者千餘人。又銅盤巖。在縣西十餘里。懸崖峻峭。竹樹蔭翳。鳥道縈紆。流

泉澗沫如雨。巖下有潭。廣可四五丈。鄉人資以灌溉。縣西南百二十里。又有流溪巖。高百餘丈。無草木。其崖石皆鐵鑛。鑿之可冶。○凌霄洞在縣西五十里。山崖壁立。惟一竇可躋。宋紹興三十年。寇亂。鄉人賴以免難。

尤溪

在城東有二源。一出泉州府德化縣界。一出漳州府龍巖縣界。會於縣之西南而北流。縣境諸山澗水支分。總注。有湯泉等二十溪。次第流瀄焉。自城東益轉而北。亦曰湖頭溪。至縣北七十里。尤口涵。會於建溪。五代晉天福中。閩主曦與建州王延政相

攻。遣兵屯尤口。將襲建州。為建州兵所敗。即今尤溪口矣。溪中諸灘。上流凡二十六。下流凡三十。櫛比以達於尤溪。

青印溪

在縣城南。溪中有青石如印。因名。源出縣西九十里。沙縣接界之杉嶺。迤邐而東。有山坑。王衛等凡十有一溪。次第流合焉。經縣前入湖頭溪。有潭。其水澄碧。深不可測。潭而東西闊十數丈。其上兩崖相逼。俗以為虎可跳而過。名虎跳潭。

高才坂鎮

縣西百三十里。元置高才坂巡司。明朝因之。志云。縣後崇嶺上有牢城關。宋建炎二年。范汝為率其黨入寇。邑人以此嶺北接高源嶺。南扒小村嶺。沿山一帶。易為寇徑。因設關置砦以守之。既而賊黨自沙縣來犯。果欲從此突入。為土兵

所敗。小村嶺近城東。

順昌縣

府西百二十里。西至將樂縣百里。東北至建寧府二百十里。西北至邵武府百八十里。本建安縣地。唐貞觀三年。析置將水場。嗣聖四年。於將水口置鶴科鎮。景福二年。改為永順場。尋升為順昌縣。屬建州。南唐保大三年。改屬劍州。宋以後因之。明朝正

德初始築城。周四里有奇。編戶五十八里。

龍山

縣南三里。勢若游龍。上有龍頭巖。登山巔。可盡一邑之勝。其西南有大明山。孤峙峭立。日出則光先照。因名。其相屬者曰金龍山。頂甚平曠。○鳳山在縣西二十里。五峯疊翠。高數百仞。縣西北二十三里。有景靈山。與鳳山對峙。山高巒常。有雲霧蒙其上。

左有耳殊巖。下有黃家洞。宋建炎間兵亂。邑人黃氏族數百指避其中。又高峰山。在縣西南二十五里。其峯拔出羣嶺。下有交溪。溪源出西南四十里沙縣界交槎嶺。流與縣西之瞿村小溪合。因名下流入於順陽溪。又西五里有寶山。亦峭拔。

超華山

縣西北六十里。周圍甚廣。接邵武府界。頂有泉。流分五澗。東出者曰橫溪。北出者曰李坑溪。南出者曰石橋澗。俱入順陽溪。西北出者二。入邵武溪。山之幽曠處。有田園居民數十家。中有嶺曰寶嶺。又梅仙山。在縣北七十里。接甌寧縣界。山巔平曠。

廣袤數里。相傳山以梅福名。縣北三十里。又有華陽山。三峯並列。山半有石門。高廣數丈。中峯頂又有巖。曰仙水。○七臺山在縣西七十八里。高峯峭壁。幾至千丈。其相望者曰鉢孟山。又幹山。在縣西五十里。周二十里。巔有石洞。容數百人。中有泉。清澈可鑒。

又寨山在縣南六十里。昔人嘗立寨於此。因名。

徘徊嶺

縣南十里。高五十丈。險峻鳥道。至嶺頭。路乃平坦。尋小溪而入。徘徊掩映。謂之徊村。四面皆絕壁。有石井。深不可測。一名亨龍嶺。或云徊村亦名回源洞。宋韓世忠討賊帥范汝為於建州。汝為竄死於此。徊村溪之水。亦流入於順陽溪。

順陽溪

在縣西北六十里。順陽鄉縣以此名。源出建寧府建陽縣界。東南流。至白芒畚。始通小舟。縣西有沙溪。自邵武縣流入。西北有密溪。自甌寧縣流入。俱合於順陽溪。又有竹步等八溪。亦自甌寧等境流灌焉。經縣前與大溪合流。而東會於沙縣之沙

溪。

西南溪

在縣治西。即將樂縣之大溪也。東流至此。又西溪流合焉。志云。西溪出邵武光澤縣。縈流至縣治西。亦謂之礮姑溪。合順陽溪而會於大溪。西溪中有三灘。皆險峻。大溪中有五灘。三灘在上流。會西溪而東注。又有二灘。會於沙溪。志云。自縣治東至

沙溪口。凡六十里。○石溪在縣南二十里。相近又有恭溪。皆出沙縣界之桃源洞。志云。縣西南諸溪皆流瀨於大溪。

仁壽鎮

縣西北百二十里。宋為仁壽寨。元因之。明朝洪武初。改置巡司。又洪武九年。置仁壽稅課局於此。十四年。并置河泊所。○石湖寨在縣西北三十里。石湖嶺相近。地勢寬袤。可容千餘家。南唐保大中。別將張彥成領兵置砦於此。故址猶存。

上洋口隘

縣東三十里。又東二十里曰下洋。又東三十里。即王壑驛也。聞見錄。自上洋口而北出大歷口。吉陽里。即建寧府甌寧縣界。○原坑隘在縣南三十里。山谿盤結。至為險隘。南通沙縣。西南達汀州之歸化縣。

雙峰驛

在縣治西。宋置順興驛。明朝洪武初。改名。又富屯驛在縣西北六十里。洪武初建。聞見錄。縣西北四十里有萬全橋。又西北二十里至富屯驛。又七十里至拿口驛。又西北八十里。即邵武府。自萬全橋而北百四十里。達甌寧之仁壽鄉。又北接建

陽縣界。通志。萬全橋一名仁濟橋。元至順中建。後圯。近時重建。○龍溪橋在縣南。其地左負山。右臨澗。路轉山坳。始與橋直。宋紹定二年。寇至。官軍據橋為險。與寇戰。寇敗。走橋久廢。今仍架木以通往來。

永安縣

府西南二百里。西至汀州府清流縣百四十里。南至漳州府寧洋縣百十里。本沙縣及尤溪縣地。景泰三年。析沙縣新嶺以南。尤溪寶山以西地。置縣。宏治四年築城。周五里。編戶六十五里。

金星山

在縣城西。西北臨溪。有石壁。巉巖如削。下為潭。燕水所瀨也。志云。治東一里有東山。又有三台山。三峯並立。○大秀山在縣東北四十里。巍然秀拔於羣山之上。又龍會山在縣東五十里。山極高峻。其巔羣峯簇聚。如龍會然。

柃欄山

縣北二十里。多產柃欄木。峯巒巖岫。高下相屬。其最著者為天柱。射梁。諸峯。獅子。觀音等巖。降仙。步雲。諸壑。野雲洞。銅盤澗。及天池。諸山。李忠定曰。為小武夷。○斗山在縣東南三十里。一名天斗山。山高峻。白頂凹下。廣可五里。狀若斗然。山陰有風

穴雲洞。磴路嶮巖。人跡罕至。絕頂有峯。曰合擊。

貢川山

在縣東北四十里。上有桃源洞。一線天。諸勝。山峽斗絕。僅容趾陟。其巔田廬井井。故有桃源之目。正統間。鄧茂七等作亂。敗官軍於沙縣。據貢川爲寨守之。茂七敗死。其黨鄧伯孫復嘯聚於此。官軍自沙縣進。破其貢川掛口。陳山諸寨。伯孫被擒。是也。陳山見沙縣。○石羅山在縣東萬山中。突起七峯。次第排列。四面有洞口。狹而中廣。名勝志云。山在斗山東南。

黃田嶺

縣南六十里。接漳州府龍巖縣界。縣東百里。又有鐵山嶺。產鐵。又有新嶺。在縣東北八十里。卽沙縣分界處也。○黃楊巖。在縣北六十里。與汀州府歸化縣接界。上多小黃楊。因以名巖。後亦名萬壽巖。又名鱗峯巖。四壁如削。周圍可十里。卓出羣山之上。上有三洞相聯。幽深不測。正統九年寇亂。居人避此。寇不能攻。又北二里有翠雲巖。亦名侍郎巖。峯巒甚勝。宋張駕。楊時。陳璘讀書處也。亦接歸化縣界。又百丈巖。在縣北五十里。高約百丈。周圍三里。四面削壁。中有一徑。陡絕。其巔常冒雲氣。與栢欄山隔溪相望。溪僅通舟。亦名桃源洞。又縣東北二十七里有官砦巖。巖石峻絕。相傳舊爲官砦。志云。縣西有曹巖洞。空曠可容千人。

燕溪

在縣城西。二水分流。中隔一岡。宛如燕尾。因名。源有三。一西出汀州府寧化縣境。過清流縣。下九龍潭而東。謂之龍溪。一西南出連城縣境。由吉山而東北流。又東至賴口。與龍溪合流。至城西南一里。謂之吉溪。一南出漳州府寧洋縣境。由掃溪口而北。歷張坡。車坂。至縣治西。合於吉溪。是謂燕水。東北流。會梅溪。以下數溪入沙縣界。卽沙溪上源矣。志云。梅溪亦曰大梅溪。出縣東白塔下。而西。東北會於燕溪。

九龍潭

在縣西。卽龍溪之灘也。曰長龍。曰安龍。曰傷龍。曰馬龍。曰三悟龍。曰五白龍。曰興龍。曰暮龍。曰下長龍。乃溪水最險處。未至長龍。有鐵石磯。從清流縣來者。必艤舟於此。厚縛竹葉。遮蔽船頭。別募土人持篙前立。遇龍處。水之高低常數丈。舟從高墜。

下鑽入浪中躍起。卽有巨石當頭。相去才尺許。土人以篙輕拄卽轉前灘。水既懸奔。又轉折於亂石之間。兩山夾峙。險隘陰翳。一瞬遲悞。便爲齧粉。天下之險。無踰於此矣。內六龍鳴清流縣。下此又歷十一灘。至沙縣界。正統中。羣盜結寨於此。曰九龍山。賊官軍以計奪其寨。又敗賊於縣西高陽里。志云。縣西南五十里有安沙。舊傳聚沙成岸。水漲不崩。故曰安。或云出九龍至此始安也。縣名永安。以此高忠愍公云。從延平至安沙一路小舟。僅可載兩人。至九龍十八灘。每過一灘。舟皆猿掛而上。盡九龍則陸行至汀州。

安砂鎮

縣西九十里。舊爲浮流鎮巡司。宋元祐五年。建爲浮流寨。明朝改巡司。景泰三年。以浮流鎮爲縣治。徒巡司於此。改今名。邑城記。縣治舊爲沙縣之浮流口。當尤溪。將樂。清流。盜賊出沒之衝。唐李肅禦汀賊於此。力戰而死。處也。正統末。遭鄧茂七之亂。始議置縣。宏治中。城始就。阻溪負山。不事濠塹。稱完固云。又湖口巡司。在縣南六十里。接連城。龍巖二縣界。正統五年置。

黃楊砦

在縣北黃楊巖下。舊名巖前砦。宋嘉定十七年。以其地險遠。置砦守禦。紹定四年。增兵戍守。元至元中。設巡司。明朝洪武初。改爲黃楊砦巡司。十四年廢。又龍口砦巡司。在縣北。宋慶元四年置。砦設軍屯。元廢。又大陶寨。亦在縣北境。元至元中置。後廢。舊皆在沙縣境。後改今屬。○蓮花寨。在縣東五里。山形如蓮花。周圍壁削。一小徑可登。僅容側足。宋元之季。鄉人多避寇於此。明朝正統十三年。沙尤寇發。鄉民多賴以全濟。

蜂口隘

縣南四十里。又南二十里曰林田隘。爲路出寧洋縣之要隘。由此而前。東西南三路俱可達寧洋。凡六十里而近。

大田縣

府西南四百里。東至尤溪縣百七十里。東南至泉州府德化縣二百里。本尤溪縣地。嘉靖十四年。議以地界延漳。泉三府之交。深阻。嘗爲盜藪。乃割尤溪之十四都。益以永安。漳平。德化諸縣地。置縣。明年築城。周不及四里。編戶四十里。

雙髻山

在縣城北。高聳圓秀。雙峯並峙。爲縣主山。又北有五壘山。五峯突起天表。其兩峯尤爲傑出。自下望之。縹緲入雲。亦有雙髻之稱。麓有滌。曰龍源。懸流百仞。其下瀦爲龍潭。○大仙山在縣南。亦有雙峯。插天如仙人角髻。立於雲外。縣之鎮山也。聞見

錄。大田東南二十里有仙峯山。接泉州府德化縣界。卽此山矣。又雪山。

在縣東南百里。高千仞。延袤十餘里。雪常凝其上。南接靈峯山。亦高勝。

銀瓶山

縣東三十里。瓶亦作屏。舊於此開辦銀課。其山兼產銀鐵。明初亦置銀冶鼓鑄。漸遭聚爲盜。景泰後罷冶。惟鐵冶尙存。奸民擅其利。相近有太素山。透迤層累。冬多積雪。一望皓然。又東南有白鶴山。層巒疊嶂。高矗千仞。昂然如鶴立雲霄。志云。縣東

有東屏山。蒼峭壁立。方正如屏。山背有嶺。接尤溪縣界。後滌溪迤邐十五里。泉石甚佳。曰山後嶺。○大富山在縣西六十里。接漳平縣界。上有泉一鄉。之田俱藉其灌溉。又大寶。小寶二山。在縣西北五十里。接永安縣界。產鐵礦。最佳。

南臺山

縣南二百餘里。一名臺閣山。山勢高聳。上平如掌。有池不涸。相近有蓮花崎山。安仁巡司置於此。又有天湖崎山。其巔有湖。又南爲石筍崎山。頂有三五峯。卓立如筍也。舊俱屬德化縣。後改今屬。

靈惠巖

縣東北九十里。巖壁峭拔。有洞可環坐千人。其泉曰聖泉。隨飲隨溢。舊名師姑巖。一名佛窟巖。山之陰卽沙縣界。又東巖亦在縣東北。懸崖阻峭。惟一徑可登。鄧茂七之亂。鄉人結砦於此。以拒守。又郎官巖。在縣東。正統間。官兵勦寇。駐師於此。志云。

尤溪令李文克所駐。因名。縣東北又有陳平嶺。嶺舊在永安縣界。西去永安八十里。元末陳友定開此嶺。路通尤溪。因名。又燠嶺。在縣東南興原。商旅往來處也。又南有栢襍嶺。產鐵礦。○龍門洞在縣東南。舊志在尤溪縣南六十里。峻絕萬仞。四面無路。僅羊

腸可通。一名滴水。

洞中容二三百人。

縣前溪

在縣治南。源出德化縣界。環繞北出。縣境諸溪澗水悉流入焉。東北入尤溪縣境。亦謂之大溪。卽尤溪之上源也。○東溪在縣東北七十里。其初發處爲觴溪。流經英果砦而西南出。會渡頭溪。又渡頭溪源出縣西北永安縣境。東南流。二溪皆合小

溪諸流以
達大溪。

英果砦。

縣東七十里。宋元豐三年置砦設巡司。元至元二十年徙而西北。在縣陳平嶺相近。明朝洪武四年復還舊址。本屬尤溪。後改今屬。又安仁巡司在縣南正統中建。本屬德化縣。後改今屬。○石牌隘在縣東南四十里。路通德化。又縣南四十里有大績隘。亦南出德化之徑道。又桃源隘在縣西南百里。接漳州府漳平縣界。志云舊有長安隘在德化縣西北二百里。路出漳平。今亦屬縣界。

附見

延平衛。

在府治東。洪武元年置。○將樂守禦千戶所在縣治南。洪武四年置。又永安守禦千戶所在縣治東。景泰三年置。

